

KALSIN ARO SONATCHI

(DAKMESOKANI)

**BAK
SA. GNI, GITTAM
ARO BRI**

Julius L. R. Marak, M. A.; Ph. D.
1999.

Acc. No. 11493

Class No. _____

Book No. _____

Author Marak Julius L.R.

Title Kaban na Sonabdi

ED. M. M. M. M.

Borrower's No.	Due Date	Borrower's No.	Due Date
1. 9. 20			

DISTRICT LIBRARY

EAST GARO HILLS DISTRICT

WILLIAM NAGAR

Accession No. _____

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

SONATCHI ARO KALSIN

(DAKMESOKANI)

BAK.:

SA : GNI : GITTAM ARO BRI.


JULIUS. L. R. MARAK, M.A; PH.D
1998.

Published by -- Dr. Julius L. R. Marak, MA; Ph. D
Balringra Nokte,
Rongjeng-Chigisin,
P. O. Rongjeng,
East Garo Hills, (Meghalaya)
Pin- 794110.

1000 Copies.

Chappa Ka'chenggipa, 1998.

(c) Julius L. R. Marak.



Dam -- Rs. 70/-



Gajiram R. Sangma

Ia ki'tapko chinga chingni ka'sabegipa pagipa Gajiram R. Sangma uni name janggi tanganiko tangdile aro mesoke on'anganiranguo gisik ra'na on'angaha, jean ia a'gilsakko May 28. 1996 tarik Mongolbar salo watangaha. Ua ia ki'tapni bimangko nikangna kusi ong'beoba man'angjaha.

"Jringjrotna tom'tome neng'takaniko on 'bo, oh, Gitel."

Ka'ndikgipa Janggi tangani.

Pa Gajiram Rongrokgre Sangma, February 17. 1897 bilsio Do'bakdrop songo, W. Khasi Hills (Nonglang Sirdarship)-o atchiaha. Uan Pa Chengding Bolpleng Marak aro ma Dangche R. Sangmani depante ong'achim.

Gajiram R. Sangma, 1939 bilsio Pa Tejan N. Sangma aro Ma Dalje R. Marakni demechik Ma Rathe R. Marakko an'tangna jora ripengko do'ra do'sie ra'aha. Isol uamangna depante sakgittam aro demechik sakbongako patiaha.

Ua Primary schoolko matchotman'o, Middle Scholarshipko jao gong bongako man'e, matchote poraina man'aha. Middle matchotman'e Baraigaon songo 1925 bilsio dikediksana School Ka'aha. Uni Ja'mano ua Baraigaon songko wate songtangchina re'angpile, A'beram songo, W. Khasi Hills. 1930 joloni 1938 jolona skul Ka'anguaha. Jensalo a'gilsak gimikni gnigipa dakgrikani ong'ahaon skulko chipaha. Dakgrikani Ja'manode ua skul ka'ako dontonge tom'tome game sue cha'e janggi tangangaha.

Ukem Baraigaon songsamo Soraikurung ninggipa Songo, Assamese Medium L.P. Schoolko 1868 bilsio kulichengaha. Uni ja'mano M. E. Schoolkoba 1922 bilsio kulitaiaha.

Pa Gajiram R. Sangma, ia a'gilsako bilsio sotskusu ja gittamna tangange, an'tangni dedrang, su'drangrangko nama janggi tanganio tangdile dedrangko skia poraianio, gisikni seng'anio ja'del bolchaate donange kusi ong'e pagipaona re'angpil'aha. Ua a'gilsako an'tangni Jik, dedrang, su'drangrang baksa dongangu'na skoba, pagipa Isol uko neng'takatna nangnike May 28.1996 (Mongolbal) attam 3.30 bajio an'tangona rimangaha. Uandake ua an'tangni ka'sabegipa Jikgipa, dongkuenggipa dedrang sak dok, su'drangrang aro ka'sarangko wate jringjrotni neng'takram biapona re'angoaha.

Uni namnambegipa Ku'patianirang, chugnuna gisikni tikelanirang, dongriku'eggipa jik, dedrang aro su'drangrangni gisik ka'tongo panggan dongkamgen. Apa tom'tomao neng'takchina.

Sintie do'pilginrikenggipa magipa aro dedrang,
 Rathe R. Marak (ma'gipa)
 Brelish R. Marak. (Demechik)
 Stella R. Marak. (Demechik)
 Julius L. R Marak. (Depante)
 Brehoti R. Marak. (Demechik)
 Aurelius Bruno R Marak. (Depante)
 Dendish R. Marak.(Depante)

NING·O SEGIMIN KATTA BICHONGRANG

IAK.

1.	JANAPANI	i to ii
2.	KATTA BIMA	i to xi.
3.	DAKMESOKANIO BAK RA·GIPARANG	xii.
4.	DAKMESOKANI - SAGIPA	1 to 31
5.	DAKMESOKANI - GNIGIPA	32 to 65
6.	DAKMESOKANI - GIT·TAMGIPA	66 to 87
7.	DAKMESOKANI - BRIGIPA	88 to 107
8.	BIBLIOGRAPHY.	108

.....

JANAPANI

Sonatchi aro Kalsinni dakmesokaniko 1937-38 bilsirangoni intalan A'chik a-songni salgro Jolo chong'motan PENCHIMARI, Rongchipatpara, Moskuli, Derek (Assam) aro gipin biaprangoba dakmesoke mesokaha. Haida, ua sonatchi aro Kalsinni golpoko Bengali oikorch, Pa Upendro Ch. Momin sechengaha ine nikaha, 1930 bilsirangon matchotna nangaha.

Kalsin aro Sonatchini gimin chu-gimik uamangni kam aro kattarangni gimin dakmesokani aganbewalo seaha. Iandagipa Kalsin aro sonatchini dakmesokani chu'soksrange knalo an'chingni A'chik bi'sarangna u'i ma'sirike ra'rikchina donangenga maina iandagdipa dakmesokanirang jatni gisepo da'o gimaangengaha.

Kalsin aro Sonatchini gimin a'sel chong'mot banoni aro nuai mai ong'achim u'ina aro ma'sina skanirang bang'an dongani gimin, anga ia ki'tapko seanio man'a dipet dakmesokaniko dakdilchenggiparango, me'apa chagitchamrango sing'sandie aro sandirikote jeko man'a talatenga. A'chikrang rokomari dakmesokanirango dakmesokna, chrok mesana, git rigng'na, ring'ring'na aro daksningna changgiparang ong'a. Indiba, iarang plakko daksninge dakmesokna chol ong'pagijanio dongjripna nangaha.

Sonatchi aro Kalsinni dakmesokaniko skanggipa dakdilchenggiparangoni Pa Nogen Sangma (sagi) Rongchipatpara songoni ong'a. Uni ja'mano Moskuli songo Pa Ramesor K. sangma, 1940 jolrangoni a'bachengskaha. Ja'manode ka'sine ka'sine gipin biaprangonaba, Jemangan dakmesokaniko mesokna gisik nanga, ra'rroe gipangaha aro club ba dolrangkoba a'bachengaha. Indiba ia plak jatni dakmesokanirang jatangni didianiko man'gijanichi, Cinema, T. V. ba andagipa rokomari nika nianirang A'chik a'songonaba gipbaanichi, 1980 jolrangoni intal ka'sine ka'sine bon'angaha. Ia dakmesokanirangara jatni mingsa nambegipa dakbewalko dakmesokani ong'achim. Haida, ia ki'tap saoba jatni gisepo iandagipa dakmesokanirango ripingangna sikgiparangna dakchakani ong'naba donga ine chanchiesa chu'gimik dakmesokaniko seaha. Iandagipa dakmesokanirango jatni gisepo ripingangna nanga. uni gimin je manderangan ia dakmesokaniko poraigen nama gimikko skie ra'e namgijako gale A'chik pagitcham chagitchamrangni namgipa chanchibewalani katta aro kamko ripingna knalona jotton ka'na.

Sonatchi aro Kalsinni gimin plak katta bichongrangko agan talate on'e angko dakchakgiparangna jemangkon iano sena chol ong'jaha plakkon mitela

Kalsin aro Sonatchini dakmesokaniko anga an'tangan songni me'apa, me'chikma aro dakmesokaniko dakdilgiparango sing'sandie seaha. Uamangni gimin bang'an, ma'sina aro talna skanirang bang'a indiba anga ia manderangni nangnikanirango ia damesokani ki'tapo chu'sokatna man'jaha. Redin Momin, Sonatchi aro Kalsinni gimin golponi bimango seaha indiba dakmesokani bimango dongkuja. Uni a'bachengo dakdilchenggipa dakmesokani seanirango sandie nie aro chong'mot ong'aniko sing'jike da'o ia dakmesokani bimango nakatatenga.

Uni gimin ia ki'tapko poraie nie ma'sigiparang, saoba talbate ma'siode aro uarangko u'iatpaode anga uarangna kusi ong'begen. Ua namdapatani kattarangko changgipin nipiltaie chapa ka'atanio on'dapataniko on'a kusi ong'begen.

Dated Shillong.
The 4th June, 1996.

Julius L.R. Marak.

KALSIN ARO SONATCHI

KATTA BIMA

* * * *

Kalsin aro Sonatchi-mangni katta bichong chong-mot mai ong'achim, darangba sandirikote nia dongkuja. Kalsin aro sonatchini golpo saoba mandeni chong'mot janggi tangani ong'ama ba ong'achimma namedake ma'sina man'ja. Saoba mandeni chong'mot janggi tangani ong'genchimode, uamangara bano songdong a'chara chiga chiringa namedake sandie nina. Pa Redin Mrenda Momin-ni Kalsin aro Sonatchini gimin golponi bimango see donanggipako 1972 bilsio chappa ka'atgiminko nikna man'gen. Redin Momin, a'bachengani agananio indi ine janapaha. "dingtangdingtang jolrango Sonatchini golporangko agananirang gnang. Indiba ia ki'tapo seanirangsa a'bachenggipa aro chong'motgipa katta ong'a. Neng'bee sanditaiesa ia chu'gimik seaniko chu'sokatna man'aha". Redin Momin. Sonatchi aro Kalsinni golpoko, Chong'mot mandeni janggi tanganichima, ba badiaba golpoonikosa A'chikni bewal aro dakbewalrangko ra'e seachimma, talatanga dongja.

Pa Redin mominni golponi bimango kosako janapgimin kattarango pangchake see donanggipani gimin, man'a dipet che'em che'em u'igipa ma'sikuengipa manderango sandiroroe talatangan baksana banoni ong'baa katta ja'pangko talatangtaienga jedakode ong'a ba ong'gijakoba u'i ma'siriktaichina aro chekriktaichina dakmesokani bimango see donangtaienga. Da'o ia chasongo, A'chik skia poraia, bida buti dongbatokengahani gimin rokomari jatni gisepo jerikotanirang aro chong'mot ong'a obostako ma'sina jotton ka'a. Manderangni ku'birangranganiko knaman'enga gita, Kalsin aro Sonatchini golpoko Reddin Momin seja indiba sakgipinni seakosa namdapate chappa ka'ataha. Mittam ku'bisirngrang gam'enga, Redin Momin an'tangan Bengali golponikosa pe'skaenba uko jatni golpo ong'jaoba, A'chikni bewal aro dakbewalrangona ra'gate segatskara. Undake manderangni agan ku'riting-ranganiko knana man'e, anga an'tangan kakketko ma'sina ske jeko man'engkua sandirikote nitaie, Kalsin aro Sonatchini golpoko Dakmesokani bimango, chong'mot ong'a ba ong'gijako u'i ma'sigipa me'aparango sing'jike nakatataienga. A'bachengo Kalsin aro Sonatchini golpo Dakmesokani bimangosa ong'achim.

Redin Mrenda Monin, Kalsin aro Sonatchini golpoko seanggiminko Pa Grimchi C. Marak (Chaware) 1972 bilsio skanggipa chappa ka'ataha. Da'o Kalsin aro Sonatchini golpoko A'chik Skulrango ra'engani gimin chatrorangni nangnikani kri, namdapani aro on'daptaiani donggija bongagipa chappa ka'attaigipa 1987 bilsio ong'a.

Katta chimik.

Kalsin aro Sonatchini gimin katta bima, bidilma aro ong'buani gimin u'i ma'siengkuenggipa aro dakmesokaniko a'bachengaonin dakdilbaenggipa me'aparango sing'rikote sandianio sakprakprakni agananirangko nirike chanchirikna man'gen. Uamangni agananirang dingtangdingtang ong'genchim ong'oba katta chimikde apsan. Uamangni kattarango pangchake ia ki'tapko poraienggipa sakantian chanchibewale niskabo.

Pa Trison S. Daring, Inspector of Schools, Tura, September 15.1986 tariko sing'anina ua indi ine aganaha, 'sonatchi aro Kalsinni golpoko Bengali golpoonikosa, Pa Upendro ba Bhupen Momin pe'skae golpoko seaha. Upendro Momin, Haluaghat bengali Medium Mission Schoolo, da'o bangladesh, poraiachim. Ia Missio poraimittingo, Upen C. Momin, Kalsin aro Sonatchini golpoko seaha. Kalsin aro Sonatchini a'bachenggipa katta bichong gimikkan, Upen Mominni segipa golposa' ine rake sakiko on'e an'tangni ma'siako aganne on'aha. Upendro Momin Baksalpara songoniko jikkimdebara.¹ Pa Trison Daring, uni golpoko seani bilsiko aro Haluaghato poraiani bilsiko gisik ra'jaha ineba aganaha.

Pa Itchak Nongbak Sangma, song Tangkula, Kamrup, Assam. kalsin aro Sonatchini gimin October 10,1993 tariko sing'anina indi ine aganchakaha, "kalsin aro Sonatchini dakmesokaniko, anga an'tangde angni ripeng pa Ranjeng Marak sagi, jakoniko angni goalparachi re'angao 1936 bilsio Bengali ku'sikchi segipa ki'tap chonnako man'bara : Ua Bengali Ku'sikchi segipa A'chik ki'taponikosa chinga pa'skaenba Kalsin Sonatchini dakmesokaniko Tangkula songo 1937 bilsio joloni intal dakmesoke rona a'bachengaha. Aro chinga, Kalsin Sonatchini dakmesokaniko, Penchimari aro Rongchipatpara songrango, Goalpara, Assam, 1937-38 bilsirango a'bachenge mesokaha. Kalsin aro Sonatchini golpoko, Bengali oikorchi segipaoniko A'chik Ku'sik (Roman oikor) ona Rongchipatpara songni, pa Nogen Sangma, sagi, 1937 bilsio pe'skae sechengaha.² pa Itchak N. Sangma, an'tangan Bengali oikorchi segipa Kalsin Sonatchini golpoko man'bac dakmesokaniko dakdilchenggiparangoi saksa ong'a. Ua ki'tapko gimaataha.

Pa Ramesor Sangma, Moskuli songni, Goalpara, Assam, September 4, 1986 tariko sing'anina aganchake inaha, "anga an'tangde sonatchi aro Kalsinni dakmesokaniko 1942-43 bilsio, Goalpara Schoolo poraimittingo, Bupen Mominni Jakoniko, uni poetry dake sechenggipa diaryko man'bara. Ua diaryonikosa 1955 bilsion kalsin aro sonatchini dakmesokaniko anga an'tangde namdapate aro sedaptaie dakmesokaniko Moskuli songo dakdilaha. Kalsin aro Sonatchini dakmesokaniko Moskuli songo January 26,1956 bilsio a'bachengataha. Indiba, ua apsan poetry dake segipa ki'tapko jekon anga Bupenni jakoniko 1942-43 bilsio man'barachim, ja'mano angni jakoniko saoba ra'anskaha, Ua diaryko Bengali oikorchi seja, da'o segipa A'chik ku'sikchin sea,³ Ramesor Sangmaba ua an'tangni a'bachengo man'bagipa ki'tapko pil'e gimaataiaha. Ramesor Sangma, Moskuli songo Kalsin aro Sonatchini dakmesokaniko dakdilchenggipa manderang ong'achim.

Dr. M. S. Sangma, Head of Deptt. Of History, NEHU. Shillong. September 23.1993 tariko sing'anina an'tangni knaa aro ma'siako aganne inaha, 'Angade Kalsin aro Sonatchini gimin dakmesokanikode Moskuli songonikosa 1940 Jolonisa knachenga, Pil'e Mrs. Clarish Ch. Momni aro Mrs Ruboli R.Marak. Tura, uamangni ku'ritingrangoi knae inaha, 'Angni Turani Me'chikma sakgnioniko knaani gitaba, sonatchi aro kalsinni golpoko 1920 aro 1930 bilsio gisepgrikosa Turaona Mr. Upen Cheran Mominsa Ra'bachengaha, Uasa Sonatchi aro kalsinni golpokoba Tura Schoolo aganchenga'.⁴

-
1. Trison Daring, Tura, West Garo Hills, Meghalay on 15-9-86.
 2. Itchak N. Sangma, Tangkula, Goalpara, Assam on 10-10-93.
 3. Ramesor Sangma, Moskuli, Goalpara, Assam on 4-9-86.
 4. M.S. Sangma, Dap. of History, MEHU. Shillong on 23.9.93.

Bupen Ch. Momin, 1918 bilsio Mr. Stephen Minggipa Missionary saksani bi'sako rodile Goalpara Schoolo poraiachim. Mr. Stepen Missionary 1919 bilsio Dacca jilaona transfer ong'angaha. Bhupen Ch. Momin, Derek songoni ong'a aro ua Baksalpara songoniko jikkim debara, Bupen ch. Momin, Kalsin aro sonatchini golpoko Bengali oikor A'chik ku'sikchi sechengaha. Bupen Ch. Momin. Goalpara songo dikdiksa Garo teacherba ka'angachim. Uni ja'mano ua Turaona 1927 Bilsil jolrango re'baha. 5

Kalsin aro Sonatchini golpoko, Reddin M. Momin. jean wadanang L.P. Schoolo teacher ka'achim seangaha ine Ma Florence B. sangma 28.4. tariko sing'anina aganchakaha. Reddin M. Mominni seangimin golpoko pa Grimchi ch. Marak, chaware, 1972 bilsiosa nipiltaie aro seanirango namdapate chapa ka'ataha. Reddin Momin an'tangan Kalsin aro Sonatchini brigipa chappa Ka'atgipa, A'bachenganio ia kattarango seaha, "Dingtangdingtang jolrango sonatchini golporango agananirang gnan. Indiba, ia ki'tap seaniranga a'bachenggipa aro ehong'motgipa katta ong'a. Neng'be'e sanditaesa ia chu'gimik seaniko chu'sokatna man'aha. Reddin M. Mominni neng'be'e sanditaie sec donangipa katta bichongranga chong'mot golpo ong'bebenaba donga, maina jolni aro gittimni kri ja'mano ja'wilo dakmesokanirango segattaitaigiparange an'tangtangni nangnikani gita setaitaiaha aro golporango on'dapaha.

Ma. Florence B. sangma 28.4.94 tariko sing'anina aganchake aganaha, Redin M. Momin, Dambora songo atchia, Ma'gri pagri brange dongakosa, Mr. W.H. Dring. Missionary. Turaona poraiatna rimbaha. Redin M. Momin Class sevenonasan Bengali medium schoolo poraia, Ua wa'danang L.P. Schoolo teacher Ka'chengaha. 6

Redin M. Momin, Amjonga songoniko jikgipa ra'a aro uno dongmittingo sastro skina songrangchi wenroroa, Apa Reddin Momin an'tangan Kalsin aro Sonatchini golpoko Bengali oikorchich seachim indiba golporang A'chikni dakbewalrang ong'a. Reddin Mrenda Momin, January 7. 1959 (Bristibar) salo siangaha. 7

Gojendro M. Momin, Moskuli, Goalpara, Assam, 20.2.94 tariko sing'anina aganchakaha, Kalsin aro Sonaatchini golpokode, Bupen Cheran Mominsa sechengaha, Maina anga an'tangan Me'apa chagitchamrangni aganna kattarangko knarika. 8

Gunendro Dage sangma, Moskuli songni, 20.8.81 bilsio sing'anina saki on'e inaha, Sonatchi aro Kalsin badiaba mandeni chong'mot Janggi tangani ong'ja indiba golposa ine anga an'tangde chanchia. Sonatchi aro Kalsinni dakmesokaniko, pa Gojendro M. Momin, bilsil 1956-57-o Moskuli songosa sechengaha. A'bachengo sechenggipa golponni oikorde Bengali oikor ong'a indiba plakan A'chikni dakbewal. Unonikosa pe'skae A'chik ku'sikkona Roman oikorchich segatoroskaenga. Kalsin aro Sonatchini songdonggipa A'song chigade Derek ba Dalek a'song jolo ong'na nanga. Mr. Bupen Ch. Momin Derek songoni, uni seakosa chingade man'bara. Uko G.D. Walker saheb Turaona. 1927 bilsil jolo Teacher ka'na rimangaha. 9

Mr. Lwellyn R. Marak, Tura, 12.5.96 tariko sing'anina saki on'e aganaha, 'pa Upendro

5. Mrs Florence B. Sangma, Tura on 28.4.94.

6. Mrs. Florence B. Sangma, Tura on 28.4.94.

7. Ibid.

8. Shri Gojendro M. Momin Moskuli, Goalpara, Assam on 20.2.94

9. Shri Gunendro D. sangma, Moskuli, Goalpara, Assam on 20.8.81

Cheran Momin Turaona 1920-21 bilsirango re'bara. Ua Shillongo Apa sagimang baksa 1916 bilsirango poraiaha. Sonatchi aro Kalsinni golpocode Upendro Mominsa sea. Uni seakosa pa Reddin M. Mominde namdapate setaia. 10

Shri wilson K. Marak. Tura, 13.05.96 tariko sing'anina saki on'e aganne donangaha, 'kalsin aro Sonatchini golpocode Upen Cheran Mominsa seaha. Uni segiminkosa Reddin Mrenda Mominde namdapate setaiaha. Kalsin aro sonatchini golpode mande chong'motan indiba Upen Momin bimungranko mingjeenba seaha. Anga an'tangni chanchia gitade Upen Ch. Momin an'tangni janggi tanganikon sea ine chanchia. Skangode bengali oikorchisa sea da'o gita Roman script ong'ja. Roman scriptkode angni poraimittingosa a'bachenge ra'gata. Roman Scriptoniko bengali scriptona segataina Mr. Jimmy Sangma (Ranger) aro Mr. Saw saheb mang jotton ka'beaha indiba Mr. H.W. Harding krengha aro cheaha. A'bachengo Roman oikorchisa sena Baptist toromko ra'giparangnasa on'aichim indiba ja'mano Mr. Jobang D. Marak, an'tangan Catholic toromko ra'e Roman scriptchi sena a'bachengaha aro uamangba seaha. Upen Ch. Momin, Derek songoni ong'a aro jikgipade Amjonganiko ra'a. Ua dikdiksa Goalpara H.E. Schoolo vernacular teacher ka'a. 11

Shri Bronson Wa'tre Momin, Tura, 13.5.96 tariko sing'sandianina agane on'aha, 'Shri Upen Cheran Momin, Turo bilsa 1921-22 mango poraia. Mr. Upen Ch. Mominni Jikgipakode Nire B. Sangma, minga. Mr. Redin Mrenda Momin, a'bachengo Tura Book roomo kam ka'a. angade sonatchi aro kalsinni golpocode sawa sea ma'sija. Indiba, Bibleko A'chik ku'sikona pe'giparange Rev. Tangkan, Rev. Modhunath aro Dr. M.C Mason ong'a. 12

Dr. M.S. Sangmani segipa ki'tap, 'History of Garo Literature' 1983. page 21 indi ine seaha, 'Roman oikorchisa A'chik ku'sikko sena gita 1892-1902 bilsioni a'bachengenchim ong'oba, tangka paisarangni bidingo neng'nikanirang dongkuengani gimin, ki'taprangko Bengali oikorrangchi sena 1911 bilsiona kingking jakkalkur'aha. Bilsa 1911-ni ja'manode Roman oikorchisa A'chik ku'sikko seskaha. 1847 bilsio Goalpara towno kuligipa Schoolo Bengali ku'sikchisa skichengaha, jeon A'chik bi'sarangko skulchi re'china didianiko on'aha. 13

Tura Baptist Missionko, 1878 bilsio Goalparaoniko Turaona jittangaha. 14

Sing'anina manderangni saki on'e agananirangko sandirike niode, Mr Bhupen ba Upendro Ch. Momin, Kalsin aro sonatchini golpoko sechengna nanga. Mr. Upen Ch. Momin, Pa Trison Daringni aganani gita, Haluaghat oxford Anglican Church Missiono poraia. Haluaghat oxford Anglican Church Missiono M.E. aro H.E. Schoolrangba donga. Iano poraimittingosa pa Upen Momin Bengali golporangko poraie ma'sie A'chikni bewal aro dakbewalo ra'skae pe'skae seskana nanga ong'jaode apsan golpoko ja'rike A'chikni dakbewalo Seskara gita nika. Unomitting somoio A'chik poraigiparang, toromana namen gisik nanggiparang ong'ani gimin, manderangna toromko nokdango skidapna niuksonge jatni dakbewalo golpoko seaha. Mr. Itchak N. Sangma, Tangkula

10. Shri Lwellyn R. Marak. TURA. on 12.5.96.

11. Shri Wilson K. Marak. Tura, on 13.5.96.

12. Shri Bronson W. Momin. Tura. on 13.5.96.

13. M.S. Sangma. 'History of Garo Literature', 1983. page-21.

14. Carey. M. "Garo Jungle Book" page-78-95.

songni aganani gitade, 1937 bilsion Goalparachi re'ango Bengali ku'sikchi segimin Kalsin aro Sonatchini golpoko man'baha. Uamang, pa Nogen sangmani, 1937 bilsio Bengali ku'sikchi segipa oikorko A'chik ku'sikona pe'skae sechenggipa Sonatchi aro Kalsinni dakmesokaniko ra'e Penchimari aro Rongchipatpara songrango dakmesokna a'bachengaha.

Kalsin aro Sonatchini golpoko Bengali oikorchsi skangon seako bang'an nikmanaha, jekai Itchak N. Sangma, Ramesor K. sangma aro gipinrang. Upendro ch. Momin. Kalsin aro Sonatchini golpoko seangchenggenchim ong'oba, Bengali oikorchisa seangna nanga. Unonikosa, Reddin M. Momin, man'baskae kattarangko namdapate, A'chik ku'sikona Roman oikorchsi ja'mano seskaha. Reddin Mominni seanirangko nirike niode, A'gilsak gimikni gnigipa dakgrikani ja'manosa sena nanga maina Sonatchini pagipa Jorong Naga hillsso Hav. Military Police kam ka'a . Sing'jike nie me'aparangni agan ku'ritingrangoni gitaba, Upen Ch. Momin Goalpara townso skanggipa A'chik poraigiparangoni saksa ong'a. ia plak ong'a obostarango chanchiate nioba, Redin M. Momin, jatni sea jotanina gisik nanggipa saksa ong'a aro ua uandaken neng'be'e sanditaienba A'chik ku'sikona Roman oikorchsi see donangaha. Redin M. Momin an'tangan skigipa ong'e, Sonatchi aro Kalsinni golpo A'chik bi'sarangna maiba toromni aro songsalni bidingo skidapani donggen ine nike, name setaie donangaha.

Songo noko donggipa, Salgro jolni A'chikrang, je a'dokon Kalsin aro sonatchini golpoko knachengahachim, an'tangtangni manderangna jatni bewal aro dakbewalrangko dakmesokna, dakmesokani bimango 1937-38 bilsirangoni intalan dakmesokani bimango ong'baha.

kalsin aro sonatchini dakmesokanirang jatni gisepo gimaku'jaenga, indiba iandakgipa jatni dakmesokanirangko dakmesokna cholrang ong'pagijanio galchipe donna nangaon ga'akaha. A'chik a'songranganoba, Cinema, T.V. ba uandakgiparang sokba'anichi jatni gisepo dakmesokanirang 1980 jolrangoni intalan dongangjaha.

CHATCHI ARO MA'CHONG

Sonatchi aro kalsin darang mandeniba chong'mot janggi tangani katta ong'jaani gimin, uamangni chatchi aro ma'chongrangkoba an'tangni nangnika aro ska gita bang'an agantokaia. Sonatchi aro Kalsinni dakmesokaniko dakdiligipa plakan an'tangtangna kraa chatchi aro ma'chongko de'e agananirang gnang. Uamangni kakket chatchi aro ma'chongko sing'sandiani bidingo, bang'a manderangni iandake saki on'e agananirang gnang. Pa Itchak Nong'bak (Areng) sangma, Tangkula songni, 18.10.93 tariko sing'anina aganchake inaha, sonatchi snal sangma aro Kalsin Gabil Momin' ong'a 15. Ramesor K. Sangma, Moskuli songni, Goalpara, Assam, 4.9.96 tariko sing'sandianina aganaha, Sonatchi snal Sangma aro Kalsin Gabil Momin' ong'a. 16 pil'e Gojendro Megam Momin, Moskuli, Goalpara, Assam, 20.294 tariko sing'sakiko on'e aganaha, Sonatchi Snal Sangma aro kalsin Gabil Momin' ong'a. 17

Pil'e pa wilson K. Marak, Tura, 12.5.96 tariko sing'sandianina aganchake inaha; sonatchi

-
15. Shri Itchak sangma, Tangkula, Goalpara Assam, on 18.10.93.
 16. Shri Ramesor K. Momin Sangma, Moskuli, Goalpara, Assam on 4.9.86.
 17. Gojendro M. Momin, Moskuli, goalpara, Assam 20.2.94.

aro Kalsinni golpode Upen Momin an'tangni janggi tanganiko seani gimin, Sonatchi Bangbong Sangma aro Kalsin Cheran Momin ong'a. ¹⁸ Redin Monin, 'Khalsin aro sonatchi', 1983 ki'tapo seanirangko nigenchom ong'ode Sonatchi Sangma aro Kalsin Momin inesan nikna man'aia. Kalsin aro Sonatchini chatchiko seana agrede ma'chonggko maming janapa dongja. ¹⁹ Indiba, pa Bitchon K. Momin, Rajasimla-Konchikol song, E.Garo Hills, jean Serejing aro Waljanni dakmesokaniko dakdiligiparangoni saksa ong'achim, sing'sandianina 20.12.'80 bilsio indi ine aganaha, 'sonatchi B. sangma (Bangbong) aro Kalsin Gabil Momin' ong'a ine sakiko on'aha. ²⁰

Uandake Kalsin aro Sonatchini chatchi ma'chongni gimin manderangni dingtangdingtang agananirang gnanng. Haida Kalsin aro sonatchini golpo chong'mot janggi tangani ong'jaani a'selan uamangni dakmesokaniko dakdiligipa plakan an'tangtangni namnika gita uamangni chatchi aro ma'chongko dingtangdingtang setokaia. Indiba, Kalsinni chatchi aro ma'chongko plakan apsan seaniko nikna man'a. sonatchi chatchi sangma ong'oba, ma'chongko dingtangdingtang dakdillenggipa manderango pangchake biapni aro jolni kri jatska mandeskana mikgil kratcha'e dingtangdingtang on'a gita nika: Kalsin aro Sonatchi chong'mot manderangni janggi tangani ong'a ine chong'mot sakirang dongja aro badiaba nokdangni chong'motgipa janggi tanganikoba sejaani gimin, uamangna chatchi ma'chongkoan chong'mot ine aganna aro saki on'a man'jawa.

Sonatchi aro Kalsinni chatchi aro Ma'chongrangni gimin bang'a manderango sing'jike aro sing'sandie nianio, Sonatchi aro Kalsinni chatchi aro ma'chongko pa Upen Cheran Momin, Sonatchi Bangbong Sangma aro Kalsin Gabil Momin ine sakiko on'anio ma'sina man'a. Indiba, Sonatchi aro Kalsinni golpoarang mandeni janggi tanganikoba miksongja, manderangna songsalo aro toromo janggi tangani bidingo skidape on'angna aro namgipa christian nokdangko rikanio mesokangnasa golpoko segiparang seaha.

A'SONG CHIGA.

Kalsin aro Sonatchini katta Bichong ong'baani gimin, uamangni songdong a'chagipa chiga chiringgipa, biap bichamrango bang'a manderangan Salgro jolo inesan jaksi ote mesokaia indiba songni aro biapni gimin aganna man'ja. Reddin Momin, 'Khalsin aro Sonatchi', 1983, uni segipa ki'tapo uamangni a'song chigani giminde mamingba janapani dongja. Bon'kame Sonatchi aro Kalsinni a'songtangona re'bapiloba, badia songona re'bapila mamungkoba janapani dongja.²¹

A'chik me'aparang jensalo sing'sandion Kalsin aro Sonatchini a'song chigako dingtangdingtang dake agananirang gnanng. Gojendro M. Monnin, sinng'aniina 20.2.94 tariko, 'Kalsin aro Sonatchini a'song chigako Derek ba Dalek a'songko jaksi ote aganna. ²² Ma Florence B. Sangma, Tura, 28.4.94bilsio sing'anina, 'Amjonga a'song' ine janape on'skaha. ²³ Plak gipin Kalsin aro Sonatchini dakmesokaniko dakdiligiparangba uamangni a'song chigarangkode janapa dongja. Wilson K.

18. Wilson K. Marak, Tura, W. Garo Hills on 12.5.96.

19. Reddin Monin, 'Khalsin aro Sonatchi', 1983.

20. Bitchon K. Monin, Konchikol, E. Garo Hills, on 20.12.80.

21. Reddin Momin 'Khalsin aro sonatchi', 1983.

22. Gojendro M. Momin. Moskuli, Goalpara, Assam on 20.2.94.

23. Mrs. Florence B. Sangma, Tura, on 28.4.94.

Marak, Tura, 12.5.96 sing'anina aganne inaha, Upen Cheran Momin an'tangan Derek a'song joloni ong'ani gimin aro an'tangni janggi tanganiko segenchim ong'ode Derek a'songan ong'na nanga ine sakiko on'aha. Upen an'tangde Baksalpara songoniko jikkim debara. 24

Reddin Mrenda Momin, Dambora(Mangsang-ronga Agal) a'songo atchia aro Amjonga a'songoniko ma Jeni Bangbong Sangma, jekon Miss E.C. Bon Turaona poraiatna rimbara, uko Turaongmittingo bia ka'a. 25. Uamangni jikkim debae songdonggipa a'song chigarangko aro atchichakgipa a'dokrangko chanchiate niode, ki'tapo segipa plak bewal dakbewalrangan A'we ba Salgro jolni bewalrang gita nika maina gipin jatni bewalrangba on'tisa banoba banoba dongchapanga.

kalsin aro Sonatchini golpoko seangchenggipa Upen Cheran Momin, an'tangni seanggipa ki'tapo, uamangni a'song aro chigako janapanga dongjaani gimin da'o ia chasongo, ua songan inede jaksi ote aganna man'jawaha. Haida, Upennii a'song chigako janapanggijani ja'pangde, Bengali golpoonikosa A'chikni bewal aro dakbewalrangona ra'e seskaani gimin a'song aro chigako on'e sena jajaani ong'naba donga. Uni giminsa ua janapangjahakon. Indiba, bang'bata manderangni aganani gitande, Derek a'song jolan ong'naba dongakon.

SONATCHI SUL.

A'chik jatni gisepo ring'ring'ani sulrang rokomari ngang. A'chikrang ua ring'ani sulrangko biap, kam aro obostarangni kri pangnan ring'ronga A'chik me'apa chagitchamrang, uamangni churing chupekao, katta gro pe'ao, Doro ra'e, Kore doke, direng sole, Gonda doka, Ajea, Dame ring'a, serejing sala, Boel sala aro uandakgipa rokomari ring'anirangchi kusi ong'e roronga, landakgipa rokomari jatni gisepo ring'bewalrang dongani gimin aro jakkalbaani gimin badia sul skang, badia sul ja'man ukode namedake aganna man'ja. Jatni gisepo ring'anirang ka'sine ka'sine namroro silrorobaanichi Serejing aro Boel sulrang da'o ia an'chingni chasongo ong'baaha.

Sonatchi aro Kalsinni dakmesokanirangko dakdilgiparang bang'batan Sonatchini sulko BOEL. sulchi sale ring'bata. Sonatchi sul salani, Serejing ring'ani sul ba Boel salani sulrang baksa apsan somoirangon jatni gisepo nakata. Ua chasongrango, A'chik ma'gipa Pagiparang, jemangan toromna gisik nanganirang nokdango dongachim, uamang an'tangtangni detangtangko Sonatchi aro Kalsinni dakmesokanirangko nina watja, maina ia boel sale ring'e dakmesokanirangko nigenchim ong'ode gisik branganirang aro namgijana ja'ku de'anirang ong'kata ine chanchia aro aganronga. Uandake, A'gilsak gimikni dagrikani ja'mano, 1950 bilsirangni ja'mano jatni gisepo dakmesokanirangko dake dakmesokna gisik nanggiparang donggenchim ong'oba, rokomari jatni gisepo sin'jetanirang dongani gimin bang'an dakdilgija galchipaha. A'chik me'apa, Me'chikmarangni Serejing. Aro Waljan, sonatchi aro Kalsin iamangni dakmesokanirangko nina on'gijaniara toromnibidingo maiba re'sretanirang donggen ine nikaha maina ia dakmesokanirangko nigipa pante, Me'trarang, Me'chikma, Me'aparangni gisepo bang'a golmal ong'anirang ong'katronga.

A'chik jatni gisepo rokomari ring'anirang aro sulrang donggenchim ong'oba, ia ring'ani

24. Wilson K. Marak, Tura, on 12.5.96.

25. Florence B. Sangma, Tura, on 28.4.98.

sulrangko mai bilsirango mai sulrangko ring'achim, uko ka'mano mesokatenga.

: C

BOEL SUL (1960)

Ni - - to - - gi - - pa Pul - - ba - - gan - 0

bal - - eng - - gipa pul - - rang, Git - - - 'chak rim - -

-it ni - - to - - riri ma' - - diu - - eng - - gipa - -

ran - ng; Chel' - - - a - - O - - de man' - - gen gi - - ta

ni - - ka nang - - - ko rim' - - na, Re' - - - ang - - o -

de bil - - e ka - - ta, ken - - - e ang' ja - -

gring - - - na.

BON'CHOTE AGANNANI.

Kalsin aro Sonatchini golponi gimin adita u'igipa ma'sigipa me'aparango sing'sandianina saki on'e aganaha. Uan saoba mandeni chong'mot janggi tangani ong'ja indiba manderangna unomitting somoio nama christian janggi tangna skidapaniko on'a gita seaha. Indiba, pil'e mittam me'aparang Upendro Ch. Momin, an'tangni janggi tanganiko seaha ineba agana. Iarang kakket ong'ama ong'ja, aganna man'ja maina Upendro Ch. Momini janggi tanganiko darangba namedake ma'sijaode tosusana man'jawa.

Kalsin aro sonatchini golpoko Redin Mrenda Momin Sechengjaha ine bang'an sakiko on'aha. Ian kakket ong'akon ine chanchiatna man'gen. Reddin M. Momin an'tangni segipa ki'tap, 'Kalsin aro Sonatchi,'1983, golpo gimikkan gnigipa dakgrikani somoio sena nangga maina uni golpo dakgrikani somoi baksa apsananga jekai Jorong Hav. Military police Naga Hillso kam Ka'a. Aro uandaken gipin kam kattarangba apsananga.

Trison S. Daringni aganna gita Upen Cheran Momin, Haluaghat Bengali Medium Oxford Sukulo poraia. Itchak N. Sangma, Goalparachi re'ango 1936 bilsio Bengali oikorchu segipa Kalsin aro Sonatchini ki'tapko man'e pe'skaha. Ua 1937-38 bilsio penchimari aro Rongchi patpara, Goalpara, Assam, songrango Kalsin aro sonatchini dakmesokaniko dakdilchengaha. Ramessor K. sangma, Moskuli songni songni, 1942-43 bilsio Goalparao poraimittingo Upen Ch. Mominni jakoniko sonatchi aro Kalsinni gimin poetry dake segipa diaryko man'baha. Ua poetry dake segipa diarykoba, jean Bengali oikorchu seachim, ja'mano gimaataiaha ine aganaha. Dr. M. S. Sangma. 1940 jolo sonatchi aro Kalsinni dakmesokaniko Moskuli songoniko knachengaha. Upen Ch. Momin bilsio 1920 aro 1930 gisepgriko Turaona kalsin aro Sonatchini kattako a'bachenge skulrango golpo aganchengaha ine aganaha.

Upen Ch. Momin, 1915-16 bilsirango shillongo, 1918 bilsirango Goalparao aro 1921-22 bilsirango Turao poraiaha. Pil'e G.D. Walker, 1927 bilsimango Turaona teacher kam ka'atna rimbaha ine Ramessor K. sangma aro gipinrang saki on'e aganaha. Upen ch. Momin-in poraiani aro kam ka'anirangko namedake aganna man'ja aro dingtangdingtang bilsirangko agananio, Sonatchi aro Kalsinni golpoko mai bilsio seenggenchim namedake aganna man'ja. Haluaghat Mission skulo poraimittingo seama ba Goalpara skulrango poraimittingosama ba Turao dongmittingosama name ma'sina man'ja.

Ma Florence B. Sangma aro Ma JoanLana B. Sangma, Tura, 28.4.94 tariko sing'anina Reddin Mrenda Momin an'tangan ia sonatchi aro Kalsinni golpokode seaha ine aganchakaha. Indiba, Sonatchi aro Kalsinni katta bichongko u'igipa ma'sigipa plak me'apa, me'chikma, skia poraia man'gipa A'chikrang plakan Upendro Cheran Mominsa sechengaha ine jaksi ote aganskaaniko an'ching nikna man'a.

Sonatchi aro Kalsinni a'bachenganiko sandirikite man'a gita ia golpo Upendro Ch. Mominni poraimitting sal somoirangon a'bachengaha. Upendro Momin badia Ki'taponiko ba badia janggi tanganini gimin seahachim darangba namedake aganna man'jaha. Uni Bengali oikorchu segipa ki'tapko man'kuode aganna man'aba dongachim.

Redin Mrenda Mominni poraina a'bachenganirang, Upen Ch. Mominna bate ja'man chaka gita nika. Uko W.H. Dring Missionary mai bilsio Turaona poraiatna rimbaenggenchim aganna man'ja indiba namen ja'man chaka ine chanchiate niatna man'gen. Reddin Momin songo noko dongmittingoba (Amjonga songo) toromko skiprakna songrangchi re'roroa ine aganna. Uni uandake re'roromitting sal somoirango ba Turao dongmittingo, Upendro Ch. Mominni Bengali oikorchi poetry dake segipa Kalsin aro Sonatchini golpo ki'tapko man'e ripinge donne, da'o chappa ka'aha. Redin M. Momin, an'tangan bidana aro toromna gisik nanggipa A'chik panterangoni saks a ong'ani gimin ia ki'tap A'chik bi'sarangna maiba skidapani ong'naba donga ine nike, uni poetryni bimango segipako setale aro namdapate donangaha.

Uni uandake skia poraianiko, gisikni seng'aniko aro janggi tanganio skie ra'ani cholrangko ripinge donangna gisik nanganiko kamchi mesokaha. Uni gisik nange, ripinge sarie aro chanchibewale see donangjagenchim ong'ode iandakgipa gamchatbegipa seanirang indin a'kin cha'e gimaaingnokchim. Reddin M. Momin aro Sonatchi Kalsinni golpoko an'tang sechengjagenchim ong'oba, jatna ka'sae apsan katta bichongo pangchake seangaha je kamnan mitelna kraa. Reddin Momin bon'chotao ia kattarangko seangaha,

"Branggipa bisaoba, mande saks a ong'jok,

Kakket aro bebeo ua plakkon amtokjok.

Bebe dagkipanade Isolba patia,

Dukko chakgipanasa Isol Ka'sachaka".

A'chik jatni sea jotanirang maikai mikkang sal somoirangchi bariroroani ong'gen, iandakgipa jatni namnambegipa dakmesokanirang, golporang, bewal aro dakbewalrang, ring'ani sulrang aro aganrittingbaanirang jatni gisepo gimajawa ripinge donangna jotton ka'paode namgen. Jatni gisepo iandakgipa namnambegipa aganrittingbaanirang da'o ia chasong dambe ringsong gitalo, skie aro ma'sie ra'rikna gisik nanggijanio gimaangengaha. Iandakgipa ringring'anirang, chrok mesaanirang, doka dam'anirang aro plak changa sapanirangba ma'gitcham pagitcham chagitchamrangni bon'anga baksa apsan bon'angengaha, uarangko da'o an'ching chol ong'mittingon skie ra'rikna aro chasongni chasongna ja'chong jatni gisepo donangrikrikna, Somoi an'chingna namen gamchatbegipa ong'enga. Atchu Ambini, Bitchi Budeni somoirang re'angengaha, am'oba ja'mano man'taijawaha.

Julius. L. R. Marak.



Students of Shillong in 1916


- Left to Right -**
- 1. Upendro Cheran Momin**
 - 2. Sengmin N. Sangma**
 - 3. Kandura W. Momin**
 - 4. Narayan R. Marak**
 - 5. Henry W. Momin**

BAK RA·GIPARANG


- | | |
|----------------------------|---------------------------|
| 1. KALSIN | - NORANINI DEPANTE. |
| 2. NORANI | - KALSIN MA·GIPA. |
| 3. LOKKI | - KALSIN NOGIPA. |
| 4. NOBARI | - KALSIN MA·DETANG. |
| 5. SONATCHI SOIBALI | - PROBALIN DEMECHIK. |
| 6. PROBALIN | - SONATCHI MA·GIPA. |
| 7. JORONG | - SONATCHI PAGIPA. |
| 8. ARENDRO | - SONATCHI ADATANG. |
| 9. DINESH | - SOMBARI DEPANTE. |
| 10. SOMBARI | - DINESH MA·GIPA. |
| 11. RIPOLI | - DINESHKO ALDUGIPA. |
| 12. INCHOK | - LOKKI RIPENGTANG. |
| 13. TOCHENG | - INCHOK PAGIPA. |
| 14. JOENDRO | - JORONGNI GRITANG. |
| 15. JONGBIN | - JOENDRO PAGIPA. |
| 16. MALSIN | - JOENDRONI GRITANG. |
| 17. CHEMIN | - SONATCHI MAMATANG. |
| 18. RUKMINI | - REVEREND DEMECHIK. |
| 19. REVEREND | - SONATCHIKO NOKCHAKGIPA. |
| 20. UKGIL | - KALSINKO NOKCHAKGIPA. |
| 21. SUSILLA | - UKIL DEMECHIK. |
| 22. SOINASI ARO GIPINRANG. | |

Key-F.


SONATCHI SUL (1960)




Ang -- ni chang - sa gu -- a -- la -- ko




na' -- a ke - ma ka' -- bo.



Ja' -- o - ri -- me ke -- ma bi' -- a




da' -- o anga nang' -- o.



Nang' -- ni si -- ka je -- da -- ke -- ba na' -- a



ang - - ko dak - - bo. In - - di - - o - - ba



chi - - ti - - ko - - de ang - - na on' - - at - - pil - - bo.

Salam

Salam angni ma'a paarang, pilak ripengrangko,
Kema bi'a a'bachengo, anga na'simango.
Sonatchini itihasko, chong'mot mesokatgen,
Angni sea badiabao, gualani donggen.
Sonatchini itihasje, nambatgipa bibal,
Manderanga agganenga, nama uni kopai.
Ia dakmesokaniko anga, see donangenga,
Kanal na'mang katta chong'not, ma'sirikchinasa.
Kalsin aro sonatchi ne. minga uamangko,
Jorong Chemin ine minga. songni me'apako.
Mesokatna changpajaoba, jatni dakbewalko,
Nie ma'sirikpachina, atchun ambin kamko.
Ia pilak kamrangara, skang chasongnisa,
Nangijako gale an'ching, namako ja'rikna.
Chu'chon sena changpajaoba, uamangni kamko,
Kalsin aro sonatchini, chong'mot itihasko.
Sonatchini itihasko, bang'an ma'sitoka.
Skang chasong manderangni, kattasa ong'bata,
Seaniko ong'nikjaoba, poraiede nibo.
Gualani donggenode, angna ma'siatbo.
Kalsin aro sonatchini, kamko mesokgnok,
A'sel chong'mot banonichim, sandiriktokbojok.

DAKMESOKANI-I

* * *

MESOKANI - I

KALSINNI PAGIPA SIA

- Kalsin pagipa. - Ka'sara jikgipa aro dedrang. Anga na'simangko wate re'ani sal sokaha. Anga ia a'gilsako rona skugenchim ong'oba angna somoi dongjaha. Uni gimin na'simang name tom'tome aro ka'sagrike dongbo. Chi.... chi.... chi.... (sia)
- Norani
(Kalsin
Ma'gipa) - Ang' Se ratcha maia ong' jok, ku'rang ku'sa on'kubo, mikgron mikkimitnabe, nichaobo. Dukan matchotjawajok, saksan birangrikainok, jawa chonnikrikainok. Nang'ni ka'saa dedrangko wate re'angbebejok. Bika a'dram be'ainok, be'ari dongainok, sintie do'pilgmari siainok. Mikchi chiwaringari angade, akkal do'budokari chon'ainok. Dede sona nang'pade, wate kattangbebejok, Mikgron mikchi tipgija, birangrikna nangainok.
- Kalsin - Apa na'ra maia ong'jok, anga ma'sijaha, Nang'ni dongjagenchimode, dukkan chotchangjaha.
- Norani - Dede sona nang'padeni, chingko watangaijok, Mikgron mikchi ong'arisa, an'ching dongrikainok.
- kalsin - Ama na'a duk man'oba, chingko chanchipabo, A'sak dukko man'genoba, gisik ka'dimebo.

MESOKANI - II

KALSIN MA'GIPA SIA

(Siangaha Kalsinpade, da'nang saako man'e,
Sintienga Kalsinmangde, salantian chanchie.
Se me'mangna kal'imenba. ong'jok jari gokgi,
Dongpaenga skimari, him him takkimari.
Chanchienga ma'gipade, sian nambatsranggen,
A'gilsako dongan palde, dedrangna chanchien.
Bilsisani ja'mano'on, Kalsin ma'gipaba,
Siangaha dukko man'e, saa bilongenba.
Ma'gipani siangode, Kalsin adasade,
Rama gong'rakbrekujana, nogipa Lokide.

Kalsinbani chonkuenga, chanchinan changkuja,
 Adasasan brangrikenba, sarao grapenga.
 Uko nike ka'sachake, da'nang mamatangsa,
 Rimangenba doneaha, ma'detang nokchina.
 Kalsin aro Lokkikoa, wanggipa mol'mole,
 Rimangaha Ka'sariri, agan mesokange.
 Ma'detang wanggipaba, dea sa'a dongpaja,
 Aldu mittangpa'na da'nang, darangba dongpaja.
 Do'ra do'sichengaonin, demikkang nikpajae,
 Donangaha chratangrang, siat mikkimit-ne)

Norani
 (ma'gipa)

- Ka'saa dede na'simangko, anga wate re'nok,
 A'gilsako dongpaku'na, angna chol dongjajok.
 Ka'sabea angni dedrang, ka'saon dongriktokbo,
 Na'mang ka'sae dongrikachi, chingko gisik ra'bo.
 (janggi gala)

Kalsin

- Ama chingko watangjokma, ku'sa ku'rang on'bo,
 Chingni dukko man'aoniko, ka'dimeatku'bo.
 Ama chingko birangchina, na'a donangjokma?
 Mandeska chonikari, dongnok a'gilsakma.
 Rasonggiri adasako, sawa nirokku'gen,
 Ku'sa gimin cha'pana'an, mikchi ong'na nanggen.

Lokki

- Nang'ni ja'man brangrikchina, ama junomjokma?
 Sintie do'pilgimchinasa, na'a watangjokma.
 Ma'de ma'jong dongpajajok, sani nokko cha'gen,
 A'gilsako brangesa, salko re'ataigen.

Nobari

- Abi na'ade da'o angko, saksan galangaijok,
 Noa Abi dongpaja ne, gipin chonnikainok.
 Nang'ni nono Nobaride, sao pangchakku'gen,
 Soka nangan salobani, sano ka'dongku'gen.

Kalsin

- Ai na'a tangchafil'bo, chingna ku'rang on'bo,
 Ku'rang ku' sa on'angachi, chingko mikrakatbo.
 (Gopna ra'anga -
 Kalsin aro Lokki adasa sarao grapa aro mamatang rimea)

Kalsin

- Nono an'ching ma'a paade, da'o siangaha,
 An'chingkode brangchina, Umang donangaha.
 Nono da'o an'chingara, bachi birangnok,
 Sani noko nokkol nape, migimin man'panok.

Lokki

- Dada na'a jechi re'a, uchin birangaigen,

Nang'ni jeo nokkol napa, unon dongpaaigen.
 Apa Isol ka'sagipa, chingko niropka'bo,
 Chingni dukni saloniko, chingko chelchakpa'bo.

- Mamatang** - Ka'saa ang'gri Kalsin aro namchik Lokki,
 nang'ni ma'gipa siang bon'angoba, anga nang'ni
 mamatang dongenga. Anga na'simangko brange dongna
 on' jawa. Uni gimin hai da'on, nang'ni ma'detang
 Nobarini nokchina re'bo. Ua na'simangko nirokgen
 aro dakchakgen. Maiba dukni dongode, angna u'iataibo.
- Lokki** - Mama chingade ia nokonin re'jawa. Intango Ai
 re'baode chingko sandiegen. Noko wate chinga
 re'angjawa, mama.
- Mamatang** - Namchik Lokki, nang'ma siangjok, re'bajawaha.
 Na'simangko niroknakgipa na'simangni ma'detang
 Nobari dongenga, uan na'simangni ma'chongmot ong'a.
 Hai re'bo. (rimanga.....)

MESOKNI - III

SONATCHI ARO MA'GIPA - KALSIN SARA ROANGA.

- Probalin** - Bijak song'atjokma ai Sonatchi? Saoba sajani
 soka naaona, mi bijakrangkode sandie donboda.
 Song'na ritna changjaoba, mandemangmangkode
 ra'sopabo.
- Sonatchi** - Bijak me'suan dongja, maikon song'gen, Mandeska
 sokba nabaoba, bijak me'su dongjaana kratcha'a
 angade. Song'na channa nangakode da'sin matchotaha.
 Manimangni me'sukosa ake song'ataiaha. Manimangonade
 da'alde Kalsin aro Lokki adasako mamatang rimbac
 doneengana. Attamo grongena nangen, ama.
- Probalin** - Re'angbo, indiba ta'rake aro seng'gnang re'bapilbo.
- Sonatchi** - Attam, dikdiksa re'ange gronge re'bapilaigenba
 Anga ru'ute robajawa. Kalsina, an'ching songon
 dongaignokna (Re'anga)
- (Kalsinko gronge) Oh, Awang Kalsin, hai salam. Basako Sokbara?
- Kalsin** - Chinga da'si salon seng'gnang sal dongengon sokbajok.
 Na'simanga namtokpa'engama? Chingade, adasan brange
 ia songon dongaignok aro poraina chol ong'ode poraigen.

- Sonatchi - Rasonggiri gimikkan, maiko dakgen a'sako.
Hajal dukko man'genoba, chu'sokgen changsa'o.
Re'nahane ripeng anga, pangnan grongronggen,
Apsan songo dongahaode, duk suk golpo ka'gen.

MESOKANI - IV SCHOOL KA'NA MELARA

- Songni Nokma - An'ching songoba skul kulina nanggen, jedakode
songni bi'sarang poraina man'gen. Uni gimin
an'ching master saksako nanggen.
- Songni me'apa 1 - Oe, master dongjaode, sawa ka'gen. De master
sanditokbo.
- Songni me'apa 2 - Skulkoara, basakoni a'bachenggen?
- Songni me'apa 3 - Master man'ahaode knal pringonin a'bachengode
namgen, bi'sarang poraigija indin roaiengjok.
- Songni me'apa 4 - Masterkon man'gija aro sandichengija da'on
skul ka'genma?
- Songni Nokma - Skul ka'nasigipa masterkode man'aigen.
- Songni me'apa 1 - Baoni masterko knalo tangitik man'gen.
- Songni Nokma - Skul ka'ana masterkode angni jako donaibo.
Jinma namiktokaha gita nika, uni gimin knalonin
skul a'bachenggnok, bi'sarangko watatokboaha.
- Me'aparang - De namniktokaha. mastersa namna nanga, bi'sarangkode
watatokaigen.

MESOKANI - V SONATCHI TALA NATA, KALSIN MIKKANG RIM'TIPA

(Sonatchini Itihasde, nambatgipa bibal,
Manderangba aganenga, nama uni kopal.
Nambatgipa bibalkosa, akna miksongani,
Kalsin aro Sonatchini, Jik Se ong'grikani
lan skang a'bachenga, Kalsin Sonatchini,
Mikrimtipe bal'ekenba, ka'sagrikchengani,
Bibalarangko tosusaode, Golap nitobata,
A'gilsako manderanga, ukon mingsingbata.)

- Sonatchi - Atchai sawa bal'ekade, angko bakbak watbo,

- Me'asanma me'chikanma, ku'rang on'pakubo.
A'an Matcha chikbo nang'ko, bimang mesokjaode,
Chini Buga ra'bo nang'ko, ku'rang on' jaode.
- Kalsin - Angasawai sona na'ra, ka'o nangbejokma,
Changsamangmang etalanan, na'a duk man'jokma?
Namnikjachongmotgenode, nang'pao aganebo,
Niam gita bichal ka'e, na'a daiko ra'bo.
- Sonatchi - Daiko ra'na ine anga, nang'ko inahama?
Ku'samangmang kattana'an, dukko man'bejokma?
U'igija ku'atana, man'panabe dukko,
Angni changsa gualako, ripeng kema ka'bo.
- Kalsin - Jeba ong'bo ianona, na'a re'bakubo,
Mingsa katta aganku'na, iano asongebo.
Me'trarangni gisepode, na'an nambataia,
Skuloba an'chingsa'an, leka man'bataia,
Jeba ong'bo ripeng da'o, an'ching nokchi re'nok,
Golpotaina knal salo, an'ching re'batainok,
Agantaina ripeng na'a, dukko man'panabe,
Angni changsa gualako, kema ka'pabone.
- Sonatchi - Indakode chame na'ra, angkon namnikjokma?
Mikkang bimang silgijakon, na'ra mikchaengama?
Re'angbojok indakode, ang'ba nokchi re'nok,
Nang'ko niksojana kingking, knal sengsoainok.
- Kalsin - Manderanga mikkangkosa, okkae cha'rongama?
Kam cholon bida buti, gamchatnikpajama?
- Sonatchi - Bada buti dongpajara, maina cholipa'gen,
Tol'a inode nibo na'a, jetok galtokaigen.
- Kalsin - Ripeng da'o salniangjok, an'ching nokchi re'nok,
Changgipino golpotaina, an'ching re'batainok.
Do'orangni gisepode, Do'kuasa Raja.
Etalchin manderangni, gisikko salbata.
Chatrirangni gisepode, na'an nitobata,
Skuloba an'chingsa'an, leka man'bataia.
- Sonatchi - Aiao, ripeng indakode, angnan ka'sajokma,
Mikkang bimang silgijanan, na'a ka'sajokma?
Bidabani ango dongja, maina cholipa'gen,
Mikkang bimang daknangpa'ja, sawa angko ra'gen?

Re'angbojok sona na'a, knal sengsotaigen,
 Nang'ko niksojana kingking, ramao rosoaigen.
 Attam salniku'janaking, na'a roaikande,
 Sala salniangahaosa, na'a re'baikande.

MESOKANI - VI

KALSIN PORAINA RE'ANGA - SONATCHI GRONGRIKA

(Kalsin Momin pantebani, middle matchotpa'jok,
 Sonatchi Sangmabani, Lower jokangpa'jok.
 Wanggipara chanchienga, Goalparao donna,
 Rimangenba donepana, High Schoolona.)

- | | |
|----------|---|
| Kalsin | - Sona na'a dongrikbojok, anga re'chakatna,
Goalpara Skulosa, anga poraipa'na.
Re'nahane ripeang anga, jako rim'e salam,
Bidanasa porainaka, roja anga ramram.
Sokangenba Sona anga, chitti seatgenne,
Dukni sukni kattarangko, ui'atpagenne. |
| Sonatchi | - A'ba bari rakkipa'na, dilneng do'mikenga,
Angko gisik ra'pachina, rumal on'atenga.
Ripeng na'a re'angoba, angko gisik ra'bo,
Dukni sukni salrangoba, chitti seatrongbo. |
| Kalsin | - Ru'utgijan chuti ra'e, songona re'bagen,
Angni plak obostako, knapa'na man'gen. |
| Sonatchi | - Nang'ni chuti re'baode, angchin re'bachengbo,
Mikkang nike Kusi ong'na, na'a re'bapa'bo, |
| Kalsin | - Katta iasa'an sona, nang'na miksongako,
Gualnade man'pajawa, ka'saa ripengtangko.
Dongrikbojok sona na'a, ka'saachi salam,
Matric-ona porainaka, roja anga ramram.
(Kalsin re'anga - Wanggipa rimanga). |
| Sonatchi | - Panterangni gisepode, gisik seng'batpa'ra,
Sakgipinna batkalede, bimang daknangbata.
Mikkang salchi ia pante, gisik seng'a batgen,
Bidana'an bimchipbata, nambatgipa ong'gen.
Mikkang salchi chanchisoe, gisik nanga pante,
Bidanasa miksongbata, Kalsin gisikode, |

MESOKANI - VII

JORONGMA'ANG SONGONI SOBA NINA RE'ANGA-DINESH BRANGA ARO UKO BUCHUMA SAKSA GRONGA

(Dolgoma songoniko, Soba nina ine,
Jorongma'ang gittimoni, nina re'angtoke.
A'chikrangni maniani, dal'batgipa ina,
Dal'a chonna songgimikan, nina re'angenga.
Dinesh Sangma pante da'nang, sobao brangrikjok,
Mande saksa buchumasa, da'nang rimangaijok,
Rimangenba a'songtango, Dineshko palejok,
Mymensingni saksa degri, uko aldupa'jok).

- Dinesh - Ai na' song bachiaha, nang'de nikjaengjok,
Ama nang'ko nikjaode, anga birangainok,
Da'o anga re'dilnaba, ramakon nikjajok,
Ama baksa dongmangijan, anga siaignok,
Sawa angko re'dilatnok, da'o nokchinara,
Angko saksan galangainok, Ama bachi na'ra?
Apa Isol ka'sagipa, angna dakchakpa'bo,
Songtangona sokangsrangle, angko re'dilatbo.
- Sombari - Aiao, gose' ang de ratcha, banoniko man'nok,
Ma'ko nikjae birangesa, ua siaignok.
Anga gose bachiniko, sandie nipagnok,
Me'chik mande sandinaba, anga ma'sijajok.
- Nobari - Achak bima nono na'ra, deko simsakgija,
Dongaijokma gisik giri, detangko sandija.
- Sombari - Saa ding'a sia soa, donggijaan deko,
Gimaatjok ba'atangko, rasong gri a'sako.
Abi anga ma'sijajok, da'o maiko daknok,
Bachiniko sandipanok, gisik jari ong'jok.
- Nobari - Bachiniko sandipa'gen, nono nokchi re'nok,
Apa Isol dakchakaigen, ja'man sokbapil'nok.
(Buchuma Demesh-ko gronge rimanga)
- Dinesh - Ai, ai na'simanga, bachi re'angaha,
Ama nang'ko nikgijaan, anga birangaha.
- Buchuma - Oh, bi'sa, na' ara iano saksan maina grapenga?
- Dinesh - Ama bitchi, angkode amamangde gale re'angaijok.
Da'o anga darangkoba nikgija saksan brange dongenga

aro amamangko nikjanasa grapenga, angade.

- Buchuma - Nang'koara mai minga? Aro nang'ma nang'pako mai minga? Badia songoni bi'sa na'ara?
- Dinesh - Angni pagipakode Jongnang Sangma, minga, nokma. Amade siaha, indiba ma'dekode Ripoli Marak. minga. Songba namen chel'a. Re'pilnan ramakon nikjajok.
- Buchuma - Indakode ang'Su, na'a angni nokchi re'chengbo. Hai ang' baksa, jamano nang'ni ma'gipa pagipani nokchina dilatanggen.
(Buchuma-an'tangna agane) Sawa sani bi'sa brangako sandiku'gen. Anga songtangona sokangode man'ne cha'gipa saksana palatgen. Mymensingni degri saksana uko palatgen.
(Buchuma Dinesh-ko rimanga)

MESOKANI - VIII SONATCHI SINTEA

Bilsi gittam ong'angpiljok, sona Kalsinara,
Songonade basakosa, chutti re'banaka,
Gisik ra'o ka'gualna, amja gose pangnan,
Chutti ra'e re'bagenna, agananga angnan.

MESOKANI - IX KALSIN SAKSAN

(Bilsin a'bachengahaode, mikka wabaengode,
Manderangba gamna suna, chanchibatokode.
A'briangko niwatode, nika simdim simdim,
Patalrango chian gape, nika boksogimgim.
Uandake patalrango, chia jokpripraon,
Manderanga chempa wate, chaka uaragon.
Chempa chake me'aparang, golpo ka'mittingo,
Kalsin pante re'baenba, sing'ea ha uno.
Grongaha me'aparang, rama bijatchio,
Golpo ka'na asongaha, bolni sal'akkimo).
(Budeparang chempa chake golpo ka'mittingo Kalsin
Salam ka'e sing'ea - JORONG BADINGNA RE'ONGKATA).

Kalsin - Balkario balwa bala, da'nang balsri balsri,
Bachikoba chanchiode, gisik ka'sri ka'sri.
Mibakjao mikogipa, buringni jong' tikket,
Miksongako chanchiato, gisik tikket tikket,

MESOKANI - X

SONATCHI CHIGATO SAKSAN CHI KO'A ARO KALSIN RE'BARA

(Goalpara jilaoni, High School-ona,
 Poraienga ua pante, Classoba nama.
 Chutti wato dikdiksana, songona re'bana,
 Songtangoni manderangko, grongna sikpaenba.
 Re'angenga ua pante, damsia biapona,
 Sokangaha ua da'nang, Chigat sepangona.
 Sonatchiba unomitting, Tala natsopaenga,
 Nikeenba ua pante, uo sing'paenga.
 Kalsin Momin ine minga, ua pantekode,
 Momin babu ine segen, uko ja'manode.
 Me'tra bi'san bimingminga, Sonatchi Sangma,
 Maiko jegen ua me'chik, kam cholon nama).

- Sonatchi - Indioba amja gose, ka'gualna nang'ko,
 Pil'e pil'e nipilman'a, re'bagiminchiko.
 Ka'tong ning'o jokenggipa, ka'saani chidare.
 Tipchangatna amja gose, bobilni wal'sare.
 A'gilsaksa bikipilaigen, Salgian balponggen,
 Indioba gualjawa, gisikan ra'aigen.
 Angni nang'na ka'saani, baditan ning'tua.
 Toe nina man'jaode, u'ina amjawa.

(KALSIN RE'BARA)

- Kalsin - Maiko dake dongpaenga, na'ara iano,
 Kamko ka'e jakchakjaenba, niksojama angko?
 Nang'na agananga gitan, chutti ra'bapajok,
 Uni gimin da'o anga, nang'ni nokchi re'nok,
- Sonatchi - Ja'birangkon gam'atgija, mainasa re'bajok,
 Bimang niksojani gimin, gisik to'tro ong'jok.
 Ripeng mamingkoba dakja, Talakosa nata,
 Mande ine sing'paenga, uan bebe katta.
- Kalsin - Gronggrikani chin gita, hai salam ka'na,
 Agangimin kattarangko, ja'man gisik ra'na.
 Nang'ma nang'pa nampaengama, duk a'sel grian,
 Mikkang nikna sikpaengenchim, gose uamangbaan.
- Sonatchi - Nokgipani ka'saachi, pillak namtokpaenga,
 Maning a'sel dongpagijan, an'sengtokpaenga.

Apadeni noko dongja, badingna re'anga,
 Ru'utbejok re'bakuja, Laha badingenga.
 Amabani mamamangchi, rona re'angenga
 Noko dongna angko saksan, ama donangaia.
 Ronakode re'soaibo, da'on re'angaigen.
 Nokrangra'o asongsobo, sana kiratcha'gen.

- Kalsin - Indakode re'babone, anga rosoaigen,
 Nang'ko niksoku'janaking, anga sengsoaigen.
 Gipin mande re'angode, anga donuaigen,
 Sona nang'ni sokangosa, anga ong'kataigen.
 (Kalsin re'soa)
- Sonatchi - Ia pantekoa angna, Apa sing'paode,
 Jechakgijan ra'aigenchim, Kalsin pantekode.
 Song'na su'na changpajaoba, su'e on'aigenchim.
 Nokkol suuri saksa gita, angko dakaibochim.
 Manderanga agantoka, mandena kenode.
 Grongbebetoka ina, gisiko nangode.
 Me'aparang aganako, angaba knara,
 Angni chanchisoya gitan, sokbabebeaia,
- Kalsin - (Noko rosoe) A'brirangko niatode,
 nika simdim simdim,
 A'songtango dongpa'oa, gisik ka'sinjrimgjim.
- Sonatchi - (Sokba'e) Ka'saa ripeng ianona, re'bae asongebo,
 Anga chaako dakekuna, dikdik sengpaku'bo.
 Da'si angni tarianga, wantiba dongenga,
 Tonikjaoba cha'angpabo, mamingan dongpaja.

MESOKANI - XI

SONATCHI CHA TARIE RA'BARA ARO GOLPOA

("Forget-me-not" ine sea, donga ua cupo,
 Uko nike chanchibejok, Kalsin gisiktango.
 An'tang ku'siktangchi, uko, pe'skagenode,
 Ka'sapa'e ripeng angko, gualpa'nabene.)

- Sonatchi - (Cha on'e) Ringbo chame intangode, cha ka'singnok,
 Ringna cha'na gualpil'e, maiko chanchiengjok.
- Kalsin Ringgen chame ka'sinahao, chaan ding'kuenga,
 Ding'a gnang ringatnara, angan amkujawa.

- Sonatchi** - Ka'sinode maiko ringgen, chaan tojawajok,
Pante mande ringatode, da'on man'aignok.
Ripeng na'a ringmanode, ta'muku ringbojok,
Dukni sukni kattarangko, golpo ka'e ronok.
Tol'engasa ripeng na'a, banoni amjagen,
Cha daka topajanan, na'a mitchiakon.
- Kalsin** - Golpo ka'na changpajane, maiko golpo ka'gen,
Ning'tuako aganoa, duksa man'srangaigen.
- Sonatchi** - (Mola so'e on'e) Rasong grini kattakode,
maiko knatimgen,
Knae kusi ong'an palde, duksa man'srangaigen.
Ia bilsiode angko, Skulchin watjaha,
Indakesa da'o anga, dukko man'beenga.
- Kalsin** - Indakode nang'pa, dingtang chanchiakon?
Sakoba'an nang'ma nang'pa, tik ka'ahakon.
Indakesa poraitaina, skulchin watjaha.
Srik mi'in sing'engarok, nang'na aganjasa.
- Probalin** - San baksa golpoenga, ai Sonatchi? Sawa rona
re'bara?
- Sonatchi** - Sawagende nang'ni gritang, rona re'bapara,
Na'simangko grongna ske, sengsopa'engasa.
- Probalin** - Ha, jong Kalsinara, basako re'baesa?
Hai Salam.
- Kalsin** - Mijalo re'ba'a mani, Na'simangko grongna sikbeanasa
gronge katna re'baaia. Re'bapanan somoi man'ja.
Da'oba salchibonganasan chutti ra'e re'baaia.
- Probalin** - Nambeaha jong. Da'o gita chutti man'e re'baode,
nang'ni mama mani Buchuma budepakoba grongangrongbone
jong. Me'su samjak dongjaoba, mi cha'e re'angbo.
Mi minahaode cha'angchina tarie on'atbo, ai Sonatchi,
- Sonatchi** - Bijak me'su dongjanasa, kratcha'paengjok,
Songa'a rita mangmangkode, da'sion minmanjok.
Manimangni me'sukosa, ake song'ataijok,
Pangsamangmang kobikosa, ritatmangmangaijok.

(JOENDRO ARO MALSIN RE'RARA)

(Miko sae donbaenba, Sonatchi re'bajok,

Kalsinkosa jako rim'e, cha'ramchi rimangjok,
 Uko nike Joendrode, gisik dukko man'jok,
 Chanchiaha angko gale, uko mande ra'jok,
 Joendroko mamatangde, chaware kangjokchim,
 Uni gimin Joendrode, kusi ong'pahachim.
 Sonatchia on'tisaba, uko nina sikja,
 Chanchienga gisikode, anga jari ong'ja)

- Joendro - Aiao, mama kalsinsake, mainasa re'bajok,
 Changsa pil'sa robaoba, maiko cha'pagnok.
 Chaa chini dongpaode, maina dake on'ja,
 Gue pan da'si ra'baa, ra'bae on'paboda.
- Kalsin - Nangja mani, anga noko miko cha' baman'jok,
 Da'o chaako on'genoba, anga ringmanpil'jok.
- Probalin - Malsin aro Joendro-mangnaba mi sae on'atboda,
 ai Sonatchi. Bijak mamingba dongjaoba cha'e
 ropachina.
- Sonatchi - Miko sae donbaman'jok, hai re'bo cha'na,
 Intang golpo ka'tainajok, miko cha'chengboha.
 (Sonatchi Kalsinko mi cha'na rimanga)
- Probalin - Hai jong Joendro, na'simangba bijak dongjaoba,
 mi cha'e rokande. Iamang sakgninaba mi sae on'atbo, ai Sonatchi
 (Joendro aro Malsinko mi cha'na rimanga)

MESOKANI - XII

NOBARI ARO KALSIN

- Nobari - Miko cha'ebojok dede, sala napangengjok,
 Bano roe ru'utbara, da'o walangengjok.
- Kalsin - Sonatchi Sangma angna, song'e on'atpara,
 Da'o mangmang cha'e re'baa, anga cha'taijawa
 (Kalsin biaptango tue chitti sena chanchia)
- Kalsin - Jeba ong'bo changsakode, dukko chakna nanga,
 Dakchakgipa jorakode, anga am'na nanga.
 A'gilsako inditana, manderanga bang'a,
 Saksakode jora see, Isol donsoenga.
 Uni gimin Sonatchinan, chitti sechesranggen,
 Mikgil kiratcha'genoba, seatede nigen.
 Judi angna mikchaode, ua sechaktaigen,

Mikcha namnikpa'jaosa, jripmittip donggen.

- Nobari - Miko cha'e robo dede, okkripil'taiengnok,
Mipaltangko cha'manosa, tubo andalangjok.
- Kalsin - Mia okkrijajok ma'de, knal mipring cha'nok,
Tusinaha andalengjok, neng'a neng'taknajok.

MESOKANI - XIII

KALSIN CHITTI SEA - SONATCHI MA'GIPA PAGIPA ANTI CHA'NA RE'ANGTOKA

(Aditani ja'manoa, walba walingaha,
Turnna ine biaptango, ua tariaha.
Ma'maanti gisiktango, ua chanchiaha.
Chakki so'e biaptango, ki'tap poraiaha.
Uandake chanchienba, gisiko nabaha,
A'gilsakni joratangko, am'na chanchiaha.
Gisik pil'sa indi ine, ua chanchienga,
Namjawakon ianpako, gisik jajrengenga.
Uandake gisiktango, ua chanchiengon,
Sebo sebo chitti una, gisik tikkelengon.
Gisiktango chanchiarin, namen walingbejok,
Kali penko ra'enbani, sena a'bachengjok)

- Kalsin - (Chitti sea) My dear friend na'a, Sonatchi Sangma,
Kan'dikbea kattachisa, nang'na seatenga.
Ka'sapa'e aganchakbo, angni sing'atako,
Knasona kusi ong'a, nang'ni miksongako.
A'gilsako badi gita, me'tra bang'beoba.
Nang'na agre nikja ripeng, anga am'beoba,
Uni gimin joratangna, nang'kosan miksongjok,
Nang'ni namnikchakpa'ode, an'ching jora ong'nok.
Silpagija nang'ni ripeng, chitti seatenga,
Ka'sabe'e ku'dimachi, salam ra'atenga.
Ia chitti seatgipa, nang'ni ripeng Kalsin,
Da'o songdongenggipade, an'ching sakgninin.
Uni gimin janggitangko, nang'mung tangrimpa'na,
Kratcha'ako donemangba, nang'na seatenga,
Chittikode sebejok, sao on'atpa'gen,
Indinari donchipjawa, on'enade nanggen.
Jeba ong'bo knalosa, anga re'angainok,
Mikgil kiratcha'genoba, Sonatchina on'nok,

MESOKANI - XIV
KALSIN CHITTI RA'E RE'ANGA

(Sakgnian golpo ka'e, namen waltingbejok,
Sonatchiba Miko song'e, Kalsinna on'ajok.
Aditani ja'manoa, Sonatchi aganjok,
Da'al walsamangkode, tue re'angbojok).

Sonatchi - Aiao ! Ripeng Momin na'a, mainasa re'bajok,
Da'alosa nikasisi, mikkang niktaipa'jok.
Indi gita salna Kingking, ripeng nang'ko nikja,
Mainaba'an namnikjama, angko maina gela?

Kalsin - Ripeng na'a ka'daknabe, anga nang'ko gelja,
Mijarango robanaba, anga cholkon man'ja.
Miksonggimin ripengtangko, saoba gualgenma,
Nang'ni angko intekara, kratcha'jawama?

Sonatchi - Aiao, chame bal'ekesa, anga aganenga,
Angni plak kattarangna, gisik dukman'jokma?
Angni katta aganarang, dukni dongahaode,
Ka'saon kema ka'pachina, mol'molpa'engane.
Jeba ong'bo waltingbejok, anga biap annok.
Ba'ra namkalade dongja, surikosa annok.
Uni gimin tuangpa'bo, da'al walsamangmang,
Kusi ong'e rorimpa'na, knal salsamangmang.
Ama Apa noko dongja, atmana re'anga,
Me'chik bi'sa saksan tuna, kennaba kenenga.

Kalsin - Nang'ni biap andapa'o, anga tuna kraja,
Nang'ni tarigimin biap, angode dongpaja.
Attam wala waltuoba, jawa mitakgenkon,
Songa noka nikdikode, agan jangatgenkon.
Jeba ong'bo aganako, anga maniaainok,
Nang'ni tarigimin turam, da'o anga tunok.
(Kalsin Tusia)
(Tusimitting somoi da'nang, balwa ta'rakgipa,
Rang'gitikan sokbaaha, mikka bitchirangba.
Kalsin Momin nitogipa, Chola Kotkode,
Balpakangjok gate donna, Redingonikode.
Poketoni chittideni, a'ona ga'akjok,
Envelopni chittiara, dingtang a'ao ong'jok.
Chitti nike Sonatchian, kolame ra'manjok,
Bimungtangko nikpaeming, poraie nistrangajjok,

Chola kotko kolamenba, Sonatchi on'atjok,
 Kalsin Momin chittikosa, am'a dakmikajok.
 Kalsin Momin chitti nikjae, namen dukko man'jok,
 Maiko dakpilgnok ine, gisik jajrengbejok.)

- Sonatchi - Maina duko man'e ripeng, ku'sik aganjaha,
 Nang'ni gisik miksongako, anga ma'siaha.
 Nang'ni angna sea chitti, angni jako sokjok,
 Nang'ni bi'pilgenchimoba, anga on'piljajok.
- Kalsin - Angni changsa gualako, ripeng kema ka'bo,
 Jak chopjolle kema bi'a, sona anga nang'o.
 Nang'ni ska melaemangba, angko daiba ra'bo,
 Indioba chittikode, angna on'atpil'bo.
- Sonatchi - Angna on'a sikjaode, na'a maina sea,
 Nokgipa Isolan da'nang, angna mesokaha.
 Nang'ni drae bi'genode, anga, maiko dakgen,
 Ka'a be'a mikchi baksa, anga on'atpil'gen.
- Kalsin - Jeba ong'bo ka'saa chame, dukko man'abejok,
 Nang'ni beng'a kattakode, anga man'gnok,
 Indioba gipinnade, na'a paraknabe,
 Nang'ma nang'pa sing'paoba, aganpa'kunabe.
 Ka'saa ripeng re'nahane, dukko man'riknabe,
 Basakoba re'bataigen, chame dongrikbone.
 Ade angko manengsogen, bachi re'anga ine,
 Intangode sandisogen, bano tubara ine.
- Sonatchi - Na'a re'na sikbeoba, dikdik asongku'bo,
 Anga chaako dakattaina, ringe re'angpabo.
 (Chaa ra'ea)
 Mi bijak minakengjok, dikdik sengpaku'bo,
 Angna ka'sapa'odene, cha'e re'angsrangbo.
- Kalsin - Nang'ni chaako dake on'on, angna chu'ongbejok,
 Ripeng na'a kema ka'bo, cha'angpa'jawajok.
- Sonatchi - Okka'oba cha'na nanggen, cha'na napa dipet,
 Nang'ni tol'e aganako, knaa dipet bongbet.
 (Mi cha'na rimanga)
 Ha mi nangkuode, maisa cha'jahama,
 Angni song'na changpajanan, na'a mitchiama?
- Kalsin - Ong'ja sona nanga gitan, anga ra'e cha'jok,
 Agre jaroduga'ode, Ma'de manenggnok.

MESOKANI - XV
ANTI CHA'A
JORONGMA'ANG LAHA BADINGA ...

MESOKANI - XVI
SONATCHI, LOKKI ARO INCHOK GOLPO KA'A.

- | | |
|----------|--|
| Sonatchi | - Ripengranga gisik nangbo, toromi ong'pana,
Siangachi salgin songko, an'ching man'epana. |
| Lokki | - Bebe sari gisik nangbo, toromna sintie,
Plak dakgualarangko, an'ching kema bi'e. |
| Inchok | - Nokgipana sinteari, namako mesokna,
Da'al dipet Christian ine, napbolako man'a. |

MESOKANI - XVII
JORONG BADINGAONI NOKONA RE'BAPIL'O, JOENDRO ARO
MALSINKO GRONGA

- | | |
|---------|---|
| Joendro | - Salaramchi teng'enggipa, Pringprang Askisa,
Angni da'o miksonggipa, Me'tra Sonatchisa. |
| Kalsin | - Saliramchi riprapenga, mikka wanakakon,
Name miksongjagenode, mama man'jawakon. |
| Joendro | - Chibrimrangba sin'karina, balrikatokenga,
Anga pante Sonatchina, pangnan chanchienga. |
| Malsin | - Wa'cheksio ba'enggipa, bimang Do'maski,
Ja'man a'sel ong'genoba, angan donga saki. |

MESOKAN - XVIII
SONATCHI, LOKI ARO KALSIN GOLPOA

(Sonatchiba chia ko'na, re'baa basing ra'e,
Lokki aupana ine, ba'ra sko gate.
Nipilato Sonatchide, Kalsinko nikatjok,
Kiratcha'e ramasamchi, bamchikoprikaijok).

- | | |
|----------|---|
| Sonatchi | - Pil'e pil'e nipilman'a, an'tang mikchatangko,
Bano maikai ka'gualgen, angni ka'satangko. |
| Lokki | - Maisa sari dadakode, na'ade rimbaengama,
Dada Kalsin nang'ni ja'man, re'bajaenggenmo?
Angni etalanan sari, kratcha'bejokma? |

Ang'de nang'ko bochi nangnok, dada mikchaengana.

- Sonatchi - Sari na'de ma'maanti, katta aganbea,
Ong'ai ong'jae kattarangchi, angko etalbea.

MESOKANI - XIX SONATCHI ARO KALSIN CHIGATO GOLPOA

(Chigat sambao asongesa, Kalsin Sonatchide,
An'tangtangni miksongako, agan golpo ka'e.
Dukni katta maming dongja, kusi rarasajok,
Salgisakma A'gilsakma, an'tang ma'sijajok.)

- Sonatchi - Ka'saa anga ka'dongjachim, nang'ni jora ong'na,
Mikkang bimang nampajane, nang'ni ra'chakpa'na
Indioba Isol da'nang, angna jora on'jok,
Nang'ni ki'sang ja'rikpana, angko sesopa'jok.
- Kalsin - Bi'saonin angabani, nang'na ka'sabata,
Kam chollon mikkang bimang, nang'kon nammikbata.
Ka'san gisik apalako, maia tosokpa'gen,
Name agangenchimode, Sagalnan batpilgen.
Salantian nikna ske, gisik tikelaia,
Cha'manode nang'onasa, rona skataia.
Somo ru'utbe'e gipin, rona re'angode,
Mande ra'na sikangpil'ja, jawa mandekode.
- Sonatchi - Maiko aganku'gen chame, angni ka'saakode,
Okkrijawa salantiba, nang'ming golpoode.
Salang walang nang'mung baksa, dongkamna man'ode,
Man'aigenchim cha'gijaba, mia patidokde.
- Kalsin - Nang'ni mikkang bimanga'an, angna sona gita,
Nang'ko jora man'paode, hira rongsa bata.
Ku'chil mandal bibalsajok, chame naa mikterok,
Tom'e minokatna gittik, bimang namjok ban'dik.
- Sonatchi - Aiao, da'nang namnikbejok, jari gokgirangko.
Ang'Se ratcha ka'saan gisik, Sona rasong griko.
Ripeng anga gualjawa, na'a jajrengpa'gen,
Nang'ni Skul matchotako, anga sengsoaigen.
- Kalsin - (saksan) Dakmandako gisim gane, chadol chinnatode,
Nitobate nika nang'ko, mikkang te'satbate.
Kni kasot dimrimbalbal, ku'chil mandal bibal,
Sonatchide nitoamo, bimang te'rakbalbal.

- Sonatchi - (saksan) Longpen sut ganahaode, kni appinggajok,
Sakgipinna nitobate, pantekode nikjok.
Jepo Ponten kearisa, rumal jakkipesa.
Angko mikkang nikahaode, ka'dingsmitesa.

MESOKNI - XXX JORONG BADINGAONI SOKBARA

(Aditani ja'manoa, Sonatchi pagipa,
Sokbaaha badingaoni, nokona uaba.
Knasoe Chemin Pandit, grongsopaaha.
Bading chiwalani kamko, umang golpoaha.)

- Jorong
Probalin - Oh, Buchuma, nokonma bachiba re'angama?
- Nokon, sawasa? Oh, budepasa? Nokon dongjaeming
bachi re'angende.
- Jorong - Aiao, neng'beaha. Ringspa-cha'sparang dongengama, Buchuma?
ra am'e nibora.
- Chemin - Oh, mosa re'baha ine knaara, sokbahama?
- Jorong - Oe, mosa, nang'na skang mangmangsan sokbae asongsoenga,
Ai Sonatchi, nang'ni mamana am'pok ra'bae on'bora.
Asongbo mosa, iano. Da'o mangmangde saa ding'arangde
dongpaku'jakonba?
- Chemin - Da'o mangmangde saa ding'ade dongkuja, mosa. Nang'ni
Laha badingade, pelsa pelgni man'bapaama?
- Jorong - Baosa mosa, badingmittingo merong mechu, na'kam Kari,
bree cha'en bon'aia. Ai Sonatchi, Mola so'e ra'baboching,
nang'mamana.
- Chemin - Oe, da'nang. De mosa, salba salniangaha, anga re'naha.
- Jorong - Mainabasa re'barachimma mosa? Indinsa robaiaama, Re'ba
robaoba maiko cha'gen, mosa.
- Chemin - Dongja mosa, nang'ni re'baha inako knae'sa gronge katna
inesa re'baia.
- Jorong - De mitela mosa. Re'ba robaoba magna, maiko cha'gen.
(Gilja ka'a - Reverendrang napbolatgen)

MESOKANI - XXXI

SONATCHI, LOKKI, INCHOK, JOENDRO ARO MALSIN GRONGGRIKA

(Kalsin Momin pante da'nang, Goalparachina,
Re'angpil'jok matchotsrange, pil'e poraitaina.
Sokangeming poraitaienga, ua gisik nangen,
Aganangjok Sonatchina, bakbak re'bapilgen)

- Sonatchi - An'ching da'o sakprakprakan, gisik nangpabone,
A'gilsako bida man'a, na'song chanchibone.
Ramram samsam aratari, salko re'atnabe,
Namgijana an'chingara, ramram chanchinabe.
- Lokki - Sari jeko aganenga, uan bebe chong'mot,
Namgninan aganenga, uan katta kakket.
- Inchok - Ripeng an'ching ong'panamo, gisik gnanggipa,
Challakiko dakgiparang, nangen dukko man'a.
- Joendro - Chinga namen denggugipa, rona re'baenga,
Na'simangna jajrengchake, chinga sokbapa'ra.
- Malsin - Salgisakna, Askina, wa'ring gongsokjawa,
Na'simangna ka'saako, gipin ma'sijawa.
- Joendro - Ripengrangna jajrengnabe, chinga ka'saenga,
Sakgittaman duk man'abe, gisik miksongenga.
- Malsin - Rama buring dikakode, re'ja samte bang'a,
Mama na'an chanchisrangbo, Sonatchian silla
- Sonatchi - Achak gonggol biparangde, bal'ekdugabea,
Ke'gijakon rongbo na'song, ninan sikjabea.
- Lokki - Na'song gita pantekode, chingna nangjasrangwai,
Na'simangna nambatakon, chinga man'aigenwai.
- Joendro - Me'chik na'a ka'dakjokma, chingni kattana'an,
Indakede solpanabe, gisik rakbo pangnan.
- Malsin - Nikgen na'song nomilrangko, gisik seng'gipako,
Da'al dipet gualjawa, na'mang chonnnikako.
(Sonatchi Chitti sea)
- Sonatchi - Chitti sechakpa'na anga, da'o tariku'na,
Ka'sabe'e kingsamangmang, anga sechakpa'na.
Ka'sabea Kalsin Momin, nang'na seatenga,
A'bachenga ku'dimachi, salam ra'atenga.

Daknangpa'ja nitopa'ja, me'chik gisik dongja,
 Jeko na'a chanchienga, uko anga jeja.
 Isol ka'sae donsopa'ode, jora ga'akchina,
 Nang'ni angni miksongani, dingtangangjachina.
 Poraimitting somoirang, chanchinabe angna,
 Nang'ni ka'sapa'genode, sengsoaigen anga.
 Angni ka'saan ka'tong chimik, pangnajolna tipja,
 Ka'saachi kema ba'bo, kema bi'atenga.
 Bang'pagija kattarangchi, aganchakatenga,
 Ka'sa'achi nang'ko da'o, Salam ra'atenga.
 Sechakenga nang'ni ripeng, Sonatchi Sangma,
 Sea gualgenchimoba, ka'saon kemachina.
 (Searangko matchotaha, re'na tariaha,
 Tusimitting somoi, konta dokataha.
 Gilja nokchi panterangming, Kalsin re'angpa'jok,
 Sonatchiba chitti on'a, cholko sandiangjok.
 Re'angenba ki'tap ning'o, dape donbaman'jok,
 Ja'manosa Kalsin Momin, chitti nikrikaijok)

- Sonatchi - Ka'saa Momin mikkang bimang, plaknan silbata,
 Gisik mikasala da'nang, kam chollon name.
 Chame na'ba da'odeni, angko wate nibo,
 Plak katta chanchirimjok, na'aba joke katbo.
 (Gilja ka'a aro napolna aganna)

MESOKAN - XXXII

JORONG PAISA CHANNA , CHEMIN RE'BARA

- Chemin - Mosa, nokonma?
- Jorong - Sawasa? Oh, Mosa, Cheminsa! Nokon mosa, da'ororode
 darangchin re'anga dongkujaenga.
- Chemin - Angasa mosa. Maikosa bildikbil'dak kam ka'enga?
- Jorong - Dongja mosa, an'tangni laha badinganikosa, hisape
 nie roaienga angade. Bachinasa mosa da'alde.
- Chemin - Maina re'bagen mosa, iandaken rojola gitasa
 namchiktangni giminsa golpo ka'e rojolna re'baaia.
 Namchiktang Sonatchia dal'a chu'sokaha, uni gimin
 na'simangara maikobarang chanchiengama ba dongjama
 sing'jola gitasa re'baaia.
- Jorong - Oh, nang'namchiktang Sonatchini gimin?

Baosa, chingade da'o dipetde mamingkon chanchia dongkujake. Na'a sakobarang chanchia ba miksonganirang gisiktango dongama?

- Chemin** - Oe, mosa, angade da'o songo dongenggipa skia man'kalgipa mandeko gisiktangode chanchiengachim.
- Jorong** - Oh, na'ara Kalsin Momnin-ko aganengama?
- Chemin** - Oe, nosa, angade ukon chanchia aro namnikachim. Uan songo noko dilnaba man'gen aro an'chingnaba jakkaltogen. Ukon singsrangaignok.
- Jorong** - Inghing, angade leka pora donggipakode nangnikja. Game sue cha'gipakosa angnade chaware nanga aldumitting-gipakosa. Leka poraia donggipade game sue alduja.
- Chemin** - Indakode nang'ni namnikako sandie sing'e sane on'aibojok aro ja'mano chingna aganaibojok, mosa, anga re'naha.
- Jorong** - Ong'ja mosa, ma'sisretpanabe. Angade man'ode an'tang gri-sokchikosa an'tangni nokap ki'gongdamo rorikchina rimbana skenga. Leka poraia man'gipakode nangja, game sue cha'gipakosa nanga. Angade an'tangni gritang Joendro-kosa chanchiengachim.
- Chemin** - Angni namchiktang bi'sao sing'e nina nanggen. Mikchaa namnikgijako sing'e on'oba namjawa. Angni ma'siani gitade aro uamangni re'a doa, roa choarangko niroke niode Kalsin aro Sonatchi an'tangtangni gisepode mikchaa namnik-grikanirang donga gita nika. Uni giminsa ja'wilo namjanaba donga, seng'gnang sing'e sane on'a ine anga an'tangde miksonga. Game sue cha'oba neng'a mosa. Bida dongoa kam ka'e na'simangko nirokna aro nokdang rikna man'gen. Nang'ni ska, man'ode nang'ni namnikako jekoba sandie chingo aganaiboaha.
- Jorong** - Anga ja'mano na'simangna jekoba aganaigen, mosane.
- Chemin** - De, namaigen. Anga re'naha.
- Jorong** - De re'angbo, mosa

MESOKANI - XXXIII

JORONG ARO PROBALLIN JIKSESA JEGRIKA

- Jorong** - Oh, buchuma, an'ching bi'sa Sonatchinara, chawarekoa ang' gri sokchikon sandiboma ba gipin deko am'boma?

- Proballin - Nang'ni ska jekoba sandiaibo, aldunasa nanga.
- Jorong - Na'ara sakoba chanchia ba namnika gisiktango dongama?
- Proballin - Dongja angade, darangkon nikaba nikja chanchiaba chanchija. Nang'ni ska budepa, jekoba rimbaaibo.
- Jorong - Indakode, mosa cheminni agana gita, sandie nina ma'chi nochi re'e doe nina nangen.
- Proballin - Re'angbo doangbo, ango maina sing'na nanga.
- Jorong - Aiao, buchuma na'ara name ku'monge sakgnini namnikako chaware rimna noko donna chanchioba, bikpilesa chanchiskara-konde na'ade.
- Proballin - Angade an'tang mikchaa namnikako chaware sing'jaode, an'tang demechik Sonatchikode kimna rongna on'jawa.
- Jorong - Indakode, buchumakrip randi dongataibo, Na'ara an'tangni mikkamak niangakode, ja'kuak ba'angakode ma'sijade. Na'a an'tangkode me'tra pante gamna su'na song'na amenga gita nikama?
- Proballin - Re'angbo, doangbo, indiba angni dekode ra'atjawa rongatjawa.

MESOKANI - XXXIV

SONATCHI, LOKKI, INCHOK E'SAL AKNA REANGA - MALSIN ARO JOENDRO KENDILA

- Sonatchi - Antichina pita dakna, da'al attam chinga, E'sal ake rona sari, pita palchakpa'na.
- Lokki - Pita wanti palanichi, sari maiko ra'na, Re'bo sari indakode, ta'arak re'bapilna.
- Inchok - Sari an'ching sakgittaman, apsan re'e palna, Damsan a'tip asongenba, pale re'bapilna, (Re'anga aro e'sal aka - a'kintechi goata)
- Lokki - Sawa achak gonggolrangsa, chingko goatenga, Chanchiama gisiktango, chingko kengennesa. Buring jonturangde ong'ja, chingko kal'lakgipa, An'tang gita dengguako, umang am'telgipa.
- Joendro - (Nakatba'e) Chingni goe kal'akatana'an kenahama? Kenama kenja inesa chingade kal'ake roaia. Kema ka'pabone.

- Malsin** - Chingara kenama kenja inesa goate roaiasaba.
- Sonatchi** - Na'simangni denggu gita, a'gilsako dongja,
Ama Apa sing'genoba, anga ra'e roja.
Na'mang gita panterangko, chinga miksram bu'a,
A'sak jora man'jaoba, segri rosrangaigen.
- Joendro** - Oe chinga denggugipa, buring robaenga,
Na'simangna kenchakesa, ja'man ja'rikbaenga.
- Malsin** - Salgisakni askirangko, wa'ring gongsokjawa,
Na'simangna miksongako, chinga dontongjawa.
- Joendro** - Ripeng na'mang gisiktango, chingna jajrengnabe,
Saksakode jora on'gen, donsoa dongode.
- Malsin** - Rama buring dikakode, re'ja samte nanga,
Mama na'an chanchisrangbo, Sonatchi Sangmana.
- Joendro** - Ripeng na'a jajrengnabe, anga chanchienga,
Saksakode jora ga'gen, anga miksongenga.
- Sonatchi** - Gonggol achak manggnide, agre bal'ekbea,
Kratcha'naba changpajama, nion nidikbea.
- Lokki** - Na'mang pante sakgniko, sing'oba rongjawa,
Sandiode silbatakon, pante man'jawama?
Songo me'tra indi bang'a, maina mikchapaja,
Salsalanti chingni ki'sang, ja'rikna kratcha'ja.
- Sonatchi** - Na'song gita pantekode, chinga rongsrangjawai,
Na'simangna batkalakon, chinga ma'pagenwai.
- Joendro** - Sona na'a ka'dakjokma, chingni kattarangnan,
Indakede solpanabe, gisik rakbo pangnan.
Nikgen na'mang sakgittamkon gisik seng'gipako,
Da'al dipet gualjawa, na'mang solarangko.
- Inchok** - Pante na'mang ka'dakjokma, chingni bal'ekanan,
Changsakode kema ka'e, na'mang re'angpabo;
Me'chiksurirangming na'mang, bal'ek etalpagen,
Katta ku'sa aganaba, gisik chanchichengbo.

MESOKANI - XXXV

NOBARI, LOKKI ARO KALSIN GOLPOA

(Kalsin Momin Pante da'nang, Goalparaosa,

Gisik nangen poraiengachim, miksonga bidana.
 Aditani ja'manoa, Kalsin wanggipaba,
 Siangaha ina da'nang, saa bilongenba.
 Salgnini ja'manoa, chiti man'sopajok,
 Ma'detangba seataha, nang awangde sijok.
 Kalsin Momin ma'detangni, chittiko man'soe,
 Re'baaha songtangona, gisik dukko man'e)

- Kalsin - (Chitti poraie) Maiko dakgen da'o anga, awang siangaha,
 Poraiangpaku'na gita, cholan ong'jawaha.
 Jeba ong'bo songchi nokchin, anga re'e ninok,
 Je cholko chanchinaba, nokchi re'srangainok.
 (Kalsin Momin nokona sokbara)
- Nobari - Dede angni rasongkode, maiko aganku'gen,
 Nang'ko poraiatangku'na, sawa dakchaku'gen,
 Maiko daken je man'a, chu'ongnikaiboaha,
 Man'giminko chu'ongnike, songon dongaiboaha.
- Kalsin - Maiko dakgen ia dukchin, angko champengaha,
 Songo donge namgnia, dongja ade angna.
 Dukko man'a ade anga, maikai ka'gualgen?
 Nokkol nape jeoba, poraion nambatgen.
- Lokki - Nokgipani ska dipet, dada nang'na on'jok,
 Duk man'oba maiko dakgen, nokon dongaibojoj,
 Rasong giri mandedeni, jena miksongoba,
 Bon'a nangaiaha dada, chu'sokna skoba.
- Kalsin - Chotchanggija dukrangan, angko champengaia,
 Songo dongo gisik ra'a, dongja, ma'de anga.
 Gisik dukko man'e dongna, maina dongchaaigen,
 Jawan songchi re'roroe, roon gualsranggen.

MESOKANI - XXXVI

KALSIN ARO SONATCHI

- Sonatchi - Ripeng na'a re'bajokma, iano asongpa'bo,
 On'ti anga re'angkuna, dikdik sengpaku'bo.
- Kalsin - Dukko chaknabejok na'a, mamingkoba nangja,
 Angni dukni kattakode, dongnunaba sikja.
 Angni nokni a'selkode, na'aba knaenggnok,
 Maiko dake poraitaina, anga cholko man'nok?
 Jeba ong'bo gualnaha, ia kattarangko,

Aganjokma manimangna, an'ching miksongako?

- Sonatchi** - Ainade aganaha, ua namnikbea,
Babanasa aganku'ja, pangnan manengaia.
Indioba uamangni, golpo ka'arangko,
Changsao knaman'a anga, ua kattarangko
Amikkako Sonatchina, sing'e nina nanggen.
Leka pora man'gipako, am'e nina nanggen.
Sonatchini mikchaakon, sandiode namgen,
Leka pora donggrikosa, Sonatchina kragen.
Uni gimin duk sukkoba, an'ching miksongaona,
Poraiku'na cholko am'na, jaman sukko man'a.
- Kalsin** - Oe Sona miksongenga, poraia matchotsrangna,
A'gilsakko dukko chake, poraitaie nina.
Cholu am'gen chu'sokatna, brangrroebea,
Gisik ra'a jajrengnabe, tom'tom dongbo na'a.
Chanchienga gisiktango, chame dukko chakna,
Sona anga poraiku'na, nokkol napemangba.
Bidanade brangna nanggen, mangsonga chu'sokna,
Ripeng na'a duk man'nabe, angni birangana.
- Sonatchi** - Jechi re'anggenchimoba, angko gualnabe,
Jeo nokkol napgenoba, angna u'iate.
A'sak branggenchimoba, nokgipao pangchakc,
Chu'sokatbo ka'saa na'a, nokgipa'o bi'e,
Re'angbojok janggin ripeng, ka'saan mikchi salam,
Da'o an'ching golpoako, gualnabe pangnan.

MESOKANI - XXXVII

NOBARI ARO KALSIN GOLPOA

- Kalsin** - Ade angna maiba cholko, dakna man'pagenma?
Bilsi gni dukko chake, anga matchotsrangna.
Da'o changsa poraiku'na, anga miksongenga.
Ma'de angko watatpa'bo, nang'o mol'molenga.
Dakchakako angna nangja, nangja tangka sona,
Je cholko dakemangba, poraitaipaku'na.
- Nobari** - Dede anga maiko dakgen, nang'ko watataina,
Me'chik segri chanchipa'na, anga gisik sokja.
Re'angpil' bo poraiku'na, cholko apnikode.
Angni aganako dede, gisik ra'paeode.
Him, angai da'al salsa, iandaka dukosa,

Dongna nangjok gose anga, Seni ja'manosa.
 Dedrangrangko poraiatna, anga sikgenoba,
 Me'chik segri branggipde, gisik chanchisokja.
 Dede na'a re'angoba, chingko gisik ra'bo,
 Jeo brange dongenoba, angna chitti sebo.

- Kalsin - Gisik ka'sinatna anga, noksul roangu'na,
 Sonatchini Pako dikdik, gronge kateku'na.
 Mija gita re'angoba, grongna cholko man'ja,
 Gisikode Jorong, angkon chanchipaengana.
 Knal pringo re'nok Ade, miko gong'rak song'bo,
 Ramao cha'angpana gita, misal kadepatbo.
 Gipin jatni a'songona, re'na miksongenga,
 A'songtango watsrangnasa, Kalsin chanchienga.

MESOKANI - XXXVIII

KALSIN JORONG, PROBALIN ARO SONATCHIKO GRONGNA RE'ANGA

- Jorong - Ai jong Kalsin, mainasa re'bara da'alde. Asongbo jong.
- Kalsin - Indinsa rona re'baaia mama, mija re'baoba nang'kode
 grongangjani gimin nikna sikipilaha.
- Jorong - Nang' ni ia bilsini porikade namama jong? Da'oara
 basako re'angtaienga?
- Kalsin - Maiko agangen, mama. Da'o Awang siangahaoawara darrangba
 dakchakgipan dongjaha. Indimangba Matric matchotsrange
 poraina chanchiengachim.
- Jorong - Maiko daken jong. Da'oara na'ara poraijawahama?
 Sawa nang'ko poraitaikuna dakchakgnok?
- Kalsin - Maiko dakgen, Ade angko an'tang dakchakangkuna chol
 ong'jahani gimin watataijaengaha. Indiba, da'o bilsini
 gnikode je cholko dakemangba nokkol ama gameba matchote
 poraisrangna chanchienga.
- Jorong - Oe, jong, gipin cholko dakna man'kuengode matchote
 poraisrangbo. Basako re'angtaina chanchienga jong?
 Cha name tarie ra'babora, Ai Sonatchi.
- Kalsin - Ru'utgijan re'angpil'na chanchienga, mama. Ia antini
 gisepon re'anggnok.
- Jorong - De jong, je ong'oba bilsini gnikode nang'ni agana

- gitan duk chakemangba matchotsrangna jotton ka'bo.
- Kalsin** - Gisikode iandaken miksonga dongachim, mama. De mama anga re'skanaha.
- Jorong** - De re'angbo jong. Jeo dongoba, chingnaba chittirangkode see u'iatpabo.
- Kalsin** - Anga jotton ka'gen mama. Hai Salam (Salam ka'a).
- Jorong** - Do re'angbo. (Kalsin re'anga)
(Okamrike) - Oh, Jong re'baku'bo.
- Kalsin** - Mainabama, mama?
- Jorong** - Ha, re'angmittingo alamala ramao cha ringangani pal gita ia tangka gong chikungko ra'angpa'bo.
- Kalsin** - Nangjawa na'a mama.
- Jorong** - Ha ra'angbo. Angaba tangkan dongja bon'aha.
- Kalsin** - Mitelbea, mama, re'naha.
- Jorong** - De re'angbo.

MESOKAN - XXXIX JOENDRO ARO MALSIN CHANCHIA

- Joendro** - Sonatchiko man'ahaode, maiko aganku'gen,
A'gilsako kusi ong'e, game cha'dilanggen.
Ka'saa Sona a'gilsako, jora ra'ahaode,
Gitok nachil nitochina, anga patahaode.
Jako degnangahaode, Skulchina watgen,
Gisep gisep ma'gipaba, dena skie on'gen.
Poraide chingni bi'sa, gisikba seng'pagen,
Lower pass ka'ahaode, midleona watgen.
Midle Skul matchotode, metric-ona watatgen,
Poraiani chusokpaode, gisik matgrik ong'gen.
- Malsin** - Dea ba'pagenchimoba, skulchide watja.
Bida buti donggipade, songo noko roja.
Uni gimin bimungtangko, sena skul watgen,
Songni Skul matchotode, jora sing'e on'gen.
Songo noko janggi tange, jikkim debaoba,
A'songtangko namao dilna, cholko man'pagenba.
- Joendro** - Oe, ang' gri nang'ni katta, kakket ong'bebea,

Indioba bida dongja, a'sak chonnikbea.
A'songtangko namao dilna, bida buti nanga,
Jawan chonikaoni jokna, seng'aniko ra'na.

- ¶ Malsin - A'sak jora ra'na ine, chanchipa'genoba,
Miksongako man'paosa, sena ka'sagipa.

MESOKANI - XL

NOBARI, KALSIN ARO LOKKI

- Kalsin - Ade anga re'nahane, ka'saachi Salam,
Bidanasa birangnaka, roja anga ramram.
Ma'de na'a ka'dimebo, dukko man'panabe,
Jeo brange donggenoba, ma'siatpagene.
Na'sima'ang baksa donge, Isol dakchakchina,
Plak dukni salrangoba, Ka'dimeatchina.
Uni gimin nokgipako, na'mang gisik ra'bo,
Dukni salrang sokbahaode, Isolo bi'rongbo.
- Nobari - Chingna jajrengnabe dede, na'a re'angaibo,
Dukni Sukni salrangoba, nokgipao pangchakbo.
- Lokki - Dada na'a dongjaode, Chinga brange dongnok,
Mama ada dongpajana, gipin chonnikainok.
Uni gimin dada na'a, nang'ni miksongachin,
Chingko apsan rime re'bo, nang'ni birangachin.
- Kalsin - Duk man'abe nono na'a, ma'de baksa dongbo,
Dukni sukni somoirango, nokgipao bi'rongbo.
Rosobone nono na'a, Goalparachina,
Re'angenba nang'na rori, sari ra'ekuna.
Dukko man'e dongpanabe, Ade baksa dongbo
Saa ding'an somoirango, nono nirokpa'bo.
- Lokki - Angni adatanga saksa, mangmang dongpaakode,
Rasong dongpaja'e gose, birangataijokne.
Biranggimin mandekode, mikkang nikna neng'jok,
Dada nang'na ka'pakate, dukko man'a nangnok.
- Nobari - Dede dukko man'chanabe, gisik ka'dimebo,
An'ching rasong donggenode, re'bapilgen changsao.
Uni gimin ta'ma na'a', ta' rak miko song'bo,
Gisik dukko man'genoba ong'jok rasongtango.
Indioba dede sona, janggi gimaode,
An'ching ma'ningsaba dede, dongja kusin' salde.

MESOKANI -XLI

KALSIN SONATCHIKO RAMAO GRONGANGA

(Kalsin momin a'songtangko, wate re'angtaijok,
 Adi gia re'angenba, an'pile niangjok.
 Turamtango Sonatchiba, grape dongrikaijok,
 Chanchiaha gisiktango, basak girongtainok.
 ka'saatangko wate re'na, Kalsin ka'beaha.
 Indioba chu'soksrange, miksongjok poraina)

- | | |
|----------|--|
| Sonatchi | - Ka'saa chame re'bapaode, superiko den'e,
Ka'sariri on'atgenchim, rumalo katome.
Da'al salna agre uko, mikkang nikjawaha,
Mikkang nikrimpa'e rona, chinga man'jawaha.
Angni janggin ripengnara, ka'sariri anga,
Tangka sotbongako anga, on'atgenchim una.
Agan mesokgija anga, gue baksa apsan,
Rumalosa namedake, katomatgen damsan.
Jeo je'nengtakangpa'a, gue cha'angchina,
Tangka sotbongako nike, gisik ra'pachina. |
| Kalsin | - (Re'baa) Ripeng anga re'nahane, dukko man'riknabe,
Goalpara Skulode, poraijawahane.
Re'chakatna miksongenga, Dacca jillaonasa,
Birangenba poraipa'na, ua songjinma'osa. |
| Sonatchi | - Ka'saa ripeng re'angoba , angko gisik ra'bo.
Jeo brange donggenoba, angna u'iatbo.
Ha sona ra'angpa'bo, aro gisik ra'bo,
jeo ja'nengtaka unon, na'a enge nibo.
Angni nang'na ka'saan chimik, chasong tipchangiawa.
Ripeng nang'ni sokbapil'o, an'ching do'sie rona. |
| Kalsin | - Ka'saa anga re'angoba, nang'ko gisik ra'gen,
Jeo brange donggenoba, nang'na ma'siatgen.
Sona anga re'nahane, ka'ssaachi salam,
Bidanasa birangnaka, roja anga ramram.
Sona nang'na ka'saanirang, ka'tongo chipmanjok,
Gisik dukko man'beoba, ka'dimerikbojok. |
| Sonatchi | - Indiode re'angbojok, ka'saachi salam,
Isol nang'ko dilangchina, plak kengnirang.
(Re'anga) Angni janggin Sonakode, Watatbebeaijok,
Maiko dake ka'dimenok, anga ma'sijajok. |

**Ka'dimena chanchioba, gisik manijake,
Ka'gualna chanchioba, dukan matchotjake.
Jeba ong'bo Apa Isol, Jora sesopa'ode,
Gisik ka'dimena man'nok, kakket dakpa'ode.**

(Kalsin Jahas-o re'anga)

• • • • •

DAKMESOKANI-II

* * *

MESOKANI-I

DINESH ARO RIPOLI

- Dinesh - Bano songdong a'chagnok, cholkon nikpajajok
Bako chiga chiringgnok, chanchisokpiljajok.
- Ripoli - Dede bachi birangku'gen, ianon songdongainok,
Songa noka nokchakpa'ode, chiga chiringainok.
- Dinesh - Iandakode Ai anga, Nokmao sing'e nina,
Ma'a dikdik asongsobo, anga janapena.
A'song Nokma ka'saachi, dongna on'paode.
Dongaignok brangemangba, je cholko dake.

MESOKANI-II

KALSIN RAMAO SINTEANGA

(Adi gita re'anga'o, Kalsin Momin pante,
Sonatchina chanchiemung, gisik ka'pakange.
Gisiktango chanchiakon, gualpana amja,
Indioba mangsongako, dontongnaba sikja)

- Kalsin - Kasaa Sonatchiko anga, wate re'na sikja,
Maiko dake Ka'gualgen, anga chanchisokja.
Him angai maiko daknok, gisik ka'pakake,
Namgnina miksongoba, gisik majoake.
Songko noko wate re'bae, maina ong'pilgnok,
Ma'de aro Nonomangde, dukan gaptokaiengnok.
Duk sagal chipakore, angna chasong chasong,
Bon'kamjokma kusin salrang, aro angni rasong.
Atchia'on dukni mohor, ang su'dapate.
Dukko ga'akgipa mande, sukko man'jahane.
Ianjokma bon'kamgipa, angni dukni salrang.
Dongjahama on'tisaba, angna kusin salrang.
Jeba ong'bo re'baman'jok, na' song dongrikbojok,
Saa ding'a plak a'sel, na'mang nikjawajok.
Apa Isol jechi dila, uchin anga re'nok,
Jeko angna patienga, ukon anga cha'nok.

MESOKANI-III

KALSIN JASAHNI KOSAKO-UKGIL NOKONA SOKANGA

- Kalsin - Babu angna tikit kingsa on'pabo.
- Tikitmaster - Banona re'gen na'ara basik king nanga?
- Kalsin - Dacca jillaona re'gen babu.
- Tikitmaster - De man'gen. Ha tikit ra'angbo aro ta'rake re'angbo maina Jahas da'on re'chakatnok.
- Kalsin - De mitela (Tikit ra'e Jahas ning'chi napanga)
Him angai da'al salsa, Indaka biapo,
Dukko man'e re'na nangjok, Sagalni Jatchiko.
Gisik ra'e dukko man'a, anga a'songtangna.
Ma'de aro Nononaba, pil'e Sonatchina
(Dacca jillaona sokanga)
Gisik miksongatangona, sokbapa'man'jok,
Dacca jilla'ona soke, re'na ma'sijajok.
Apa Isol Ka'sagipa, angna dakchakpa'bo,
Angni plak dukrangko, na'an chelchakpa'bo.
(Ukgil Gureo gakate re'ba'a)
- Ukgil - Bachina re'gipasa na'ara? Badia songoni pante na'ara?
- Kalsin - Anga A'chik a'songoni, bidana brangbaesa,
Sokbapaha da'o anga, Dacca jilla'ona.
Sokbae anga a'song gipin, re'na ma'sijaha.
Ka'sae nokchakgipachide, re'gen paraipa'na.
- Ukgil - Oh, pante na'a poraina skenggipa ong'ode,
hai angni nokchina re'bo. Na'a angni noko
donge poraina man'gen aro anga dakchakgen.
- Kalsin - Babu, anga nang'ni ka'sae dakchakanina namen
mitelbea aro anga nang'baksa re'na kusi ong'a.
- Ukgil - Hai indide, angni gureo gakatbo. (re'anga)
- Kalsin - (Attam tue) angni Miksongatangona, dao sokbapa'ha,
Isol angna ka'sachake, chu'soke dilbaha.
Uni gimin da'o anga, poraiangtaignok,
Baditana cholko man'a, krenge nitaignok.

MEAOKANI-IV

JOENDRO ARO MALSIN GOLPO KA'A

(Sonatchini dukrangkode, maiko anganku'gen,
Pagol daktokenga ina, panterangde unan,
Joendrode salantian, gisik una saljok.
Malsinbani salantian, uchin re'angpa'jok)

- | | | |
|---------|---|--|
| Joendro | - | Jong Malsin nokonma? |
| Malsin | - | Nokon, mama. Mainaba re'barama mama? |
| Joendro | - | Dongja jong, noko tue rooba aratanasa
robaaia angade, Nang'chi roe golpo ka'e rona
inesa re'baaia jong. |
| Malsin | - | Oe, mama nokoba rona aratpil'a. Kam ka'na
re'on nambata. Hai buiring rona mama. |
| Joendro | - | Bibalrangni gisepode, golap nitobata,
Me' trarangni gisepode, Sonatchi silbata.
Aganpa'bo jong Malsin, nang'ni miksongako,
Knae kusi ong'panadong, nang'ni mikchaako. |
| Malsin | - | Mama angni miksongako na'ade ma'sijawa.
Mijalosan aganachim, na'ade gualjokma?
Bi'sa'onin, nitonika, me'tra Lokkikosa,
Gipin Nomil kraa dongja, ia songo me'tra. |

MESOKANI-V

SONATCHI ARO LOKKI GOLPO KA'A

(Joendroming Malsin da'nang, gisik chanchiengjok,
Sonatchimung Lokki knae, nina sikjaengjok.)

- | | | |
|----------|---|--|
| Sonatchi | - | ACHak gonggol sakgniko, anga nina sikja,
Jari ong'ja gisikode, an'tangnade seng'a
Umang gita pantekode, mamung salo' nangja,
Apan sing'e on'genoba, anga ra'e roja.
Nang'ko den'e galgen ine, mama aganoba,
Angni janggin sisrangchina, rongja nisichina. |
| Lokki | - | Ama Apan dra'oba, Mikgron miksik bu'a,
Semanjaoba ra'e roja, anga jari ong'ja
Malsin Achak gongolkoan, nina sikjabata,
Uni bimung knarian, nikna sikjaata. |

MESOKANI-VI

JORONGONA DINESH ROANGA

(Dinesh Sangma ine minga, ua pantekode,
Sangma babu ine segen, uko ja'manode.
Uandake anditani salni ja'manoa,
Mymensingni brangba'e, umang sokbapaha.
Ua mande kristianna, man'e cha'paachim,
Depanteba saksamangmang, ua dong'paachim.
Depanteba nitobea, gisik gnanggipa,
Metricode pass ka'jok, a'ning gisikbita
Re'angaha ua pante, songko dilgipaona,
Sing'na ine re'angaha, Jorong Sonapaona)

- | | | |
|--------|---|---|
| Jorong | - | Bachisa re'a jong? asongbo mainaba re'barna? |
| Dinesh | - | Angade on'tisa kam dongani gimisa re'baengachim.
Na'an ia songni Nokmama? |
| Jorong | - | Oe, angan ia songni dilgipa ong'para.
Angko mainaba nangama? |
| Dinesh | - | Angni re'baani a'selde, chinga a'song gipinoni
re'ba'ani gimin, ia nang'ni a'doko, a'song
Songdongpa'na, chiga chiringpa'na inesa bi'na
re'baengachim. |
| Jorong | - | Na'simangara badia songonisa aro mainasa ia angni
a' songona katbara? |
| Dinesh | - | Chingni obstakode maiko agangen. angni pagipara
dongjaha aro chingko nirokgipa darangba dongja uni
giminsa, chinga ma' ningsade katrorobae re'rorobae ia
biapona sokbaaijok. |
| Jorong | - | Oh, indakode, mamungba namgijani dongjaode, na'simang
dongna man'a, indiba songni namnikaniko anga ra'chengna. |
| Dinesh | - | De indakode, namen mitelbea, anga re'skanaha. |
| Jorong | | Da'mo jong, on'tisa asonge sengkubo. Mamingba dongjaoba,
cha mangmangkode ringe re'angbo. |

MESOKANI-VI

DINESH JORONGKO GRONGNA RE'ANGTAIA

(Dinesh Sangma pantenaba, chaa re'bapajok,

Forget-me-not sea donga, Cup-o on'atman'jok.
 Uko nike Dinesh Sangma, ringnan gualaha,
 Adi gita ringangoa, ka'saa napangaha.)

- Jorong - Oh, na'a sokbataiahama? Mija nang'ni janapanggipani
 giminan sing'na re'bataiakonba?
- Dinesh - Oe, mama uarangko sing'jola gitasa rona re'baaia.
 Songni koborkode ta'arakalen ra'na nangani gimin
 re'bataina nangaiaha.
- Probalin - Re'baoba robaoba maiko cha'na, jong. Asongchakna
 mangmangba biaprangan dongpaja. Ha iano asongbo, jong.
- Dinesh - Chinga ma'ningsade dongchaknan biapkon, man'pasrangkuja
 aro ia biapona re'baa ru'utpakuja.
- Jorong - Songde nokde na'simangni ia songo dongani giminde
 mamingba champengani dongja. Charangko tarie on'atpabora.
- Dinesh - (CHA RINGMANE) De mama, mani anga re'skanaha.
 Chiring milsi pie rona re'angkuna, intangode salnigen.
- Jorong - De re'angbo (Salam ka'e Dinesh re'anga).
 Oh, mingsa jamangengake, nang'ni
 Nokmani seata lekakode nanggenne, jong, ra' bapabo.
- Dinesh - De ra'bana man'aigenba.
 (MILSI PIA) Anga pante milsi pina, namen bimchipbea,
 Salantian wariosa, salan naprongaia.
 Ia koksi do'bokoa, gape man'paode,
 Toa me'su baksa song'e, cha'bo patidokde.
 (MILSI PIGEN)
 Koksiara gapmanaha, maio ra'chakku'gen,
 Somoi man'o knal salo, anga re'bataigen.
 (MILSI PIMANO BOL JA'PANGO ASONGE CHANCHIA)
 Anga chame Sonatchina, chitti seataina,
 Maia ong'gen mikkang salchi, ma'sisona amja.
 Uni gimin seatjawa, me'chik suuri ong'ja,
 Me'chik skang sechengjaode, jatni bewal ong'ja
 Uni gimin gisiktango, mikchaa namnikoba,
 Nomil skang sechengjaode, tom'tom dongaiku'na.
 Songjro nokjro mitakaigen, pante me'chikrusa.
 Indioba Sonatchini, chitti seatpaode,
 Aganchakgen miksongako, gisik mandesale.

MESOKANI-VIII

SONATCHI TUSIA ARO SA'GRERANGKO JUMANG NIKAI.

- (Jumang)
- Sona na'a gisik ra'bo, bobil sokbaenga,
Malsin aro Joendromang, sekna chanchienga.
Joendroni Dinesh pante, bobil dakgenoba,
So'otnade man'srangjawa, ua indioba.
Umang sakgnian da'nang, bobil dakgriktokgen,
Dakgrikeming Dinesh Sangma, Joendroko gogen.
Sona na'a gisik rakbo, aro bobil bang'a,
Dal'begipa matcha mangsa, chikna timsoenga.
Dinesh Sangma pante chabae, Matchako dakgriksen,
Dakgriksenba mil'amtangchi, dene so'otsranggen.)
- Sonatchi
- (MIKGRAKE) Maia jumang do'bokkosa, anga nikmanjokai,
Nika jumang gita a' sel, ong'bebegenmasai?
Dinesh aro Joendrona, bobil sakgnia,
Angni be'en bimangnara, mikbokjokma bia?
Jumanganma mikgitalma, anga ma'sijaha,
Bebe ong'genchimodene, jeba ong'chinaha.
Dinesh pante do'bokkoa, maian dakpilgnok,
Mikkang bimang mangmangdeni, daknangpa'a da'nang,
Bidabani Metrikkode, matchotpa'jok seng'nang.

MESOKANI-IX

SONATCHI CHI KO'NA RE'BARA, MATCHA GRONGA ARO DINESH UKO JOKATA

- (Me'chik Sona chanchisokjae, gisik salangpa'jok,
Dinesh Marak kamko nie, ka'satangko watjok
Manderangba chanchienga, Sonatchini kamko,
Kalsinkode gualange, miksonga gisiko.
Sonatchiba ka'sanapjok, Dinesh pante nama,
Janggitangko on'chakenba, uko jokatana.)
- Sonatchi
- Aiao, Matcha chabaengjok, janggi nasignok,
Chabaenba ang' janggiko, sawa naljokatnok.
Apa na'a gong'rakbabo, maisa dakchaienga,
Songni nokni manderangba, darangba chabaja.
- Dinesh
- (Chabara) Na'a matcha buring mangmang, angko chonikama?
Amra ansopa'jaode, katbo bakbak na'a.
Janggi gimana'siode, angko nitatku'bo,
Indioba pa'jaode, an'pile re'angbo.

Dinesh Sangma Ka Goera, bobil dingsrangainok,
Anga nang'ni chengknako, chite so'otsrangnok.
(Matcha chabara aro Dinesh Matchako dakgrika)

- Sonatchi - Ha chiko ringatpa'bo, namen neng'beaha,
Angni janggi sigiminchim, na'asa jokataha.
- Dinesh - Nang'ko sawa jokataha, da'ode chanchipa'bo,
Mikkang salchi jokatako, na'a gisik ra'bo.
- Sonatchi - Nang'ni angko jokatako, pangnan gualjawa,
Gipin jikko ang'jik inna, nang'naba namjawa.
- Dinesh - Re'anggimin salrangoba, anga etalrongja,
Ramram bal'ekarigipa, anga pante ong'ja.
- Sonatchi - Nang'ko etalronga ine, anga chanchiku'ja.
Ning'tukal'e chanchinaba, chame Apa nanga.

MESOKANI-X

JOENDRO ARO MALSIN ME'APARANGNA MATCHA GOA INE TOL'A

- Joendro - Aiao, angaba Matcha dakgrikara namen neng'beaha.
- Malsin - Aiao, ia matchakora sawasa so'otjoksai, jeba
so'otchina, anga ia matchako so'otaha ine manderangna
agangen.
- Joendro - Ong'ja ang' Gri, angasa matchako so'ota ine
manderangna aganchenggen.
- Malsin - Oe, mama uan nambebegin, Hai re'naha, (Re'anga)
- Joendro - (Songona sokange) Oh, me'aparang, chinga matcha
mangsako so'otaha.
- Malsin - Ninakode hai plakan re'tokbo, Ua chigat sambao
Sie dongengaha.
- Me'aparang - Hai chang indide, tol'ama bebema, re'e
nisrangna.
- Sonatchi - (ong'katba'e) -- Knadika knana sikja, da'a rasong daka,
Sakgipinni dakgrikana, da'a gaora de'a.
Dinesh Marak pante da'nang, namen dakgrikbejok,
Dakgrikenba mil'amtangchi, den'e siatangjok.
Dinesh Marak janggitangko, on'e dakgrikengo,
Joen Malsin sakgnian, dongpaja a'damo.

- Me'apa-1 - Haitere, mainasa iandake, chinga me'apa
budeparangko tol'a.
- Meapa-2 - Sonatchiara Dinesh Maraknan an'tangni janggi jamako
matchani jakoniko naljokatani gimin mikchaa namniksrangahama?
Skangode Kalsinkosa mikchaenga ine knaachim.
- Me'apa-3 - Oe, da'nang, an'tangni Janggiko jokatgipana ka'sajaode
Sanasa ka'sagen.
(Joendro aro Malsin golpo ka'a)
- Joendro - Jong, Malsin, da'oara Sonatchini gisikrangede namen
dingtangbeaha gita nika. Sonatchide Dinesh Maraknasa
an'tangni janggiko jokatani gimin chanchiskaengaha
gita nika. An'chingara unoniko maidake chel'atna
man'gen?
- Malsin - Maina neng'bee chanchiaigen mama, uko dingtanganide
namen buti bang'bea.
- Joendro - Indakode, mai butiko dakgen, jong ? Mai butiko dako
nambatgen angnaba chanchirima gita aganpa'bo.
- Malsin - Mama, an'chingara, uko beng'o kango man'jaode, uni
Janggiko nisirange galaina. Ango atchuni slai pongsa
donga uchin goe galsrangaina.
- Joendro - Nambebegin, jong, ukon an'chingde daksrangaina.
Hai re'naha, (Re'anga)

MESOKANI-XI

DINESH-NI MILSI PIAKO, JOENDRO ARO MALSIN GOA

(Dinesh Marak Milsi pina, namen bimchipgipa,
Salantian kusi ong'e, milsi pironggipa.
Uandake da'aloba, Chiring ka'sinachi,
Re'angaha ua pante, Milsi jakbitari.
Dinesh Marak pantekode, Malsin Joendrode,
So'otsrangnan chanchiengjok, U'mang sakgnide.
Ua pante bobil ginal, manang dakpajachim,
Bi'saonin ua pante, torommiparachim)

- Dinesh - Dinesh Marak pante anga, Milsi piangode,
Ka'satangba ki'sang ki'sang, koksi ra'bitode,
Gal'mak, Mibak jarango, balroroba bala.
Dikdiksaba mikchatangming, roon an'sengkala.

Anga pante milsi pina, namen bimchippipa,
 Salantian wariona, salko re'atgipa.
 Ia koksi ra'bitgipa, gape man'ahaode,
 Nama me'su baksa cha'bo, jringjring patidokde.
 Aiao, Koksi gapahake, maio ra'chakku'gen,
 Gong'oara knal salo, pil'e re'bataigen.

(JOENDRO ARO MALSIN DINESH-KO GONA TIMA)

- | | |
|---------|---|
| Joendro | - Dinesh Marak da'alora, bachi re'angenggen,
Nokongenma bachigenma, hai sandie nigen. |
| Malsin | - Reangjawa darangchiba, milsi pirongenga,
Da'si anga nikatenga, wari re'angenga. |
| Joendro | - Indakode nambatsranggen, ramao timsoaina,
Buring grimo timsoenba, uko gosoaينا.
(Dinesh Marak milsipongko ripe'e re'bara) |
| Malsin | - De goatboaha mama, da'on nammiting. |
| Joendro | - Da'mo jong on'tisa sepangbakuchina.
Sepangona sokosa rim'e sing'e gogen. |
| | - Dinesh, na'a chingni bobil ong'a, da'alo
nang'ko mai dakbo ? |
| Dinesh | - Bobil ong'ja ginal ong'ja, maina nina sikja,
Kema ka'pabone angko, anga bobil ong'ja.
Namnikjaoba gopanabe, angko kema ka'bo,
Angni dos donggenode, knal bichal ka'bo.
(Goe kattanga.....)
Jasokjani Skalrangde, angko bobil dakjok,
Him angai da'al salsa, indaka dukona,
Sakna'e dongna nangjok, buring jatchiosa. |

MESOKANI-XII

DINESH GOAKO MAN'E NOKONA RE'BARA, RIPOLI. DONGSOA.

(Aditani ja'manoa, an'tangan chakatjok,
 Him angai dukko man'e, ua grapbejok.
 Siaoni tangchapil'e koksi kolampil'e,
 Re'angaha noktangchina, rang'sa malambrake.
 Manderangba chanchienga, Malsin Joendroko,
 A'sel grian nina sikjae, bobil dingengako.
 Dinesh Marak bobil gnal, da'nang ong'pajachim,

- Nina sikjae bobil dake, uko goahachim)
- Dinesh - Ai angna chiko ritbo, maiba a'sel ong'jok,
Siaoni tangchapil'a, ui'sokpiljajok.
Jako sa'dikana nio, pari nikrikaijok,
Name dake nioara, jakan napongman'jok.
- Ripoli - Maia a'sel ong'galgaljok, dede da'oara.
Saoba maiba dakatjokma, Do'ma nang'koara?
Indinari matja bu'ja, a'sel dongna nanga,
Kakket aganpa'bo dede, a'sel dong'mot maia?
- Dinesh - Jeba ong'chinaha ama, maiko aganku'gem,
Songna nokna jangatoba, an'ching namja ong'gen.
Uni gimin jripjrip dongbo, kajia ka'nabe.
Bon'kama'o mesokaigen, dongaibo nisenge.
- Ripoli - Jeba ong'bo samko holko, bakbak ra'na nanggen,
Songo saksa Oja donga, rimenade nanggen.
Do'ma na'a dongsoku'bo, anga re'angkuna
Re'baoba re'bajaoba, rime nieku'na.

MESOKANI-XIII

KALSIN MA'DETANGNA CHITTI SEATA

- Kalsin - Angni ka'sabea Ma'de, aro nono Lokki,
Ka'dimea kattachisa, anga seatenga.
Da'ode anga sokbapa'jok, Dacca jila'ona,
Dongpaenga chi'chetgipa, Novapur Road-osa.
Ade anga bang'pagija, katta seatenga,
Da'o dipet mangmang anga, an'seng dongpaenga.
Nokgipani ka'saachi, anga cholko man'jok,
Saksa Ukgil babu nike, da'nang dakchapa'jok.
Uni dakchakako man'e, Skuloba man'jok,
Gisik nange poraiachi, class dororonok.
Bida angna donsoode B.A. matchotsrangna,
Cholko man'kuenga dipet, anga jotton ka'na.
Uni glmin Adenaba, Nono aganpa'bo
Nang'ni sari Sonatchina, Salam aganpa'bo.
Segnirang bang'beoba, ianon dontongpa'nok
Basakoba chuti man'o, nokchi re'angpanok.
Bon'kamao Ade na' song, nokgimiknan Salam,
Nokgipa'o bi'aniko, gualnabe pangnan.

Nombor chi'chetgipa nokde, gisik ra'bo angnin,
Ka'saachi seatenga, Dede Kalsin Momin.

MESOKANI-XIV

NOBARI ARO LOKKI CHITTI MAN'SOA.

- Nobari - Aiao, da'nang dede sonan, chitti sokbapa'jok;
Maikon seatpa'enggenchim, intang porainok.
- Ai Lokki nang' dada Kalsinni chitti sokbara.
- Lokki - Basakko sokbara, ma'de?
- Nobari - Da'osamangmang sokbara, ha poraie nibo.
- Lokki - Baosa dadani chittiara? Ma poraie nina.
- Nobari - Ha poraibo (chitti poraia)
- Lokki - Aiao, gose dadan rasong, namen nambeaha,
Nokgipani ka'saachi, bida man'angpaaha.
Da'mo anga sarinaba, agannepa'kuna,
Knasoe saribani, kusi ong'pachina.

MESOKANI-XV

LOKKI SONATCHIKO GRONGNA RE'ANGA

- Sonatchi - Sket sket mainasa, sari re'bapaenga.
Kakket aganpa'bo maia, a'sel chong'mot ong'a.
- Lokki - Maina re'bagende sari, nangbeade ong'ja
Indioba miksongako, paraknade sikja.
- Sonatchi - A'an Matcha chikchinawai, sari aganpa'bo,
Nang'ni bochi Sonatchina, na'a ka'sapa'bo.
- Lokki - Mijoara na'ra ango, maiko sing'epajok,
Dada Kalsin chitti sea, da'alo sokpapajok.
- Sonatchi - De sari mesokpa'bo, na'a ra'bitbaode,
Knapa'na sikpaengjok, katta nang'bochide.
- Lokki - Bochi anga ra'bitbaja, na'a duk man'abe,
Dada Kalsin nampaenga, na'a jajrengnabe.

MESOKANI-XVI
KALSIN SONATCHINA CHITTI SEATA

Angni ka'saa ripeng nang'na, ku'rang on'atenga,
Kan'dikbea kattarangchi, chitti seatenga.
Angni donga Dacca jilla, saliramchipaksa,
Da'o donga biapkode? Novapur Road minga,
Basakoba seatode, ian a'tip ong'a.
Nokgipani dilbarachi, mangsonga biapo,
Poraipa'enga name donge, Ukgil babun nokko,
Nang'ni ripeng seatenga, Kalsin G. Momin,
Ka'sabe'e jakran jakchi, salam on'atenga,
Seanio gualode, kerna bi'atenga.

MESOKANI-XVII
SONATCHI CHITTI MAN-SOA.

Sonatchi

Angni Ka'saa Kalsin momin, da'nang nampaenga,
Ka'sabe'e kingsamangmang, chitti seatenga.
A'gilsakko bida man'a, ua ka'waksie,
Birangangjok jawan chiga, janggitangko gale,
A'gilsako bida buti, skia man'oa,
A'gilsakan mande ra'a, aro birong channa.
Da'o ua birangoba, poraia chu'sokpaode,
Songko nokko dilcaigen, ua re'bapil'e.
Jeba ong'bo angabani, chitti kingsa sena,
Knasoe kattarangko, kusi ong'pachina.

(Sonatchi chitti sechakata)

Angni ka'saa Kalsin Momin, chitti seatenga.
Angni chitti man'soenba, gisik ka'dimena.
Ripeng angni dukko nang'na, maiko u'iatgen,
Poraiaiko matchotahao, sokbaon ma'siaigen.
Hajal angko ruraoba, gisik dingtangjawa.
Angni nang'na ka'saani, chiring tipchangjawa.
Gisik dukko man'e na'a, jadip changpanabe,
Miksongaona sokgijade, ja'gam de'sretnabe
Nang'na sa'an Kalsin Momin, jajrengchakataia,
An'tangnade name dongna, anga ka'dongaia.
Nang'ni angko gualoba, Sonatchide nang'nin,
Walni mikjumango nang'ko, niksoronga pangnan.
Bilakgipa chipakkore, angko satdapoba,

Nang'na angni ka'saako, kimmitgallangjawa.
 Hajal katta parakatna, angongdonggenoba,
 Bon'kama'o ka'sa'achi, salam on'atenga.

MESOKANI-XVII

PROBALIN JORONGKO NOKONIKO RIKGALA : CHEMIN, SONATCHI

- | | |
|----------|---|
| Probalin | - Budepa na'ara noko jamoba dongja, aldu mittangnaba simsakja, nokoni kattangsrangbo. Anga an'tang saksanba am'e cha'na choliaigen. |
| Sonatchi | - Ai, chingade Apana ka'sara nokoni re'angna on'jawa. Apani kattangode, sawa chingkoara nirok sandiku'gen aro aldu mittanggen. |
| Probalin | - Nang'pa Jorongni noko dongjaoba, anga nang'ni ma'gipade sikujake. Noko dongoba, indin donggijaming apsan noknan jamnan simsakja. |
| Jorong | - Da'aloinin nokoni ong'kattangbo dongna man'jawaha.
Nang'ni angko namnikjaha aro ka'sajahaode, da'on kattangaignok. Anga an'tangni dedrangna ka'saoba angara mai mikgilo dongkugen cha'kugen. Buchuma'an rakkina sikjahaode re'aignok, an'tangni ma'bisa Nobisani nokchina. |
| Probalin | - Kattangbo, re'angbo da'on kattangbo. |
| Chemin | - Aiao, abi, gumeni nama namgijako aro dakgualarangko nikoba, changsa pil'sakode kema ka'grike dongtokbora Nokdang ong'e sawade hai kajia ong'ja indiba ka'saon kema ka'grike dongachisa nokdangko rikna man'a. Kema ka'grike dongtokbo. |
| Probalin | - Badita chang kema ka'kugen, changsa pil'sa ong'ja. Angade inditanade so'mal anggal chake roja. Rakkijajok jechiba kattangchina re'angchina. Angni noko dongna man'jawaha. |
| Chemin | - Angni anganako katta ra'na sikjaode, na'simangsa indiba ja'man ja'wilo angko agan mitakna man'jawa. |
| Jorong | - Nang'ni abian ka'sajahaode aro rakkina sikjahaode, angaba mai mikgilo dongkugen cha'kugen, re'aignok. (Jorong kattanga). |

MESOKANI-XIX

JOENDRO ARO MALSIN GOLPOA

- Joendro - Jong, angnade mamama'ang Sonatchiko Chaware Sing'na am'engana, Mamatangni demechik ong'ani gimin jechakna skoba namja jong. Metrade silla nomil doon doon. Seko pakoba mande ra'gen birong changen gita nikamo jong?
- Malsin - Nang'ni mama adani sing'e on'ode ra'aibo mama, na'ara baditana pante rochaigen. Unbaksanaba, mamatangni demechik ong'ani gimin, nang'ni mama aro maniko na'an aldu mittange siatjaode sawa siatgen. Indiba, sakobarang ka'a aro mikchaa namnikanirang dongama dongja ukosa namedake sandichengbo. Sakoba ka'a dongode namjawa, bobil ong'grikgen.
- Joendro - Sonatchide skangode Kalsinkosa mikcharachim ine knaa indiba da'ode Kalsinara songo noko dongja aro poraienga, haida uaba sakgipinko ka'skaenggnokkon. Uni gimin Kalsinna agrede darangba dongja ine angna agangiparang donga, jong.
- Malsin - Kalsinna agre darangba dongja ong'ode ra'aibo Mama. Chaware sing'on jechaknabe. Indiba, Sonatchi nang'ko ra'gija jegala dakode bisi on'e so'ote galsrangaina, mama. An'chingara uamangni nokchi roa dake aro banoba ramarango gronga ong'ode guerangko on'e bisi on'a man'aigen.
- Joendro - Nang'ni aganna gitan nambebeaigen, jong. Sonatchini siomangba an'chingkoara darangba bisi on'a ine mas'sijawa.

MESOKANI-XXX

JORONGKO NOKONA RIMBAPIL'A

- Sonatchi - Ai, Apade banoba saksansa brange darangba nirok sandigipa donggija dongaienggnok. Ama, an'chingara Apa dongoba donggija sia bon'a gita nikaia aro gisik ra'aaia, nokona rimbapil'bo.
- Probalin - An'tang skatangde re'bapil'jawa. Nang'ni mama

Cheminko rimepil'china aganna nanggen. Oe na'a, denggu dakana rikgaloba, mikkango nikjaoara ka'sara, budepanaba. Una intango ka'sae rimpilba'oba, denggu daktaigenma? Jeba ong'china ian changoba, kema ka'taie changsa Pil'sakode rimpiltaie nina nanggen.

- Chemin** - Angan skango'on na'simangkoara iandake dakgen inen ripbrangatnabe, kema ka'grike dongtokbo ine aganachimba. Da'osa ka'sana changaha, Hai rike nibo, rimpile nina. re'bapil'ama re'bapilja.
- Jorong** - (Jikdrang dedrangko niksoe) Na'simangara mainasa re'bara? Re'angpil'tokbo, skangon na'simangara angan Ka'sajaen a'rikgalatman'jok. Angade re'piljawaha, ja'man ja'wiloba iandaken daktaiaigen angkoara.
- Probalin** - (grape) ang' Se racha, angni gualako ia changsamangmang kema ka'pabo aro nokchi re'pil' bo. Nokan jaman seng'dangdang gose ang' se dongjaoa, a'gilsakan andala senoktangko nikjaoa. Hai re'pilbo nokchi bedepa.
- Jorong** - Re'piloba ja'mano aldu mittangrakjaode rikgale galataiaigenkon angkoara. Branga branga, da'on namenga saksan brange cha'chedamai ki'gongdamai gitilaignok, re'piljawaha.
- Chemin** - Ong'ja boning, changsa pil'sakode ka'saon kenia ka'grike nokchi re'pilbo. Ia abian namja (abitangko gitok on'e doka) Gume abina ka'sajaoba, ia nang'ni demechik Sonatchi donga aro chinga nang'ni mosa boning chratang depante donga, chingchiniko mikkang nie pil'c chanchitaie re'pilbo. Abini ja'man ja'wilo namtaija ong'ode chinga dongaba.
- Jorong** - Jeba ong'chinajok, hai indakode, changsa pil'sakode re'piltaie nignok. Ja'mano duk man'taigen ine re'pilmade sikjachim, indiba angni mosa boning, sadu sade gimikchuko niate re'pilaignok (Re'angpil'a)

MESOKANI - XXXXI SONATCHI ARO HORENDRO

(Sonatchi Sangma da'nang, dukko man'beengjok,
Maiko dake naljokgnok, ine chanchiengjok.
Cha'uenba donmanaha, Matchani bisiko,

- Sorotnasa donsoman'jok, an'tangni janggiko)
- Sonatchi - Joendroko ra'an palde, segri rosrangaigen,
Agremancha dra'ode, janggi sistrangaigen.
Ia angni jakko bottle, donga matcha bisi,
Dukko chake dongan palde, namgen siangachi.
- Jorong - Da'a agre duk man'a Ama. Nang'ni dada Horendrona
chitti see, nang'ni plak dukrangko agan parake
u'iatbo. Ua nang'na maikobade ku'patianiko on'atgen.
- Probalin - Oe na'a, maina indita duk man'a nanga. Na'asa, nang'ni
Ma'gipani kattako ra'na sikjaode, chinga
buchuma budepade, chu'dapsiko Achak gita rengkonne
siboma? Chinga buchuma budepade game sue cha'na
amjaenba aldu mittanggipako nangengjok, uni giminsa
na'ara segipa kimani somoiara ong'engjok, unasa
an'tangni gritang sokchiko sandie nipana am'enga.
Chingni dukrangkoba chanchiate nipabo. Ama.

MESOKANI - XXXII

SONATCHI HORENDRONA CHITT SEAKO MAN'E RE'BARA

- (Horendrode bi'saonin, Jorhat Jila'osa,
Re'angaha ua da'nang, mistry kamko ka'na
Bi'saonin re'angani, Pante sokpilaha,
Rebaoba ma'detangde, ma'sisopiljaha)
- Sonatchi - Dada na'a sokbajokma, Jorhat Jillaoni,
Chutti man'e re'baama, porika seaoni,
Dada angni dukkode, na'aba knapa'bo,
Knaenba kattarangko, na'aba sandie nibo.
Joendroko angna da'o, sing'e on'akenga,
Anga ra'na sikipajachim, angko draenga.
- Arendro - Jeba ong'bo nono na'a, gisik duk man'abe,
Nang'ni kattarangni gimin, anga chanchigenne.
Ama Apa aganoba, nokdang ba'ku dakna.
Poraiku'na cholko ra'na, anga ku'patia.
- Sonatchi - Dada nang'ni chuttiara, basakko matchotgen,
Porikade namatama, basako knagen?
- Arendro - Nono anga porikade, seade namachim,
Maia ong'gen kna'osa, anga ma'sigenchim.

Nono na'mang namengama, chittiba seatja,
Songni nokni obostako, knana sikpara.

- Sonatchi - Dada angko maiba cholchi, chel'atna man'ode,
Chelchakpa'bo momolachi, Joen' jakonide.
Angko jeba dakaichina, ra'ja Joendroko,
Apamangni dra'ode, katgen songchel'ao.
- Arendro - Ong'ja nono katna nangja, mikchachong'motjaode,
Jegaleba joksrangeaibo, Dora do'sijaode.
Mama ada draode, angan chelchakaigen,
Nang'ni miksongatangona, sokna jotton ka'gen.
- Sonatchi - Dada nang'ni aganako, anga pe'galjawa,
Angni dukni salrangosa, chelchakpa'bo angna.
- Arendro - Ama Apan dukko aro, na'simangni sukko.
Nirokani angni kaman, nang'ni jora ra'jao.

MESOKANI-XXXIII

JORONG ARO HORENDRO SONATCHINI GIMIN GOLPOA

- Jorong - Dede chingade buchuma, budepa ong'ani gimin, game
sue cha'na, nokrik nokdakna amangjaha, uni gimin angade
an'tangni gritang sokchi Joendroko, nang'ni
Sonatchina sing'e sanne nina chanchiengacbim.
- Arendro - Oe, Apa aro ama, na'simangni buchuma, budepa
ong'e gamna suna man'gijakoba nika nikade, indiba
nono Sonatchide ra'na dongna sikkuja inesa aganenga.
Uni gimin on'tisa sal somoirangna nisenge nikuode
namgenkon.
- Jorong - Sonatchini ra'na dongna sikuja ine agangenchim
ong'oba, chingan draaigenaha. Chingara badita sal
somoirangna duk mar'e game sue cha'na amjae, na'simangko
alduchaigen.
- Probalin - Sonatchiara, buchumapile poraigenmade, Chingan
basakko jakgimin cha'e siangkagen. Uni gimin
ra'na dongna sikkujaoba ra'aichinaha. Nang'ni mama
adarangko aganate attamsa sonatchiko sing'rok
sanroke nie tik ka'e on'srangaiboaha,
- Jorong - Oe, na'a chingan basako jakgimin cha'e siangkagen.
Uni gimin ta'rakkalen, tik ka'e on'srangaion

namaignok.

- Arendro - Apa, na'simangni namnika gita sing'e sanne nibo, indiba anga an'tangde Sonatchikode drajawa. Sonatchini angna an'tangni poraiku'na skaniko aganani giminsa una anga gipino nokkol napemangba poraiangkuna cholko on'a chanchiengachim.
- Probalin - Bosakona poraiatkugen, segipa kimani sal somoirangba ong'aha. Knal attamona nang'ni mama adarangko anganattokbo, da'on chudik me'dik song'aba on'tisa dongkuenga.
- Jorong - Nambebegin. Horendro, da'on na'aba dongenga, nang'ni mama adarangko, Cheminmangko knal attamona sonatchiko Joendrona sing'rok sanroke nina am'engana ine anganattokbo.
- Arendro - De, anga mamamangko aganattokode nina man'gen. Mamamangni mikkango Sonatchi jekoba agan parake on'srangchina.

MESOKANI-XXXIV

SONATCHINA JOENDROKO CHAWARE SING'A

- Chemin - Abi, gume nokonma?
- Probalin - Nokon, Jong.
- Jorong - Ah, Boningma'ang sokbahake. Asongbo boning. Noreng, de song'arang dongode, de'bae on'bora.
- Probalin - Da'mo anga re'ange nina, dongengama dongjaha.
- Chemin - Mijal attamo, angni gritang Horendroni, Sonatchina Joendroko sandie nina aganatenga inani giminsa re'baaia chingade. sonatchini ra'na siggijako na'simang draenga ineba knaani giminba re'bajole nienga. Namchik Sonatchiara bachisa re'anga?
- Probalin - Nokon donga darangchiba re'angja. Ai Sonatchi, nang'ni mamama'ang re'bara, re'baku'bora.
- Jorong - Gong'gijakode anga draja, tol'a inode da'omangba na'simang sing'e nibo.
- Sonatchi - Mainaba okamatama, Ama?
- Jorong - Iano asongbo, Ama. Nang'ni mamama'ang nang'o sing'na

nangnikanirang dongana, jekoba na'a aganchakbo.

- Chemin** - Sonatchi, chingni da'al attamo re'baami kattade ian, nibo, Sonatchi nang'ni ma'gipa aro Pagipa buchuma budepa ong'e gamna suna amangjaha, uni gimin na'a an'tangna a'gilsakni jora ripengko ra'e, uamangko nirok sandie mikkimite ja'mejoate siatna nanggen. Da'o nang'pa nang'na an'tangni gritang sokchiko, pante Joendroko chanchiengana. Na'ara namnikaigenkonba aro mamingba jechakani dongjawakonba?
- Sonatchi** - Mama, angade da'o dipetde a'gilsakni jora aro ripengko ra'na miksongani dongkuja, angade poraiku'na sikkuenga.
- Probalin** - Basakona buchuma ong'pile poraiku'gen. Nokon dongaiboaha ong'jaode chinga buchuma budepakoara sawa aldumittangskagen?
- Jorong** - Oe, na'a, Ama na'a poraiangkuna skugenchim ong'oba, chinga nang'ko dakchakna gitaba chol ong'jawaha. Aro na'a ant'tangba ma'siaienga chinga buchuma budepa amangchong'motjaha, uni gimin na'an chingna ka'saode nokon jora ripengko ra'e dongaiboaha.
- Sonatchi** - Ama, Apa angni poraiangkuna skenchim ong'oba, na'simangan angko poraiatkuna sikjahaode, na'simangni ska gita ong'aichinaha. Indiba, mama angko na'simang jeba dakbo, Joendrokode ra'chongmotjawa.
- Chemin** - Indakode, sonatchi na'ara sakosa namnika aro mikchara uko da'o chingna aganskabo. Nang'ni pagipa, Joendroko an'tangni gritang sokchi ong'ani gimin, nokdango an'tangni pal donangskana namnikengana. sako gipinkoara man'gen. Gipnni de gipin ong'aignok, nirok sandijawa aro ka'sajawa ine nang'ni pagipa aganenga. Gume, sakgipin saoba dongama?
- Jorong** - Angade sakgipin gritang sokchide Joendrona agrede dongja.
- Chemin** - Sonatchi, namedake chanchitaie agane nibo. Joendrona agrede darang gipinde dongjana. Namnikgenkonba. Na'ara mandenasa namnikjama ba uni kamrangkosa namnikjama?
- Sonatchi** - Mama, angade munggnikon namnikja aro na'simang angko Joendrona dragenchim ong'ode, angni ska gita Jekoba

Dakgen. Darangnaba aganjawa mesokjawa aro Joendroko ra'e dongan palde anga ia a'gilsako janggitangna chanchisoa dongja. Olmak jako ra'genne, bolgong besa kagenne.

- Chemin - Atcha, sonatchi jeba ong'china, ia nang'ni plak chanchianirangko chinga namnikja, uni gimin na'a pil'taie chingko mik kang nie chingni katta gitan ku'rachaksrangaiboaha. Maiba duk a'selrang donggenchim ong'ode chinga dongaba, chingna aganaibo.
- Sonatchi - Angni ka'saa mama ada, pil'e agantainok, plak a'sel ong'genoba, nang'ni katta ra'nok.
- Chemin - De, indakode sonatchi nang'ni kattarangde namaha, mitelbejok. Indiba, knalo nang'ni kattarangko. pe'tainabeaha aro chingko kratcha'atnabeaha. chinga, Joendroni ma'gipa, pagipa aro mama adarangchi re'ange sing'e nigen. Uni ja'mano kattarang chu'gimik ong'ahaode, sal tarikrangko tik ka'e donbaignok.
- Iorong - Ruragipa susime, malamgipa Do'kime, jenaba ta'arakale do'sie on'srangoon nambatgen. Boningma'ang aro jong Joendro mamingba jechakani dongjaode, mik kang antini sukurbar salona, do'ra do'sie on'a sal tarikrangko tik ka'bajolaiboaha.
- Chemin - Iandakode, Abi aro Gume, na'simang chudik me'dik plak nanganirangkon tarie donsotokaiboaha. Chinga kobor on'a'ignokaha. Chinga re'naha.
- Iorong - De, re'angbo, boning.
- Sonatchi - (saksan) Mama ada draoba, Joendroko ra'ja, Angni janggi sipilaigen, uko anga rongja. Do'siani salna skang, angni ska gita, Aganjawa mesokjawa, kusi ong'pachina. A'gilsako donggenoba, namgniko nikja, Hajal angna pante bang'a, Joendroko ra'ja. Indioba Ama Apa, drae do'siode, A'gilsako janggi galna, donsogimin salde. Angni buti dakakode, ma'sija mamade, Ra'ja rongja jechakoba, sikdraani bite. Angni rongna siggijako, ja'man ma'sirike, Gisik skimrikpachina, rongjrie chanchie.

MESOKANI -XXXV.

JOENDRO ARO MALSIN GOLPOA : KUSI ONG'A.

(Joendrode rasong dakan, maiko aganku'gen,
Malsinbani mikchapara, sako jegen galgen.
Intang ja'man maia ong'gen, Umang ma'sisokja,
Marsindeni gangbingari, maming chanchipa'ja.
Sonatchini obostaba, namangrorojaengjok,
A'gilsako dongna cha'nan, ua sikangaengjok,
Joendroko ra'na sikjae, sintie skimenga,
Ka'a suang mikchi jingjang, dakpilaienga ina.)

- Joendro - Mijal attamo angko Sonatchini mama adarang sing'na re'bara mama. Angade u'ia mama, Sonatchini mama adarang namnikgenchim ong'ooba, sonatchide angna mikchaja aro ra'na sikja. Uni ma'gipa pagipasa draenga gita nika. Indiba, haida da'o gisik pil'engaharok inesa angade bia ka'na ku'rachakataiaha. chingni do'siani salode na'aba dongpabone, jong. Da'o dipetde rasong namengachim.
- Malsin - Nambeaha mama angaba re'angpagenba. Indiba mama, angade Sonatchini gisikode namen dingtange nikane,. Uni gisik ka'tong gimikan, Kalsinnasa mikchara aro namnika. Uni mama adana pa'jaesa, ku'rachakmika gita nikaia angade.
- Joendro - Ukode angaba ma'sina man'ja, mama. Sonatchide ia songni me'trarangni gisepode silbata aro cholonba nambata da'nang. Angni jora ripeng ong'aingnok ine angade ka'dongsoenga.
- Malsin - Oe mama na'ade sonatchi gita metra sillako aro cholon namako man'ani gimin namen dasong songaha. Indiba, angade Sonatchikode nang'na mikchae mamatangrangna ku'rachaka gita nikja mama, kennesa ku'rachakakon.
- Joendro - A'ako chiko game sue, aro deko ba'e, Jikming deming kusi ong'e, dongrimangengode.
- Malsin - Golap pulni bibalrangde, ramram balgramaia, Bite grian sikrepari, a'ao ga'akaia.
- Joendro - Bibal balgramaigenoba, kambe ritimtaigen, Rasong bon'e kiratcha'oba, bimang bano bon'gen?
- Malsin - Mapbilrangba a'kin am'e, detangna aldua, Mama nang'ni chanchiaba, gisikan ning'tua,
- Joendro - Angni man'jachong motode, an'ching chanchitaina,

Agre nang'ko chonnikode, bisi kansrangaina.
 Angko ra'na sikjaenba, kiratcha'atode,
 Dingtang kamko ka'skana, pil'e chanchitaie.
 Da'o chinga knaenga, Sonatchi saenga,
 Re'angenba sandipa'na, a'sel maia ong'a.

- Malsin - De re'ange nibo aro samrangko ra'ange on'ebo, mama.
 Saa namjaode maidake, na'simangara re'baenggipa
 suburbar salo Do'ra Do'sina man'gen.
- Joendro - (Sam ra'e Sonatchiko grongna re'anga aro sam on'a).

MESOKANI-XXXVI SONATCHI SAKSAN.

- (Sonatchini gisik ka'tong, namen jajrengenga,
 A'gisako dongna cha'na, gisik sikangjaenga.
 Joendroko ra'na sikjae, ua chanchiengjok,
 Ka'a suang mikchi jingjang, ua chakchikengjok)
- Sonatchi - Joendroko ra'an palde, segri rosrangaigen,
 Agre mancha dra'ode, janggi sistrangaigen.
 Ia angni jako donga, botol Matcha bisi,
 Drae bia ka'genode, sigen angni janggi.

MESOKANI-XXXVII. JORONG CHITI SEA.

- (Arendronath Sangmanaba, da'nang pagipaba,
 Okamatjok re'bachina, chiti seatenba.
 Salgnini ja'manoan, chitti man'sopajok,
 Chanchienga man'soenba, ua songchi re'nok.
 Arendronath bi'saonin, Jorhat jillao'sa.
 Re'angaha ua pante, mistri kam ka'na.
 Bi'saoni re'angara, pante chapilaha,
 Re'baoba manderangan, ma'sisopiljaha.)
- Jorong - Ka'sabea dede sona, Arendronath Sangma,
 Kan'dikbea kattarangchi, ku'rang on'atenga.
 Dede na'a choljokjaoba, bakkak re'bapabo,
 Nang'ni nono sonatchiko, do'sina Joendroko.
 Katta gimik seatpana, anga sikbeoba,
 Nang'ni sokbaosa dede, katta talatpa'na.
 Nang'ni Ama Apa Nono, namtokenga pilak,
 Bon'ao on'atenga salam, nang'pa Jorong Marak.

MESOKANI-XXXVIII.
SAEMING SONATCHI BIAPO TUSIA.

- | | |
|----------|---|
| Sonatchi | - Da'al salde angni be'en, Saan sanakama,
An'ma jrimjrim sko sating, maiban ong'nakama,
Jeba ong'bo biap anne, anga tusisranggen,
Namkalosa intangoon, chakatna man'aigen. |
| Joendro | - sonatchide saa namkalama? Basakoni saesa aro mai
saa? Ha, ia samko intang mikgrako kannate nitaibo. |
| Jorong | - Oe, jong, Mijalonin be'en an'sengja ine aganne
tue dongkamaienga. Samkoba, chingaba ra'a
darangonikon dongkujaenga. |
| Joendro | - Ia angni samko kanataibo mani, namaigen. |
| Probalin | - De jong, iandakode mitelbea. Indiba, chingade
mamingba on'skanade dongja (probalin sam kanata) |
| Sonatchi | - Sawa angko namata, Ama aganpa'bo,
Sako oja rim'aha, bimungko aganbo.
Angni janggi sigiminchim, uasa namatjok,
Uni ska jeko bi'a na'mang dakaibojok. |
| Jorong | - Ama, nang'ni sako nina amjae, ia angni
Ang'ri sam ra'bae on'a. Ang grii Jroendroni samsa
nang'ni saako namataha. |
| Joendro | - Angaba sam man'ade ong'ja, indiba skatangsa on'e
niaia, Da'o na'a namaha on'gode, an'chingni kamko
donsogimin sal tarikrang gita chu'sokatna man'gen. |
| Sonatchi | - Ra'ja rongja kimja dakja, mikchachong'motja.
Ninan nidikbea, miksimasilan bu'a, nang'ko rongo
a'sel ong'gen, anga kenchongmota. Uni gimin Joendro
Momin, da'al dipet na'a angna miksongako dontongangpa-
boaha. |
| Joendro | - De Sonatchi jeba ong'china, Na'a saarang namedake
an'sengbea ong'kujaenga, uni gimin neng'takku'bo,
anga re'naha. |

MESOKANI-XXXIX.
JORONG ARENDRONA CHITTI SEA.
Ka'saa dede sona nang'ko nikgija jarojok,

Kan'dikbea kattarangchi, nang'na seatengjok.
 Chingni nokni obostako, maiko aganpil'gen.
 Dede na'a re'bapil'e, chelchakpana nanggen.
 Nang'ni nono tue donga, turamo saenba,
 A'sak oja samko ra'jok, indiba an'sengja.
 Dede na'sa ka'saode, bakkak re'bapabo,
 Ka'saachi mol'molata, gisik ra'atpabo.
 Hajal katta donggenoba, dede bon'atgnok,
 Ia katta bang'gijachi, ianon salamnok.

MESOKANI - XL

ARENDRO CHITTI MAN'SOA

- Arendro - Angni baba okamata, songchi re'bachina,
 Sonatchiko Joendrona, bia ka'e on'a.
 Anga mistry kamko ka'a, bilsu ru'utbejok.
 Da'al dipet a'songtangchin, anga re'pilsrangnok.
 Chonnengmiting somoionin, anga kamko ka'a,
 Re'pilanggenoba angko, apa ma'sisojawaha.
 Apa angna ka.sabe'e, chitti seatpa'jok,
 Ka'saa nono Sonatchina, Isol jora on'jok.
 (Arendro nokona sokbara)
- Sonatchi - Aiao, dada Arendronat, da'nang sokbapa'enga,
 Ai, baba noko dongja, kusi ong'sopana.
 Attam a'ba sokeode, nike kusi ong'nok,
 Apsan wal'tim asongenba, duk suk golpopa'nok.
- Arendro - Aiao, nono na'a saksan, darangba dongjama?
 Ama, Apa a'bachinin da'oba sokkujama?
 Anga da'o neng'beaha, rama chel'beani,
 Sokbaa attam salniaijok, jahas sokningjani.
 Nono na'a namengama, maming duknirangba,
 Apa angna chitti sea, nang'ko bia ka'na.
- Sonatchi - Dada angni plak dukko, na'aba knapa'bo,
 Apamangmung agangrike, sandie donnangpabo.
 Joendroko drae angna, bia ka'nakenga,
 Anga ra'na sikaengachim, Ama draenga.
 Dada anga Arendroko, namnikjachongmotne,
 A'gilsako janggi tangna, chanchisoya grine.
- Arendro - Maiko dakgen nono Sona, angni ska ong'ja,

Namnikpa:jagenchimoba, Apamangan donja.

- Jorong - (A'ba sokbae) Banoni mandesa ? Bachina re'gipasa ?
- Probalin - Budepade, an'tang depantekon ma'sijahmade Nang'ni chitti see okamatani re'babaha da'nang.
- Jorong - Oe, na'a attamahaode mikgronrangan andalaijok manderangkon name ma'sijajok. Basako sokbara, baba ?
Angade nang'nan basako sokbagen ine salni salna, ma'ringe dongkamaienga. Angade, dede, an'tangni gamna suna amangjahani gimin, nang'ni nogipa Sonatchikoke, an'tangni gritang Joendrona tik ka'e on'srangaiaha. Da'o uko bia ka'e on'a gitara nang'ni kattanasa nisengsoe dongaiengjok. Da'ode na'a sokbaha, uni gimin songni manderangko aganne bia ka'e on'ainaha.
- Arendro - Angade maiko agangen, Apa. Nono Sonatchini kusi ong'anikoba chanchiatpana man'ode namgenchim. An'chingnade mamingba ong'ja, indiba, nono Sonatchi jean chasongna janggi tangrimgenchim, unasa chanchina nanga.
- Jorong - Chinga, nang'ma nang'pade gamna suna amangchong'mot-jajok. Demechik saksamangmang jekon Durubolna ba'a nokbichongna dina, uan aldumitange mikkimit ja'mejoate siatna nanggen. Je ong'oba knal salon bia ka'atna nanggen. (Jorong do'sina songni manderangko aganjjoa)

MESOKANI - XLI.

SONATCHIKO JOENDRONA DRAE DO'SINA.MANDERANG TOM'A

- Jorong - (Songni re'bagipa manderangna, biaprangko sandie chudik me'dik song'arangko on'a)
- Buchuma, de manderang sokbataokengaha, je donga chudik me'diurangko ra'bae on'bo.
- Probalin - Angaba, gimikkon ma'siaba. Sengkubo, anga ra'bac on'gen. Manderangni sokkrimahao, anga jekoba dakgen.
- Jorong - Aha, te'sa te'gni ra'bachenge on'boda. Ia buchumara mamungkon ma'sisrangja.

- Probalin - Chudik me'dik de'bae on'a - sokbagipa me'pa
budeparang ringtok cha'toka.
- Joendro - Sonatchini an'chingko, skang chonnikako,
Chanchipa'bo jojong na'a, mikkang salchiniko.
Da'o uni mama ada, drae do'sipa'gen,
Knalsalo janggi tangna, songsalo man'pagen?
Mikgil Kiratcha'an gape, songni manderangna,
Songjro nokjro manderangna, agan chonikana.
- Malsin - Mama maiko chanchienga, Matcha bisi kanna,
Indioba jora ong'ja, so'ote galsrangna.
Sonatchini saarangba, name namsrangkuja,
Matcha bisi on'genoba, sawa ma'sipana.
- Joendro - Indakoon nambatsranggen, ka'sanaba nangja,
Uni da'o ka'samike, agangenchimoba,
Chonikaha gisik ka'tong, ka'gualkugenma ?
- Malsin - Jajrengnabe mama na'a, donga Matcha bisi,
A'gilsako janggi tangna, ong'bo Sona kusi.
Indioba maia cholchi, man'gen on'a bisi,
Re'angenba saarangko, sing'rok sandiachi.

SONATCHI SAKSAN

Da'siwalde jumang nika, Ka'saa Kalsinkosa,
Mikkang bimang dingtangbe'e, maiko nikmanjoksa.
Kusi ong'a leka poraie, nama nokdangosa,
Ka'dingsmit roakosa, nikmanjok jumangsa.
Saengama ding'engama, duksa man'engama ?
Sakgipinna ka'saesa, angko gualjokma.
Angni plak duk a'selko, knasokujawa,
Ia plak kattarangko, maikai sokatpa'na.

MESOKANI - XLII.

KALSIN SAKSAN CHANCHIA.

Da'siwalde ang' jumango, nika Sonatchiko,
Kusi ong'e ku'chimite, ka'dinge roako.
Mamung a'sel dongpagijan, namtokpa'enggenma?
Saa ding'a dongpagijan, an'sengtokpa'enggenma?
Sonatchiko chanchiate, ka'tong sanisa be'a,
Sko choknok a'chi bamgop, mikchi ga'akpil'a.
Ka'pak ka'pak chanchiate, gisik ra'anirang.

Batangimin salrangchiko, nipilate, da'nang,
 Jajrengata Sonatchina, a'sel ong'gnirang.
 Sonatchini nitoana, mikkim aro gunna,
 Hajal bobil bang'kamaia indaka nomilna.

MESOKANI - XLIII.

SONATCHINA JOENDRO ARO MALSIN BISI ON'A.

Joendromung Malsin da'nang, so'otsrangna nesa,
 Chanchiengjok gisiktango, Matcha bisikosa.
 Aiao, da'nang Sonatchide, ia pil'sa dukne,
 Sina nangen A'gilsako, changsa dukko man'e.
 Tusienga Sonatchide, an'ma jrimjrimana,
 Re'angaha panterangba, saa nia dakna.
 Chanchiangjok Joendromung, Malsin maichi on'a,
 Asongemung chi basingo, jrip pu'onbana.

- | | |
|----------|--|
| Joendro | - Hai mama, Sonatchini saako gronge kata gita
nina re'na. Atcha jong, an'chingara mai butichi
Sonatchina bisi on'e donbana man'gen. An'ching
chanchina nangen. |
| Malsin | - Hai re'bora mosa. Mija angni sam on'e donbaonin
on'tisa namkalaha ine aganenga. Knalo do'sina
chakatnasa amgenma, amjawa u'ija. Nang'ni janapgipa
sam bisi on'ani giminde jajrengnabe, mosa. Anga
saksan re'ange Sonatchini chi ringenggipa Lautoko
bisiko pu'one donbaigen.. |
| Joendro | - Atcha, mama iandakode, nang'ni chanchia gitan
nambebege, ukon dakaina (Re'anga) |
| Jorong | - Ah, mainasa re'batoka, jong? Asongbo. |
| Malsin | - Indakesa robaaia, mama chingade. Sonatchiko
saa namkaljaenga ine knaani giminsa gronge katna
re'baenga, chingade. |
| Probalin | - Oe, jong mija nang'ni sam on'e donangode on'tisa
namkalahachim, indiba da'oara sataienga. Da'o
changsa sam am'ataie nistrangbone jong. |
| Malsin | - Man'aigen, mani. Anga knal pringo am'e ra'bana. |
| Jorong | - Knalo do'ra do'sie on'srangna ine chanchiachim,
da'oara saan namkaljaenga, maikon dakpilgnok |

chanchinan changjaha, angade.

- Joendro - Ja'manoba ong'aigenba, mama, da'al sa'anma salara. Ja'mano ka'sine kam ka'e on'aibo.
- Jorong - Oe, jong iandaken dakna nangaigbok. Manderangde sokbatokengjok, indiba maiko dakgen chingni rasongan dongja. Maiko cha'gen, jong. De' na'simang asongangbo, chinga on'tisa biomangchi rona re'angkuna (Re'anga)
- Malsin - Da'alode Sonatchini, challakiko nigen, Badi gita seng'chongmota, na'a u'ipagen. Ia angni ra'bitako, anga on'e nigen, Uni ringchakgipa Lauo, pue donangaigen. (Sonatchi Turamchini ong'kate re'bara) Namengama, Sonatchi? Saarangde an'sengkalbatahama?
- Sonatchi - Saarangde on'tisa namkalaha. Indiba namen bilgrienga. Nang'ni ripeng Joendroni samko ringe namkalenga.
- Malsin - Angaba nang'ni saa inakode knaachim indiba re'bae ninasa somoian man'ja. Da'osa mama baksa gronge katna re'baenga.
- Sonatchi - Na'simangni re'baanina mitela, on'tisa asongsokubone, anga chaa tarie ra'ekuna.
- Malsin - Nangjawa na'a, chinga da'osan noko ringe re'bara. chingaba da'on re'gnok. Na'aba saenga, amjawa.
- Sonatchi - Asongku'bora, da'on ong'aigen. Saomangba na'simangna cha tarinade amaigenba.
- Joendro - Sonatchide mikkangosa ka'samika dakaia mama Uade angnade namen mitchia ine angna aganaha.
- Malsin - Angkoba apsan daken namnikja mama. Anga, Sonatchina Matcha bisi baksana, sibokani samko on'e niange ninane mama. Salgni salgittamnade ua sigen, be'en ding'e donggen, unikode ua tangchapil'aigen. Matcha bisi ringoara, sikamjolaigbok. Uni gimni iako dake nichnge nina.
- Joendro - Be'bema? Hai iandakode on'ange nistrangbo mama.
- Sonatchi - (Chaa ra'bae) Ha cha ringbo, mamingba cha'anisa

dongja. Angade da'sin ringmanjok. Angade tuskanaha be'enrangba an'sengja.

- Malsin** - De tuebo. Chingaba chaa ringe re'skagnok.
- Joendro** - Mama, hai an'chingba chakoa ringmanjok, Sonatchiba saan be'enrangba an'sengbrekuja, re'skanaha.

MESOKANI - XLIV.

SONATCHI SAA AMJAE TUSIA.

- Sonatchi** - Da'alode angni be'en, namen an'sengbreja, Maiba a'sel ong'nakama, sko tingting saa. Jeba ong'bo biaptango, ba'ra pinne tugen, Namkaloa intangoon, anga chakataigen.
- Probalin** - Maisa, Ai sonatchi, saan namkaljama? Maisa saa, maisa jima ma'sipil'jajok angade. Saksa mangmang demechik dongana ka'dongara, saan namkalja, maikon dakpilgnok. Ai, angade nang'ni dongjaode, maikon dakpilgnok. A'gilsako dongjaon angnaba nambataignok. Budepa, bi'sani saade namen dingtangake.
- Jorong** - Maiasa ong'aha da'oara' Na'a noko dongsobo, anga sam ra'na re'angtaie nikuna.
- Joendro** - (ramao gronga)Bachinasa ka'pak ka'pak, sket sket ta'rake re'enga, mama?
- Jorong** - Aiao, Jong, angade na'simangchin, bi'sani saa dingtangkal'jani gimin samna rejaengachim.
- Malsin** - Mamung ong'jawa, mama, namaigen. Hai, re'bo anga sam on'ataigen, iako kanataibo aro poron kabo.
- Jorong** - (Sam on'atako ra'e re'anga aro kanata)
- Sonatchi** - (Mikselbae) Sawa angko namataha, Ai aganpa'bo, Sako Oja rimbaenba, bimumung mingatpa'bo. Angni janggi signiko, ua jokataha, Uni ska jeko bi'a, na'mang on'aiboaha.
- Probalin** - Sawagende nang' chamesa, joendro Malsinsa, Re'bagalgalenba da'nang, samko kaneasa.

- Indakesa Ta'ma rani, janggi salrikaijok,
- Jorong - Atcha, jong, Ai Sonatchini janapgimin gita,
na'ara maiko nanga?
- Joendro - Angnade tangka Sonana batgipakosa, nanga
mama.
- Jorong - Maiko nanga tongtong aganpa'bora. Nang'ni ska
jeko bi'a ukon on'aignok. Tangka sonana batgipara
maiko miksonga, tale, aganpa'bo. Nokkol ama gameba
on'aignok.
- Malsin - Mama, na'ara ukon ma'sijahama. Nang'ni demechik
Sonatchikosa miksonga uade.
- Jorong - Nang'nan do'sie on'a miksongengachim jong. Da'oba
Sonatchia saa namkaljaani giminsa dontongataiengkua.
Saarang rakalode nang'nan do'sie on'aigenba.
- Sonatchi - Nidikbea nina sikja, na'mang sakgniko,
Indigita aganoba, mikgil kiratcha'ja.
Uni gimin Joendromang, da'al dipet angna,
Mangsongako dontongboaha, janggin sisrangchina.
Mikkang salchi nang'ni samko, ringna ka'dongnabe,
Gisik ma'sienga dipet, nangja chanchinabe.
- Joendro - De chinga re'nahane.

MESOKANI - XLV.

SONATCHI BISI RINGMANE SIA.

(Malsin aro joendrode, da'nang Sonatchina,
Samni pal donangaha, bisiko sichina.
Sonatchini samittingo, Joen malsin kanjok.
Chanchiengjok gisiktango, Matcha bisi kanna.
Uandake miksongenba, umang sakgnide,
Chakjawaha chonnikako, me'chik suurichide.
Sonatchide bisi ringe, da'nang siaignok,
A'gilsako kusi ong'e, roani dongjajok.)

- Joendro - Mama, Malsin an'chingkode, skang gitan Sonatchide
chonniktaiaha. Mikgil kiratcha'an bon'aajok angade,
an'chingara bisi kanne so'ote galsrangainama.
- Malsin - Gisik pil'gen ine chanchiesa, sam namako on'e
an'sengatpilachim, indiba uni gisiko chanchipil'anian

dongja. Nangni chanchia gitan daksrangaiboaha.

- Joendro - Atcha mama, na'a re'angenba, samni pal bisiko on'e donbasrangaiboaha, angade re'angjaha.
- Malsin - De mama, anga re'angaigenba. Na'a dongrikaibo.
- Jorong - (Rosoa) Mainaba re'barama, jong. Asongbo.
- Malsin - Sonatchinasa, saarangko nijola gita sam on'tisa mijani on'spako ra'bae on'enga mama.
- Jorong - On'tisa namangkal'engaha, jong. Indiba, saarang biljrimahani gimin bilakbrekuj.
- Malsin - Mamungba ong'jawaha, ia samko dim'e kanataibo, namaignok. Anga on'tisa kamrang bang'enga, re'nahane.
- Jorong - De re'angbo. (Malsinni re'angmano Jorong sam dim'e demechikna kanata).
- Sonatchi - (Sam ringmano) Ai anga maiba ong'a, be'en amchongmotja, Rang'sitsokja gisik, seng'ja, ka'tongrangba amja. A'gilsakko ianpako, watna nanggnokma, Sianga'on pilak dukrang, angna matchotgenma? Oh, angni ripengrangne, Salam na'simangko, Ka'saachi salam ra'a, na'mang sakantiko. Dongrikbojok ripengrangne, anga re'nakaha, A'gilsako kusi ong'e, na'mang dongrikboha.
- Probalin - Ang'de na'a maia ong'jok, maia a'selosa, Ama angko watangnabe, a'gilsako saksa. Ama na'a mikgron nibo, nang'ma rasong grisa, Sintie do'pilgimaignok, janggi tanganasa.
- Sonatchi - Sari Lokki, dada Aren aro, Ama, Apa, A'gilsako na'simangmung, dongani dongjaha. Dongrikbone ripengrangne, anga re'nahane, A'gilsako kusi ong'bo, angna girapnabe. Apa na'a dongrikbone, dukko man'panabe, Ama anga re'nahae, mikchi ong'riknabe. Ka'saa angni ripengrangne, salam sakantina, Rasong giri Sonatchiko, na'mang, gisik ra'na. (Sonatchi Sia)
- Lokki - Wai sari maisa ong'jok, angko nichaoku'bo, Mijalmangmang nampaengachim, ku'sa aganpa'bo.

Sari angko u'ijama, ku'saan aganjaha,
Mani, mande amangaengkok, ku'rang on'angjaha.

- Probalin - Maisa ong'galgaljok, Ama? Ra budepa samna
Joendromangchi rikange nitaibora, mandede amangaengkok.
- Jorong - Maiasa, iandake ong'galgalaha da'oara. Da'osan
namengachim. Anga Joendromangchi samna rikangtaie
nina. (Re'anga)
- Joendro - De mama Malsin, na'an je dongako on'e niatsrangbo,
Sonatchide amangaengkokna. Angade, una agrede
ma'sian dongjaha.
- Malsin - Angaba jeko ma'sia skangon on'attokaha. Sam
on'atoba, Sonatchian ringjawaha chingni samkode ine
skangon aganatade mama. Uni gimin sakgipinoniko
am'ange niskaode namgenchim.
- Jorong - Anga na'simango kema bi'a jongdrang, dakchakatpabo.
Bi'sara jeko gisik nabara ukon skatang aganataia, una
na'simang gisik sapanabe.
- Malsin - (Sam on'ate) Ha iako ra'ange kanate nibo. Daon
namkalbaigen.
- Jorong - (Sam ra' e re'anga aro Sonatchina dim'e kanata)
- Joendro - Mama, nang'ni sam on'atade nangejakonke, Sonatchian
re'angsrangahana. Sam namako on'atjani namaha.
- Malsin - (kusi ong'e) Oe, mama jajrengnabe. Da'ode an'chingni
chanchisao gitan chu'sokaha. Siaha, namaha, mama.
Salgnini ja'mano an'ching uni manggisiko bile nina aro
sam namako on'taina. Ua tangchapil'taiaigen.
- Arendro - Nono nang'na ka'dongachim, angko watangjokma,
Ma'a Noa dongpajanan, gale kattangjokma?
Maiko dakgen nono anga, saksan brangrikaignok,
Ma'debani Nono da'ode, dukko man'rikainok.

MESOKANI - XLVI.

JOENDRO ARO MALSIN KUSI ONG'A

- Joendro - Nang'ni sam on'a tik ong'aha, anggri. Da'ode
an'chingko togigipa aro chonnikgipa Sonatchi
Sangma siaha, namaha.
- Malsin - Oe, mama, ua me'chikara unaba, unaba dake mikchaaia.

An'chingni mikchaa namnikode mikchachakpaja batesa chonniko wata. Da'o uko gopkuchina, adita salrangni ja'manon ua tangchapil'gen. Da'ode ua sibokengasa.

Joendro

- Ua tangpilgenchim ong'ode, an'ching uni gisikko dingtangatna man'gen. Uni janggiko tange rakipil'ani gimin, angnan ka'sana nangaigen. Anga cholko man'ode chel'achin seke katangsranggen.

Malsin

- Ua tangpilgija sisrangoba namaigenchim. Indiba, anga una adita salrangni ja'mano tangchapil'na man'a gitasa matcha bisikon sam baksa on'ataiaha. Anga an'tange gisik pil'gen inede Sonatchikode chanchija.

MESOKANI - XLVII. SONATCHIKO GOPA.

(Sonatch Sangmakode, gopna ra'angaha,
Buring bolgrim wa'gopgrimo, uko gopeaha.
Sonatchiko gopram biap, chiring noksik bisik,
Attam salniangahaode, an'ma ka'sindikdik.
Attam walangahaode, matcha elbikbikan,
Inchi uchi petchrut petchrut, Se'el perurangan.
Indakgipa biapona, sawa re'na pa'nok?
Indioba Sonatchide, saksan dongrikaijok.)

Probalin

- (Manggrapa) A'a samsa be'jokai angnade, Amawai,
Mikchi chiwaringnokai nang'nade, ta'mawai.
San ba'ra anne on'ao tugnok, dede chingara,
San kancha japako pingnok, Rani nang'para.
San kancha japako pingnok, Rani nang'para.
San chite gatako ringgnok, San mipal dinako cha'gnok,
Rong'ma rikekrikeko re'angbo, sawa dinangnok?
Simu brekbrekko re'angbo, ta'mara,
Dingol gramchiako aue,
Bimang dim'ak nangako, chidimako re'angbo, aue.
Me'mang ganna sikramko, ja'nengtake nipilangkubo
angko, Gitingne
Na'ara chidare bakrongretko ringangbo, Ranine
Nang'na matchu den'ata, moangbo, Amane ...
Matchu boldak karamo matchuko kaemung,
Na'a ja'nengtakangno, ta'mane ...
Nang'na misal song'ata, me'mang misal cha'ramo

cha'angbo, Ranine
Balpakramna sokode, do'o gisiksogenne,
Nang' jajgringko niksoo, Achak bao sing'genne, Gitingne
A'song niwatangode, salni rimpak su'dapo,
Kancha A'sim ramatbo ne, Ranine
Mikgitalo nikjaoba, jajumango mesokbo, Amane
(Songni me'aparang-Sonatchiko gopa)

.

DAKMESOKANI - III.

* * *

MESOKANI - I.

JOENDRO ARO MALSIN MELARA.

- Joendro - Atcha, Anggri da'ode Sonatchikode gopaha, an'chingara maiko dako namgen.
- Malsin - Oe, maiko dako namgen, an'ching chanchie nina. Na'ara maiko chanchia, mama?
- Joendro - Anggri, hai an'chingara, Sonatchini gopramchi re'e nina. Sonatchiko gopramoniko bilenba, una nama samko on'taie nina. Samko on'manani ja'mano Sonatchi tangchapil'ode uko chel'a songchi rime katsrangna, jedakode darang mandean ma'sijawa.
- Malsin - Ia nang'ni chanchian nambebegin gita nika . Ukon dakna. Uni gimin da'al attamon an'ching re'e nina, agre ru'utode sisrangnaba donga.
- Joendro - On'tisa walkuchina sengkubo, Anggri. Ong'jaode, saoba an'chingko nikriknaba donga.

MESOKANI - II.

CHA'UGIPARANG SONATCHINI GOPRAMKO CHO'A.

- Budepa- 1 - Hai, Awang, Sonatchini gopramko bile, una galatgipa tangka, sona aro Rangrangko ra'na re'na.
- Budepa- 2 - Nambebegin, Awang, Aiao, man'e cha'ming cha'ming tangka sonarangko bang'en gopatchapamo? Da'mo on'tisa walkuchina, manderang da'ode nikrikku'gen, intango re'na.
- Budepa- 1 - Hai, da'on walahake, intangode kenskagen an'chingba. Mai mairangkosan gopchapata cho'e nina gita, gitchina, atte aro kerarangko ra'e re'bo, intangode maio olbagen.
- Budepa- 2 - (Sokange cho'a) Na'a mande re'ba'ako nisochengbone anga neng'kuja dipet cho'chengna, intango na'a cho'skakande.
- Joendro - Hai Anggri walara walaha, an'chingba re'naha. Sam

namako ra'e re'bo aro an'chingni chanchisoa gita
Sonatchiara siama sija manggisiko bile nina. Na'a
gitchima, atte aro samko nanga gita ra'e rebone.

- Malsin Hai re'bo mama , da'on darangba nikrikjawa.
Sonatchini tusiaoni mikrakbapil'anide somoi ong'aha.
Intangode mikrakbaoba bakos dongani gimin rang'sitna
man'jae siangsrangnaba donga (re'anga)
- Budepa-1 - (Joendro aro Malsinni ku'rangko knasoe)
Oe, Awang, saoba re'baenga. Hai ong'katbabo,
katnaha, intangode rim'a man'gnok.
- Budepa-2 - Da'mo, Awang, bakos nakataha man'a sepangaha.
Ha ia mittam paisarangko ra'sobo.
- Budepa-1 - Hai ta'arakbo, ong'katbaboaha katnok saoba re'baenga
Sepangbaengjok (Ong'kate bol mitino donnue nisoa)

(SONATCHI SIAONI CHAKATBAPILE - A'KOLONI ONG'KATBARA)

- Joendro - Aiao, Anggri, me'mangsama, Sonatchianma, ua niatbo
a'palosa asongengjokai.
- Malsin - Oe, bebemai, me'mang ong'na nanga. Goprangkoba
saoba cho'eahake uara. Hai katbojok, mama namjaha.
(kene kattanga)
- Budepa-1&2 Sonatchini a'kol ning'oni chakatbaako niksoe
kenjagoke, jabrange attte gitchima plak bosturangko
gobrange katanga.
- Sonatchi - (Kolkumango asonge) Him angai da'al salsa, iandaka
dukkona,
A'kol ning'o tuchinasa, angko sesojokma?
Ama Apa indakchina, Seko sing'drae on'a
A'kol ning'o gope galo, dukrang chel'pagenma?
(Sonatchi an'tangna sam galchatpatgipako ringa)
Uni gimin anga da'o, chakate re'pagen,
Amanaba amjanaba, chakatede nigen.
Indioba a'songtangchi, anga re'piljawa.
Jechi anga cholko man'a, uchin brangainaka.
Nokchi re'pilgenchimoba, da'oba indaktaigen,
Ma'ni Paani namgijachi, janggi gimasranggen.
Uni gimin chel'a songchin, anga birangsranggen,
Chel'begipa Daccachinan, angaba re'pasranggen.

MESOKANI - III.

ARENDRO KALSINNA CHITTI SEA.

Arendronath Sangmabani, da'nang mosatangna,
Chitti see u'iatjok, Kalsin Momin nang'na.
Nogipani A'gilsako, watanganirangna,
A'gilsakni sabisiko, da'nang man'angenba.

- Arendro - Angni ka'saa mosatangna, chitti seatku'na,
Chingni plak obostako, ma'siatpaku'na.
K'sabea mosa nang'na, kan'dikbeachisa,
Songni nokni obostako, nang'na on'atenga.
Maikai aganatgen nang'na, chingni nokdangnide,
Aiao, inmapil'gen mosa, na'a kna'aode.
Maiko dakgen chingni rasong, bilsa bon'asion,
Siangaha Nono Sona, December-ni jaon.
Kan'dikbe'e u'iata, mosa anga nang'na,
Ka'saachi seatenga, Arendronath Sangma.
Bon'kama'o mosa nang'na, ka'saachi Salkam,
Man'soode sechakbone, Jorhat angni dongram.

MESOKANI - IV.

SONATCHI ADATANG ARENDROKO GRONGA.

(Arendro S. Sangma da'nang, dukko man'beengjok,
Kalsin Momin Pantenaba, chitti seatpa'jok.
Plak ong'a obostako, ua seataha,
An'tangbanu songko wate, kamchin re'angaha.
Sonatchiba tangchapil'jok, da'nang siaoni,
Chakatemung birangsrangna, ua ma'ringari.
A'damoni chakatemung, gipin songchi re'jok,
Adi gita re'angoa, Arendroko grongjok.
Adatangko grongenba, ua mol'mol'aha,
Angko dada re'dilatbo, soke Dacca-ona.
Adatangba sonatchiko, gronge kusi gapjok,
Sonatchiko sokangsrang, Aren dilangsrangjok.)

- Sonatchi - Maina nitatbea dada, angko u'ijama,
Siaoni tangchaani, mikkang dingtangjokma?
Dada na'a gualjokma, nang'ni nogipakon.
Gopaoni chakatpil'e, Sona rasong grikon.
- Arendro - Gopmanoa a'koloni, maikai ong'katbajok
A'ko dape galmanoa, maikai tangchapil'jok?

Sianggimin mande pangnan, tangchapil'na man'ja,
 Uni gimin da'o na'a, angni notang ong'ja.
 Angni nono Sonatchide, sie gopahake,
 Baoni Sona tangchaku'gen, na'a ong'jasake.
 Gopatman'o a'koloni, maikai tangchaku'gen,
 A'ko dape galmangimin, baoni re'baku'gen.

- Sonatchi - Oe dada siahachim, aro gopahachim,
 Saoba angna ka'sachake, da'nang bilahachim.
 Bilenbani a'kosako, name donahakon,
 Unonisa tangchaenba, anga re'bahakon.
- Arendro - Da'o na'ra bachinasa, re'mikkanga nono?
 Hai anga dile donna, songtangchin re'pilbo.
- Sonatchi - Sibbo tangbo songtangchide, anga re'piljawa,
 Jechi anga cholko man'a, birangsrangainaka.
 Indioba a'gilsakna, Sonatchide sijok,
 A'gilsako birangenba, anga dongaignok.
 Dada noktangchiba anga, da'o re'piljawa.
 Ama, Apa namtaijawa, chel'e birangnaka.
- Arendro - Indakode ang' baksa, Jorhatchina re'bo,
 Jeko ska na'a bi'e, kamko ka'e robo.
- Sonatchi - Jorhatchina dada nang'mung, re'na chanchijaenga.
 Ramram gipin a'songchide, re'na miksongjaenga.
 Dada na'a ka'sapaode, angko dakchakpa'na
 Ka'sapa'e soke dilbo, Dacca jilla'aona.
 Angni ka'saa Kalsin Momin, anga girongpa'na,
 A'gilsakni plak dukko, una talatpa'na.
- Arendro - Hai nono re'pilku'bo, na'a songtangchina,
 Gipin jatni a'songchina, maina birangpa'na.
 Me'chik bi'sa saksan maikai, songgipin nokgipin,
 U'ipaja ma'sipaja, bano man'gen gimin
 Sawa nirok sandipa'gen, gipin jatni ning'o.
 Ma'drang bakrang darang dongja, ua biaprango.
 Indioba nono na'a, maniteljaode,
 Re'dilpana Dacca soke, anga indakode.
 Jahas re'na sepangaha, Jahas-o napbojok,
 Jechi na'a miksongenga, anga soke dilnok.
 (Jahas-o re'anga)

MESOKANI - V

ARENDRO ARO SONATCHI ADASA JAHAS-O RE'ANGA.

(Adatangba Sonatchiko, dilangbebeaha,
Walang Salang, Jahas-osa umang songreaha.
Ong'anggimin obostako, golpo ka'angaha,
Adatangna rongtalsrange, Sona ku'pretaha.)

- Arendro - Nono Da'ode re'chakate, an'ching Jahas ning'o,
Dukko man'a nanga na'a, sokgen Dacca-jillao.
- Sonatchi - Dacca jilla sokahaode, jajrengani dongja,
Kalsin Momin sandiaigen, jajrengchakna nangja.

JAHAS-O GIT RING'A SONATCHIO RING'GIPA SUL.

Key: D

Bi - - rang - - eng - - a ching - - a a - - da - - sa

A - - ren - - droming So - - nat - - chi - - ni rasong

gi - - ri - - sa ... I - - sol ching - - na i - - a

duk - - ko ... mai - - na on' - - jok da' - - lo

ching - - na a' - - gil - - sak - - o ia so - - moi - - o.

- Arendro & Sonatchi - Birangenga chinga adasa,
Arendroming Sonatchini rasong girisa(2)
Isol chingna ia dukko,
Maina on'jok, da'alo, chingna
A'gilsako ia somoio
- Arendro - Nono nang'ko wate re'na, anga kenchakbea,
Uni gimin nono na'a, angni dongramchina,
Re'pilsrangbo Jorhat jillaona,
Brangsrangaina adasa, a'song gipinoba.
- Sonatchi - Kenchaknabe dada na'a, Isol ang' baksa,
Dukni angna donggenoba, Uosan pangchakgen.
- Arendro - Nono na'a re'pilku'bo, angni dongram Jorhatona,
Kamko am're on'gen anga nang'na(2)
- Sonatchi - Dada anga re'piljawahane, nang'ni dongram jorhatona,
Birangaigen ia a'sako(2)
- Sonatchi - Dada anga re'piljawahane, nang'ni dongram Jorhatona,
Birangaigen ia a'sako(2)

MESOKANI - VI

LOKKI ARO INCHOKNI GOLPOAKO JOENDRO ARO MAL SIN TIME KNATIMA.

- Malsin - Oh, mama
- Joendro - Maina, anggri
- Malsin - Oi, mama chidarechi me'trarang auna re'angenga,
hai maiko golpo ka'a knatime nina re'na.
- Joendro - Maiko me'chiksuurirangni golpokoara knatimgende,
anggri. Hai re'bo re'nakode (re'anga).
- Inchok - Sari na'ra darangkoba, miksongpa'kujama?
A'gilsakni jorakode, chanchipa'kujama?
- Lokki - Baosa sari angadeni, chanchian dongpaja,
Maiko jora minga sari, angade ma'sija.

- Inchok** - Tol'a sari kratcha'esa, na'ade dongnuakon,
Dinesh Marak pantekoa, na'ara mikchajakon?
- Lokki** - Dongja sari aganjachim, na'a ma'siama?
Ong'gijakon bebe ine, saoban tol'ahama?
Ra sari da'ode na'aba, nang'ni mikchatangko,
Aganpa'bo gisiktango, nang'ni chanchiako.
- Inchok** - Maina tol'aienggen sari, mikchaa chonengaonin,
ua panten bimungkoa, mingajoendro Momin.
- Lokki** - Sako mikchapa'gen sari, mikchapa'nan dongja,
Biranggipa me'chikkode, darangba ra'paja.
- Malsin** - Nang'naba anga dongengaba, da'a jajrenga.
- Lokki** - Sawa gonggol bal'ekata, bimangko nikatja,
Semanjaoba ra'ja anga, nang'gitako nangja.
- Malsin** - Salgrochini jokenggipa, chiringni chibisik,
Ra'angpabo, Mikchajaoba, da'al mangmang me'chik.
Angni do'sing jilabani, ku'sik man'bapaengjok,
Alamila ang'jik inna, da'o man'bapa'engjok.
- Lokki** - Achak gonggol panterangko, nina sikjabea.
Indakgipa panterangko, nina sikjabea.
Sari na'aronakode, roangpa'ebone,
Indioba anga nang'ko, gale katnakjokne.
(Joendro aro inchok Golpo ka'rika.)
- Joendro** - Sengkubo, anga angni mama adarangna agan
parakchengkuna. Ma'siahaode ta'arakalen bia
ka'e on'china anga agangenba.
- Joendro** - Oe, nang'ni mama adarangnade aganna nanggen.
Maina jiko kimon, mama adakosa chratang
depanterangkosa kima ine aganronga. Cha'uede
agaba kamko ka'na sikja.
- Malsin** - (Re'bae) Aiao, mama na'simangni golpoade
agrepil'aha. hai, re'gnok mama

- Joendro - Hai re'genahaba, anggri. De chinga re'nahane,
ja'mano grongtaigen.
- Inchok - De re'angbo.

MESOKANI - VII.

SONATCHI ARO ARENDRO ADASA DACCA-ONA SOKANGA ARO REVERENDNI DEMECHIKKO GRONGA.

- Sonatchi - Dada na'a re'angbojok, anga kenjawaha,
Angni miksongatangona, da'ode sokbapaaha.
Angni a'aselrangko dada, songchi seatnabe,
Srik mittin darangnaba, na'a paraknabe.
- Arendro - Nang'na ku'rachakangenga nono, anga seatjawa,
Nang'ni re'angpil'genoba, Awang namtaijawa.
Mosa Kalsin ia Jillaon, dongpaenganakon,
Maiba dukrang man'genode, sandiaiboukon,
Nono anga re'nahane, na'a dongrikbojok,
Nokgipako gualnabe, anga re'chakatnok.
Na'a jeo donggenoba, angna chitti sebo,
Changsao anga re'bataigen, grongna na'simangko.
- Sonatchi - Dada na'a re'angoba, angko gualnabe.
Maiba a'sel ong'genode, chitti scatgenne.
(Arendro Jahaso re'angpil'a)
Bachi biranggnok anga, a' baku nikjajok,
Birangenba sokeaon, sani nokko napnok?
Gipin jatni a'songona, anga birangbajok,
Signokma ia jillaon, Okna tengkienba?
(Asonge chanchia)

REVEREND-NI DEMECHIK RE'BAE NIKEA.

- Rukmini - Na'ara ban songni mande, bachi re'gipasa?
Bachi re'na miksongenga, maina asongenga?
- Sonatchi - Bachi re'gen bano donggen, cholko apnikjaesa,
Sokbaesa asongenga, brangrroesa.
Birangba'e sokbapaaha, Goalparaoni,
A'bri mandu jatchiosa, A'chik a'dokoni.

- Rukmini - Nang'ni jatara maia, machong maia de'a?
Ripeng nang'na ka'sachake, sing'enga ma'sina.
- Sonatchi - Angni jatde A'chik ong'a, chatchi Sangma de'a,
Dukko chakna amchakja'e, brange sokbapa'ra.
A'gilsako janggi jokna, Christian torom ra'a,
Bidanasa brangba'e, da'o sokbapa'ra.
Namja ripeng ang' bimungde, minga Sonatchisa,
Chonmittingo amadeni, Soibali minga.
- Rukmini - Indi gita chel'aoni, maidake sokbajok,
Nang'ni ma'drang dongjaode, sani noko dongnok?
Uni gimin ripeng na'a, re'na namnikode,
Hai angmung re'pasrangbo, biap apnikjaode.
- Sonatchi - Sari nang'ni ka'sachake, dakchakpa'genode,
Re'aignok ripeng anga, nang'ni rimpaode.
Re'genoba nang'ma nang'pa, namnikjagenode,
Bachi birangtaigen anga, Umang rakkijaode.
- Rukmini - Ama, Apa jajrengnabe, anga aganchakgen,
Angni agangenchimode, Ama rakiaigen.
(Sonatchi re'anga aro sokange kalsinna
chitti seata)

MESOKANI - VIII.


KALSIN ARENDRONI CHITTIKO MAN'SOE DUK MAN'A.

- (Dacca Reverend babu minga, donga mande saksa,
Baptist toromkoan ra'paa, uabani saksa.
Reverend babun demitchikde, donga sakgnichim,
Attamantin sorokrango, re'jimjerongachim.
Reverend babun a'songona, Sonatchi sokangjok,
Baoni mande sing'e sanne, ua rimangaijok.
Uandake kattarangko, umang rongtalaha,
Sonatchina ka'sachake, umang rimangaha).
- .Kalsin - Aiao, gose Sona na'ra, maikai a'sel ong'jok,
A'gilsako bibalara, angna balgramaijok.
Sona anga basak salo, nang'ko nikpiltainok,
Ka'a be'a nukchi ong'a, maikai ka'dimenok?


KALSIN CHANCHIE DUK ONG'A.

Key : D (Slow)


SONATCHIO RING'GIPA SUL (1970).




Tu - - sin ju - - na - - ng - - - - - Wal - - jat -




chi - - o, Nik - - a ju - - mang so - - na nang' - -



ko, Wat - - ang - - jok na' - - ade da' - - alo



sai - - na - - sa .



Chorus.



Ang - - ni ka' - - saa - - - So - - na - - nang' - - ko,



Am - - ja ka' - - gu - - si - - na - - - na - - ng - - ko.

Ch { Angni ka'saa Sona nang'ko,
Ch'Amja ka'gualna nang'ko.

1. Tusin' jumang waljatchio,
Nika jumang Sona nang'ko,
Watang'jok na'ade da'salo mainasa.
2. Nang'ni ku'rang baljanggio,
Knasoa bolgrimgrimo,
Nikja jagring niwilwalo.
3. Skangode na'ara angna,
Niksoarin chaako dake,
On'sorongachim na'ade.
4. Ka'dongsoa nang'ko changsao,
Niktaiku'na Sona nang'ko.
Dukni Sagal bademan'o.
5. A'gilsako bida angna,
Maina choliku'gen da'o,
Dongepa'na nang'mung baksa.
6. Nang'ko nikjao duknirara,
Maikai apsan Balpakramo,
Gronggriktaina biap sanno.
7. A'gilsako dongja gipin,
Sokrikjawa pilak nang'ko
Dongrikainok a'sak brange.

SOINASI KALSINKO GRONGE AGANNA.

- | | |
|---------|--|
| Soinasi | - Oh, pante na'a chanchie dukko man'a
nang'ja,
A'gilsako nangni dukan dongja. |
| Kalsin | - Angni dukni kattakode, maiko agampil'gen,
Anga agangenchimoba, duknisa ong'aigen.
Rasonggiri pante anga, angni ripeng sijok,
Uko knae da'o anga, namen dukko man'jok. |

SONATCHIO RING'GIPA SUL (1970)

Key: F. Chorus.



Soinasi

Ch { Oh, pate naa, chanchie dukko mania nangja,
A'gilsakko nang'ni dukan dongja

1. Gopaoni tangchaenba,
Sokbaaha nang'ko sandibaenba.
2. Ua me'tra ia jillaon,
Donga Reverend babun' nokko.
3. Bimung gital Soibalin ine,
Mingjitaha ua tangchaoni.

Kalsin

- Bebemade nang'ni katta, anga nisengku'gen,
Tol'genode janggitangkon, so'otsrange sigen.
Me'chik saksa na'an ua, janggi nisiaha,
A'sel ui'giparangde, mittakrikchinaha.
Pring wala seng'barana, do'orang mikoaha,
Angni janggi signiko, Sadu jokataha.
Uni gimin da'al dipet, gisik kusi ong'nok,
Soinasi aganenga, uan ong'aignok;

MESOKANI - IX.

SONATCHI ARO REVERENDNI DEMECHIK GOLPOA.

Rukmini

- Apa nang'na mingsa katta, chinga aganenga,
Ia mande agitalko, chinga rimbaenga.
Uni jatde A'chik ong'a, A'chiu a'songoni,
America Foreign Baptist, uni torombani.
Uni bimung maia minga, da'o sing'e nina,
Leka pora bidanasa, birangbaparana.

Reverend

- Atcha dede nang'ni katta, da'o ma'siaha,
Dao anga rongtalaha, ia me'chik bi'sa.
Ia jillao Hindurara, re'anggen bachina,
Birangoba duknisagen, an'chingon dongchina.
Ia bi'sa tom'tom donge, poraina skode,
Schoolara donga chel'ja, tik ka'genode.

Rukmini

- Nang'ni bimungkoa da'ode, na'a parakpa'bo,
U'ipana ma'sipana, sing'paenga nang'o.

Sonatchi
(Soibali)

- Babu anga kusi ong'a, nang'ni dakchakana,
Bachi maina re'angkugen, gipin biapona.
Nang'ni angna ka'sachake, dakchakpa'genode,
Nang'ni nokkon tom'tom donge, poraigen angade.

Bimung chonengaonin donna, angni ma'de pade,
 Bimunga'an nampajane, Soibali de'e.
 Nang'ni bimungkoa da'o, angna aganpa'bo,
 Knarike ma'sipana, angna minge on'bo.

Rukmini - Nang'ni ma'a Paara nang'o, da'o dongjahama?
 Maia a'sel ong'baesa, inchi brangbaaha?
 Bimung minga nampajanan, aganna kratcha'a,
 Ama, Apa Rukmini ine, bimungko donpara.

Sonatchi (Soibali) - Angni ma'ade Paade donga, silpagija jatsa.
 Aganna'an kiratcha'a, silpagija jatsa.
 A'gilsako janggi tangna, cholko am'baesa,
 Sokbapa'ra jillaona, tikkele bidana.

MESOKANI - X

INCHOK ARO LOKKI GOLPO KA'A.

Lokki - Oh, Sari mingsa katta, nang'na aganku'na,
 Knatimbo re'bae na'a, angni sepangona.
 Sari me'mang baksa, an'ching damsan rorongachim,
 Nama namja golporangko, an'ching ka'rongachim.

Inchok - Oe sari abi sagi, gisik ra'kamaia,
 Gisik ra'oba magnasa, bimang nikna man'ja.
 Basakoba chanchiman'a, damsan roa gita,
 Sia gitan chanchiku'ja, tangengku'a man'a
 (Joendro aro Malsin)

Joendro - Aiao da'nang re'angtokjok, dongkuengosamung,
 Apsan asongrimpaesa, golpo ka'pagenchim.

Malsin - Oe mama jora jora, apsan asongesa,
 Agangenchim golpogenchim, peo ku'dimesa.

MESOKANI - XI.

LOKKI DINESHNA CHITTI SEA.

Lokki - Angni ka'saa janggin ripeng. katta kan'dikachi.
 Gisik gri me'chik bi'sa, seatenga chitti.
 Nang'na agre gipinkode, ripeng anga nikja.
 Nang'ko gale gipinkode, jora ra'na sikja.
 Ka'saa Sangma na'a angna, ka'sapagenode,
 Ma'gri, Pagri Me'chik suuri, ine chanchijaode.
 Sona na'a namnikjaoba, ku'sa aganchakbo,

Angni sea gualoba, ka'saon kema ka'bo.
 Iakosan ripeng nang'na, da'o seatenga,
 Bon'kamao ku'dimachi, salam on'atenga.
 Seatgipa nang'ni ripeng, gisik akgol giri,
 Nang'ni ka'saa daknanggija, bimung Lokkisuri.

MESOKANI - XII

DINESHNA INCHOK CHITTI RA'ANGA

- Lokki - Sari angna ka'sapa'e, angko dakchakpa'bo,
 Neng'beani kamra ong'ja, chitti ra'angpabo.
- Inchok - Sana Sari aganpa'bo, nang'ni miksongako,
 Sana maiko on'a nanga, Sari on'ataibo.
- Lokki - Ka'satangna kingsamangmang, chitti seatenga,
 On'epabo Sari na'a, Dinseh Sangman jako.
- Inchek - Ma Sari on'ataibo, anga ra'angaigen,
 Jajrengnabe Dinesh Sangman', jako on'eaigen.
- Lokki - Ha Sari indakode, ra'ange on'pabo,
 Una maiba dukni dongo, angna ra'bapil'bo.

MESOKANI - XIII

JOENDRO ARO INCHOK

- Joendro - A'brichide mikoata, buringni Do'uang,
 Mikchatangko watgipade, mande ong'ja Nawang.
 Uni gimin Sona na'ba, ka'saa dondikgija,
 Angabani gisik ra'gen, pangnan gualgija.
- Inchok - Ripeng na'a basakosa, do'si do'doknaka,
 Ka'ssaode rongsranggnok, basak sengpaku'na.
 Mikkang bimang Sona rongsa, angna mangmang na'a,
 Ang' Se Ratcha ku'mongpa'na, na'a kirajama?
- Joendro - Oe Sona ka'saachim, indi maiko dakgen,
 Nang'ni mama ada knao, umang namnikpa'gen?
 Nang'ma nang'pa namnikode, na'a parakenba,
 Sing'e sanne niam gita, kamko chu'sokatna.
- Inchok - Ama, Apa aganaha, umang namnikaia,
 Nang'ni ku'rachakgenode, do'sie rongaina.

MESOKANI - XIV
DINESHNA INCHOK CHITTI ON'EGEN

- Inchok - Dada nang'na Sari Lokki, chitti on'atana,
Ha anga da'o ra'baa, ta'arak ra'chakboda.
- Dinesh - Jari na'a maina ra'baa, jawan on'atako,
Mandeska nikoara, an'ching namjawako.
Jeba ong'bo maiko dakgen, guale ra'bajok,
Nang'ni ska jeoba, na'a dongnangbojok.
(Chitti Poraia)
- Na'a me'chikara angna, maina mikchapa'jok,
Maina cholinike da'o, angna chitti sejok.
Jikko kime deko ba'e maikai aldupa'gen,
Cholijawa mittangpa'na, game sue cha'na.

MESOKANI-XV
SONATCHI MA'GIPA, PAGIPA.

Sonatchide brangba'e, Dacca Jillaosajok,
Reverend babun dakchakachi, nama cholko man'jok.
Sonatchini ma'de pade, mamung bichal dongja,
Arendroba beng'a gita, u'iata dongja.
Uamango demechikba, Sonatchi saksanchim,
Uni gimin Sonatchina, namen ka'saachim,
Salang wallang kal'limenba, bimang ong'siangjok,
A'gilsako dukkan gape, mande dakangjaengjok.
Ge'na gamna janggi tangna, umang simsakjajok,
A'barangba a'bimongan, buring dikkripaiengjok.
Sara nokkra noksam nokgil, samsi dikkripange,
Nokba jamba mitchi mitchi, rongtal'gija da'ode.
Nokkrarangba reppijani, dimu changpilajok,
Tala Lota te'samangba, ching'kalan dongjajok.
Sonatchini dongmittingo, plakkan rongtala,
Noksik nokkam dimitprupru, gu'angsringan gapjok.
Matchu matte Wak do'o, sandigipan grijok,
Mitanko'a matcha chike, da'nang bon'angengjok.
Sonatchini Ma'a paa, simsaknan sikjajok,
Salsalanti mikchi ong'e, umang sinteaiengjok.

MESOKANI-XVI
SONATCHI SAKSAN.

Sonatchi Dacca Jillaon songdonga ne, knaa Kalsinko,
Indi gita sal ong'jok, sandigen bachiko?
Angan ma'sipil'jajokma, dongan dongjajokma,
Kamko wate bachinaban, ua jittangjokma?
Jeba ong'bo ka'sin ka'sin, gisiko sandigen,
Rasong dongpagenchimode, changsao anga gronggen.
Chikosako balbogipa, mongnal bibal gita,
Gisik ka'tong ka'sagimin, anga sadipa'na.

MESOKANI-XVII.
SONATCHI SKUL KA'A.

 (Me'chik bi'san Skuloni, Headmistress kamna,
 Namnikbea sonatchina, Saheb kamko on'a.
 Uandake kusi ong'en, kamko ka'paenga,
 Japrakprako gong sotchet, ua man'paenga.
 Kalsin Momin pante da'nang, B.A. matchotaha,
 Masterni kamko ka'e. ropaengjok uaba.)

Sonatchi Dacca jillaon donga ina, ka'saa kalsinara,
Indi gita salrang ong'jok, bano man'ok grongna?
Angan ma'sipil'jahama, dongan dongjahama?
Kamko ka'e bachinaban, Momin jitangjokma?
Jeba eng'bo gisiktango, pangnan sandironggen,
Saoba mande ma'siode, Uamangoba sing'pagen.
Robibarni giljarangchi, pangnan re'rongode,
Nokgipaba dakchaktelgen, nikrimna changsade.

MESOKANI-XVIII

(Bilsi bilsi sal somoirang, re'angroroaha,
Sonatchini brangba'ani, bilsi ru'utaha.
Bilsi kari channe nio, bilsi sku gapjok,
Christmass salko maniani, salba sokbaengjok.
Ua salna nisengsoe, Reverend chitti sejok,
Noktangona re'bachina, ua okamengjok,
Ukil babu pantenaba, ua ma'siatjok.)
Ukil aro Kalsin Momin, da'nang re'bapajok

- Reverend - (Chitti sea) Ka'saa Ukil babu nang'na, ontisa kattachi,
Chitti see on'atenga, Christmass salni kusi.
Bilsi changsa gronggrikpana, angni noko na'a,
Kalsin Momin pante rime, sokbapa'tokchina.
Kamrang jakchakjagenoba, dikdiksa dondike,
Seatenga mol'molachi, Rev. S. Chakraborty.

MESOKANI- XIX.

REVERENDNI NOKCHINA, UKGIL ARO KALSIN RE'ANGA.

(Soinabali bimung knaon, gose Kalsin da'nang,
Chanchiate mikchi ong'a. Ka'a suang suang.
Chanchiaha Kalsin Momin, Sonatchisa chong'mot.
Sadhu katta gisiktango, chanchie tikket tikket)

- Reverend - oh, babu nalsimang sokbaha, nambejok.
- Ukgil - oe, Rev, re'bajok, mainaba okamatama?
- Reverend - Mamungnaba okmatja, indiba da'alo chingni
kusi ong'ani sal, ong'ani giminsa kusi ong'e
rona aro mi cha'nasa okamata.
- Ukgil - Nambejok, mitelbea.
- Reverend - Behera, de mi chirangko taribojok,
chachinaha.
- Behera - Mi chirang gimikkan ong'tokaha, babu.
- Reverend - Hai, Ukgil babu indakode mi cha'chengnaha
intangode na'simangnaba minggipin kamrang
bang'a ja'man chakskagen.
(Mi cha'gen)
- Sonatchi - Ku'rangmangmang knaengjok, bimang nikatjajok,
Kalsinsama gipinsama, mikkang ma'sijajok.
Him angai basak salo, mikkang nikpagnok,
Mikkang nike basakoba, kusi ong'rimgnok?
- Reverend - Momin babu ia plak salrango Dacca jillao dongara
maidake nika? An'sengama ba an'sengja?
- Kalsin - Dacca jilla rona gita namen an'senggipa biap
damsa ong'a.

- Reverend** - Momin babu cha'anirangko okkae cha'bo, mi bijaksa toja aro song'na changja. Indiba, ia plak cha'anirangkon na'simang A'chik me'chikan taria.
- Kalsin** - Aiao, namen tobejok. Angade namen okkae cha'aha. Banoni A'chik me'chiksa, dongskaengjok?
- Reverend** - Angona brangbaa bange salrang ru'utku'ja. Uni angna aganade Goalpara districtoni brangbaa ine agana. Bimungkode Soibali minga.
- Kalsin** - Maidakesa, maini a'sel brangbajok indita chel'achi.
- Reverend** - Bidana brangbaana. Da'ode ianon ango donge poraipa'enga.
- Kalsin** - (Chanchiate) Basak sailo mikkang nikgen, anga u'ijajok, Mikkang miknan nangchongmotgen, krat cha'de dal'ja. Jeba ong'bo somoi man'o, anga re'bataigen. Je cholko dakemangba, grongpa'nade nanggen. Ian chango nikgrak nike, sing'o kiratcha'gen, Changgipino robataie, a'song tale ra'gen.
- Ukgil** - Hai momin da'ode an'chigba, cha'man ringmanjok re'skanaha. An'chingde minggipin kamrangba dongenga.
- kalsin** - De Reverend chingaba, cha'man ringmanjok, re'skanaha. Changgipino anga robataigen.
- Reverend** - De re'angbo. Na'simangni re'baanina mitelbca.

MESOKANI - XX

LOKI CHI KO'A ARO DINESH RE'BARA.

(Dinesh Sangma re'bapajok, auna chikoramchi, Ra'baenga chola half pant, jako samtangtangchi.

Lokki da'nang chiko'pana, sing'o basing kee, Re'baenga chigatona, ba'ra sko gate.)

- Lokki** - Maia ba'rakosa na'ara, da'o su'nakenga, Ra'baa anga su'atpana, na'ara sana kenna. Angni ka'sae dakchakako, ja'man gisik ra'bo, Ma'gri pagri me'chik suuri, gisik ka'sanapbo.
- Dinesh** - Nangja na'a su'panabe, angni chakkol ong'ja,

- Anga a n'tang su'paaigen, jawa niko namja.
Mande ska nikdikoa, nang'ko maia ingen,
Da'o nang'ni su'genoba, angko mitaktokgen.
- Lokki - Mande ska mitakana, na'ara maina kenna,
Hajal mande mitakoba, an'chinga sijawa.
Donangaibo su'ataina, sana maina kenna,
Su'a rama ran'ahaosa, nang'na ra'angaina.
(Ba'ra donne Dinesh re'anga)
- Lokki - Angni sonan ba'rakora, da'o su'atpa'tgen,
Name boke su'atesa, anga ra'angpagen.
Similgipa toko nonge, smilding on'atgen,
Basakoba su'ataina, anga ra'bataigen.

MESOKANI-XXI.

KALSIN REVERENDNI NOKCHI RONA RE'BARA.

- (Uandake adi gita, salrang re'angaha,
Dacca jillao football kal'a, dal'gipa ong'aha.
Dacca Jilla aro, College chatrorangmung,
Final ong'jok Durand Cup-na, ia changsamangmang.
Dal'a chonna plakaan, nina re'angtoka,
Re'baaijok Kalsin momin, gisik rongtojaoba.
Reverend nokdang uni salo, nina re'angtokjok,
Soibali moko saksan, da'nang dongrikaijok).
- Kalsin - Reverend babu nokonma?
- Dasi - Babude noko dongja, robol kal'a nina re'anga.
- Kalsin - Sawasa noko donga? Babuni jikgipa dongama?
- Dasi - Uaba dongja, plakan re'angtoka. Nokode chingasa'an.
Asongbo, babu.
- Kalsin - De, je ong'oba dikdiksa asonge re'gnok.
- Dasi - Ha iano asongbo (Mora on'a)
- Soibali - Dasi, re'bakubo (re'anga) Sawa uara, maina re'bara?
- Dasi - Haida madam angaba ma'sija. Indiba ua mandede
mija Ukgil babu baksa re'bae mi cha'egipa.
- Soibali - Atcha, jeba ong'bo, na'a ia Gue, pan aro birirangko
ra'ange on'rechengbo, Intango na'a chaa ra'angtaibo.

(Dikdiksani ja'mano Dasi chaa ra'bara)
 (Forget-me-not' ine sea, donga sonan Cup-o,
 Chaako dake on'ataijok, Sonatchiba uno.
 Uko nike Monin babu, namen chanchibejok,
 Da'aloba ia Cup-o, angna maina on'jok?
 Chanchiaha Sonatchisa, songo dongmittingo,
 Chaako dake on'ahachim, angna ia Cup-o.
 Kalsin Momin chanchiaha, maiba a'sel donga.
 Ringatgijan chaako pake, galna chanchienga.
 Soibali Sangma da'nang, uko ma'siatjok,
 Ba'ra peng'a kikgalenba, uko niatman'jok.
 Sonatchiba namedake, mikkang ma'sijaha,
 Songonade mikkang bimang, namen dintangaha.
 'Forget-me-not' ine sea, apsan Sonan Cupko,
 Gualgijan ra'bitbajok, Sonatchiba uko.
 Mande re'ba sakanian, apsan Cup Perish-o,
 On'rongachim sonatchiba, ma'sina Kalsinko.
 Un salo Kalsin Momin, am'enga cholkosa,
 Mai cholchi nikna man'gen, gisik tikelesa).

- | | |
|------------------------|--|
| Sonatchi ba
Soibali | - Ka'sinangjok ringatboaha, maiko chanchienga,
Ringna cha'na gualpil'e, maina songgokenga?
Duk man'abe ringataibo, ja'man golpo ka'na.
Nangchongmota kattarangko, nang'na talatpa'na. |
| Kalsin | - Ringgen chaa ka'sinahao, 'chaan ding'kuenga,
Nangchongmota kattanasa, anga re'baenga.
Indioba na'ara sawa, kakket aganpa'bo,
Mikkang nike ma'sipana, sepang re'bapabo.
Aganenga Reverend babu, Goalpara songni,
Sani demechiksa na'ra, rongtalat kusini.
Atcha da'o ka'sinaha, anga ringpagnok,
Nang'ni aganata gitan, ja'man golpo ka'nok. |
| Sonatchi | - Momin na'ra ringmanode, Gueko cha'pabo.
Na'ara sawa chong'mot da'o, angna rongtalatbo. |
| Kalsin | - Angan Kalsin Momin ong'a, Goalparaoni,
Bilsi namen ru'utbejok, songoni re'baani.
Mandeanma mitdeanma, da'oa na'ara?
Mikjumangchi nika gita, ong'jokma angnara? |
| Sonatchi | - Mitde ong'ja me'mang ong'ja, angaba mandean,
Nang'ni ka'sagipa anga, Sonatchi sangma'an. |

Ka'saa na'ra angkoara, ma'sipil jahama?
 Sonatchiko gisik giri, ine chanchiama?
 Ripeng nang'ko sandibajok, gale an'tang janggi,
 Ka'dimebo sona na'a, gisik ka'sariri.

- Kalsin - Aiao, Gose sonatchisa, da'osa mikkang nikjok,
 Soinasi agansoa, kakket ong'bebejok.
 Da'alosa angni ka'tong, namen ka'sinbejok.
 Sonatchiko mikkang nike, da'ode kusi ong'jok
 (Asonge)
 Mosa Aren sijok ine, angna chitti sejok,
 Maidakesa da'o na'ra, Dacca sokbapa'jok?
- Sonatchi - Oe Sona siahachim, aro gopahachim,
 Saoba angna ka'sachake, bile donahachim.
 Ka'saa na'ra bano donga, badia biapo,
 Ka'sapa'e uko mangmang, angna aganangbo.
 Jeba ong'bo nikgrikaha, da'o ka'dimenok,
 kusi ong'an chin gita, hai Salam ka'nok.
- Kalsin - Angni nokko ma'sijaode, Ukgil babun, nokko,
 Sandiaibo nikaigen, Nobapurni Road-o.
 Jeba ong'bo agansrangna, donga number chi'chet,
 Am'angaibo man'eaigen. raman apket changket.
- Sonatchi - A'gilsako mikkimite, pil'e mikraktaion,
 Kusi ong'a nikrimtaie, a'sak rongchingtaion.
- Kalsin - Jeba ong'bo sona anga, da'o re'nahane,
 Basakoba somoi man'o, anga re'bagenne
 Da'ode anga ma'siaha, Plak obostako,
 Chanchiato niksokjajok, sona nang'ni dukko.
 Dacca Jilla sokbaaha, janggi jama gale,
 Dongbo sona tom'tom da'o, gisik ka'guale.

• • • • •

DAKMESOKANI-IV

* * *

MESOKANI-I

DINESH ARO LOKKI GOLPO KA'A.

(Dinesh Chandra Lokki baksa, a'pal balwa ringna,
Re'angaha jakritinge, umang chigatona.
Wari a'dram a'dram re'e, Ka'ding warek warek.
Miksongatang agangrike, ka'ding warek warek.
Uandake re'anga'on, dal'gipa skalko,
Grongaha sakgnian, aiao inmanako.
Nikatenba Loki da'nang, ka'spe okspejok,
Janggi jama galna nangnok, ine jajrengbejok).

- Banesh - Sakchi balwa ta'arakenga, aram chadoangjok,
Tusigipa mandekode, na'de du'mesajok,
- Lokki - Nitogipa pulni bibal, bijak chimongtoka,
Chel'beani biba'na'an, mikbokbatokenba?
- Dinesh - Nang'ni katta bebe chong'mot, jegalani dongja,
A'gilsako jora ra'na, nang'na agre nikja.
(SKAL RE'BAGEN)
- Lokki - Aiao sona niatpa'bo, aiwara maiasa,
Srongdingding ninanggija, sawa re'baenga?
- Dinesh - Sona na'a jrip dongbo, uan mande ong'ja,
Mande jatko nisigipa, skal dal'gipasa.
- Lokki - Skal bebe ong'genode, an'ching janggi sinok,
So'otsrange galjaode, jama nisie bon'nok.
- Dinesh - Ripeng uni janggikode, so'otna man'jawa,
Indioba amadipet, warachake sina.
(Dineshno skalni dingmittingo, Lokki slaichi goa)
- Dinesh - Angni janggin sona da'nang, angko jokataha,
Ge'etgijan agangijan, angna dakchakaha.
- Lokki - A'gilsako kusinasa, seko ra'aigenma?
Apsan janggi galrimna'an, ku'mikchetgrikaba.

MESOKANI - II

DINESHNA INCHOK CHITTI ON'A.

- Inchok - Dada nang'na Sari Lokki, Chitti on'atana,
Maiko sea poraie nibo, aro aganpa'na.
- Dinesh - Jeba ong'bo donangaibo, ja'man poraiaigen,
Manderangni knaoara, mitakjojoaigen.
(Chitti poraie)
Na'ara me'chikara da'o, maiko chanchipa'jok,
Maina cholinike angko, Lokki chitti sejok.
Intangode jikko ra'o, aro debaenba,
Aldu mittangpana man'jae, gamnap sunappana?
Jako kamgnangko nike, angna chanchipa'osa,
A'sak jora ra'paoba, kusini dongosa.
Pring do'gisikaoni, attam andalsike,
Ru'at nade ganne, aro mikka bitchi ringe.
A'sak dukko chake anga, aldu mittangpa'na.
Man'pajawa jikko kimna, maichi aldupana?
Intangode jikko ronge, aro deko ba'e,
Mikgil kiratcha'na mangmang, aldurakpajaode.

MESOKANI-III

INCHOK ARO TOCHENG (PAGIPA).

(Inchok da'nang jadok ong'jok, oko chango kejoj,
Joendroming ka'saagrike, Umang a'sel ong'jok.
Joendrode chanchienga, ra'uamnade ong'ja,
Sandienba bichaloe, ua joknan man'ja.)

- Inchok - Apa ang'de ben'tangode, bisi boe ra'jok,
Maiko dakgen an'tangnade, ma'sisokpiljajok.
- Tocheng - San baksa a'sel ong'esa, indake an'tangna
dukniko ra'bajok? Sawa mandeara, angna kakket
aganbo, je ong'oba sing'e sanne on'srangna.
- Inchok - Angni be'en bimangkoba, baba u'ijama?
Be'en bimang nipabora, da'o jadok ong'jok.
- Tocheng - Ben'noktangan aganjaode sawa ma'sigena?
Je ong'aha, ong'aha kakketkon ku'rachakbo,
sawasa me'asara?
- Inchok - Baba angmung a'sel ong'a, Joendro Pantene,

Ra'na dongna ku'rachaka, ua togijaode.
Joendroming a'sel ong'e, oko chango kejok,
Ka'sajaenba jeahaode, anga maiko daknok?

- Tocheng - Je ong'oba, Joendroko sing'e sandie nina,
anga tik ka'atgen aro re'anggen. Uni ka'sae
kakketkon ku'rachakahaode ta'rakalen do'ra
do'sie on'a, sal tarikrangkoba tik ka'jolbaignok.

MESOKANI-IV.

REVEREND, RUKMINI ARO SONATCHI.

- Sonatchi - Babu anga na'simangna, mingsa parakpa'na,
Knatimna sikjaoba, chakchike knana.
- Revernd - Aganbo dede, na'a maiko aganna ska. Anga chol
ong'enga dipetde nang'ko dakchakgen aro nirokgen
mamung saloba watgaljawa.
- Sonatchi - Kalsin Momin baksa anga, bi'sa chonengaonin,
Ka'sagrika sakgnian, songo dongaonin.
- Reverend - Oe, indiba ua pantede, Ukgil babuni demechikko
ra'na tik ka'aha ine angna Ukgil babu aganaha.
Na'simang chongengaonin ka'sagrika ong'ode, anga
Ukgil babu baksa agangrikgen. Uamangni mamungba
champengani dongjaode ta'rakalen bia ka'e on'a
man'aigen. Anga an'tangba Kalsin babukode namnika.
- Rukmini - Apa maiko chanchienga, da'o chu'sokaha,
Jatangna miksongara, da'o parakaha.
Uni gimin soibalini, da'nang miksongako,
Plak manden' seko ra'e, donga a'gilsako.
- Reverend - Oe, Kalsinde bi'sa namen nama. Na'simangni
Ka'sagrika kakket ong'ode, nokgipa na'simangna
dakchakgen aro na'simangni miksonga chu'sokgipa
ong'gen.
- Sonatchi - Na'simangni ka'saako, maichi tosokpa'gen,
On'angpil'na dongjawaha, maiko on'pilskagen.
Na'simangni dakchakana, Gitel ka'sagipa
On'skagen suakpil'e, anga pangnan bi'a.

MESOKANI-V

JOENDRO ARO MALSIN INCHOKNI GIMIN GOLPOA.

- Joendro - Mai, anggri namengama?
- Malsin - Namenga, mama. Mai mama nang'kode angade da'ororode namen duk man'e dongkamaia gita nika. Maiba a'sel ong'ama?
- Joendro - Maiko agangen Mama, na'an angkode jokattaina nanggen. Nang'ni dakchakjaode, angade maiko dakgen u'ipil'jaha.
- Malsin - Mai a'sel ong'esa? Aganne nibochang.
- Joendro - Angna Inchok ka'saana aro mikcharana. Angara, Inchokkode gisik ka'tong gimikan namnikja aro mikchaja. Indiba, Inchokni jotsik su'sik dakana, gisik kusi ong'na mangmang, mikchae roara da'ora obostan namsrangajaha ine knaman'enga. Uni Mama Ada aro Maharide donjawa. Angade ra'na nangaigen aro ra'jaoba dai gamna nanggen. Maiko dake jokna cholko man'gen, na'an dakchakpa'bo.
- Malsin - Jajrengnabe mama, angaba ma'siaicnga, Na'ade gisik ka'tong gimikkan Sonatchi saginasa dongaienga, Inchokkoba apsan daken bisi on'e siattaina mama. Unosa na'ade jokaigen. Mikchaode ra'srangaiboaha mama, indinba na'aba jora ripengkoara ra'nara nangaigen. Inchokara Nomilke me'chikba, kam cholon gimikan nama da'nang. Rasrangaibo mama, agre chanchichainabe.
- Joendro - Ong'ja anggri anga mikchachong'motja aro jokna nangchongmotgen. Uni gimin na'an sam on'taibone ang'gri Uni an'tangna saode na'an sam ra'e on'ataibo, anga nang'oniko ra'china pagipako agangen.
- Malsin - Nang'ni aganode, ripengtangna dakchakna on'a nanggen. Indiba, angade ia kamrangkode ka'na sikjachim, Je ong'oba ja'mano ninane, mama.
- Joendro - Indakode tol'panabene ang'gri, an'chingni miksonga gitan daktainaha aro kamko chu'sokatna.
- Malsin - De, mama namaigen. Jensalo nang'ni nangnika angna aganaibo.

MESOKANI-VI

KALSINKO GRONGNA SOIBALI RE'ANGA.

- Sonatchi - Knal salde re'e ninok, ka'saa Kalsinchina,
Soibali Solbali A'gilsakni obostako, biming golpo ka'na.
Golpo ka'a matchotoa, miksonga kamona,

Tik ka'na sal somoiko, Jik se ra'grikpa'na. (Re'anga)

- Kalsin - Ripeng re'babebejokma, iano asongbo,
Anga chaako dakepa'na, dikdik asongsobo.
- Soibali - Ripeng na'a dakna nangja, angna mesokaibo,
Chaa chini bano donna, aganne on'aibo.
- Kalsin - Babilsio plak bostu, unon dongtokaia,
Chaa Chini plak bostu, unon dontokaia.
- Soibali - Indakode da'o anga, tarienga dongbo,
Na'a ianon asongsobo. anga ra'baaigen.
(Chaa tarina re'anga)
- Soibali - Ha sona chaako ringbo, anga taribajok,
Ringmanoa Gue cha'e, golpo ka'aignok,
- Kalsin - Maisa sona angna mangmang, na'ade dakbaj-ama?
Sakgninan maina dakja, chini dongjahama?
- Soibali - Maina chame sakgnina, ian chu'ongaigen,
Sakgnian an'ching apan, iakon ringaigen.
- Kalsin - Indakode chame na'aba, chaako ringatpa'bo,
Anga nang'na du'atpana, na'a cha'soaiibo.
- Soibali - Ong'ja Chame na'a skang, chaako ringatpa'bo.
Anga pita du'atpa'na, ha cha'atpabo.
- Kalsin - Ra anga cha'aignok, sona du'atpabo.
Anga nang'na du'skana, name ku'angpa'bo.
Nang'ni sianako knae, anga dukko man'jok,
Nang'ko nikjae gisik dukko, sina chanchiaijok.
- Soibali - Oe anga siahachim, aro gopahachim,
Saoba angna ka'sachake, bile donahachim.
- kalsin - Maidakesa simanoa, bilo tangchapil'jok.
Plak manden kna'oa, aiao inmanpil'jok.
- Soibali - Haida ripeng a'sel chong'mot, anga ma'sijaha,
Tangchapil'jok gopmangimin, sawan tangataha.
- Kalsin - Nang'ko sawa miksongachim, man'jatelanasa,
Ka'o nange so'otakon, samchi snakesa.
Indakesa gopmangimin, bile nama samko.
Kanat man'o tangchaabaha, pil'e sigiminko.

- Soibali - Songo pagol dakgipade, Joendro Malsinsa.
Golmalko dakenggipa, Umang Mamasasa.
- Kalsin - Jeba ong'bo re'angimin, salko gualbojok,
An'ching mangsongsoaona, na'a chanchibojok.
- Soibali - Chame anga ru'utede, salko ra'na sikja,
Da'al dipet ripeng nang'uo, wate re'na sikja.
- Kalsin - Angni ku'sa agannako, na'a manikubo,
Niam gita chitti kingsa, angna seatcheng'bo.
Angni gimin nokgipa'o, ku'sa janapchengna,
Plak kamko chu'sokatna, gisik parakchengna.
- Soibali - Ra Sona indakode, na'a tol'panabe.
Nang'ni ku'patia gitan, anga seatnane.
Angni nang'na ka'saako, Reverend ma'siaha,
An'ching ka'sagrikarangko, anga parakaha.
Sona na'a dongrikbone, anga re'tainaha,
Ka'pakoba ka'saachi, jako rim'e salam.
- Kalsin - Re'angbojok sona na'a, angni ka'saan chimik,
Nang'ko pangnan gualjawa, gisik ka'dimenok.

MESOKANI-VII

JOENDROKO BICHAL KA'A.

- Tocheng - Inchok, da'alde na'a name mi bijak song'e, je
Dongakon tarie donsobo.
- Inchok - Mainabama, baba?
- Tocheng - Nang'ni jari dakani a'sel, anga Nokma, Jorong aro
Joendroni pagipa, Ma'gipa Jongbinmangchi, na'simangni
gimin plak kam kattarangko sandina re'angenga. Da'al
attamo, an'ching nokona uamangko okamate, sing'e sanne
nigen.
- Inchok - Nang'ni aganna gitan, anga gimikkon tarie donsoe nigen,
baba, na'a jajrengnabe.
- Tocheng - (Re'anga) Boning Jorong, Nokonma?
- Jorong - Nokon Boning, mainasa da'alde pringwalni re'baenga?
Maiaba, a'sel ong'ama?
- Tocheng - Maiko agangen boning, kratcha'oba, jaksi chikoba angni

dean namjaha. Nang'ni gritang Joendro baksa kam a'sel ong'enba, da'o angni demechikode oko chango donpilengjok. Uni giminsa uamangko sing'grik sangrike nina inesa golpona re'baengachim.

- Jorong - De, maiko dakgen, Joendroni kaman namja ong'ode jekoba sing'sandie ninade nanggen, anga re'anggan. Boning Jongbin mangchiba re'ange nibo.
- Tocheng - De, anga re'ange agannegen (Re'anga). Mosa Nokonma?
- Jongbin - Nokon, Mosa. Mainasa da'alde pangnaba re'baronggija re'baenga. Napbabo. Napbabo mosa, iano asongebo.
- Tocheng - Maiko agangen Mosa. Angni re'baani kattade namen dal'a. Kratcha'oba, jaksi chikoba, inna saiako chakeba angni deannamjajok, uamangni giminsa re'baenga. Mosa Kattade ian, nang'ni depante Joendro angni demechik Inchok baksa ka'sagrik namnikgrike, kam a'sel ong'e da'oara obostan namjaha ine aganenga. Uni giminsa angade nang'ni deko an'tangni demechikna Chaware sing'e Sanne nina re'baengachim, chingade. Duk man'oba kratcha'oba kam a'sel ong'manjok, je kattarangkoba talgrike do'ra do'sie on'srangna, sal tarikrangko tik ka'na chanchienga.
- Jongbin - Oe, na'a mosa da'oara, Angni deba namjajok, nang'ni deba namjajok, watgija daknaba namsrangjaha, Chingade maiko agangen, Amenan chamenan ba'a nokgipa mikchaa namnikode ra'srang dongsrangaichinaha. Je ong'oba da'al attamona somoi rasrangbo, singrok sanroke nina.
- Tocheng - Iandaken angaba chanchienga mosa. Indakode, da'al attamo angni nokchina re'basrangbo, mosane. Nang'ni nangnika, mosa boning, sadu sade gimikkon rime re'angbo. Anga re'naha.
- Jongbin - De namaigen, anga attamo re'anggan.

MESOKANI-VIII.

MALSIN ARO INCHOK GOLPO KA'A

- Malsin - Nomil nang'na mingsa katta, anga aganku'na, Angni agannako na'a, gisik chanchirikna.
- Inchok - Maia katta aganaibo, man'gen knatimna,

Donmitape aganabe, parakosa nama.

- Malsin - Angni gisik chanchiako, kakket paraksrangna,
Nang'ni angna ka'sapaode, chanchiachim nang'na.
- Inchok - Aiao Pante chanchina'be, janggi gimagenne.
Nang'ni mama kna'ode, angko so'otgenne.
- Joendro - (Inchok re'anga) Denggu na'a aganchakbo, maiko daknakenga?
Inchok nomil ra'na ine,maina chanchienga?
- Malsin - Nang'ni jik dea ong'ja, maina chanchijawa,
A'gilsako jora ra'na, sawa sana kenna?
- Joendro - Ian nang'ni gaoramo, indi aganchaka?
Bipaode warachakbo, rim'e dakgriksrangna.
- Malsin - Raka challeng Malsin goera, kengen chanchiama?
Tango challeng sio me'mang. ama atchipa'ra.
(Dagrikmittingo Inchok nikdikea)
- Joendro - Ia denggu mandekoa, da'o maiko dakbo.
Warachakna pa'jaode, na'a bakbak katbo.
- Malsin - Nang'na kenne katahaode, anga challeng pante,
Gaora de'dukgagipako, nikja nang'na agre.
- Inchok - Maia ong'jok na'simangde, gisik dongjajokma?
Gipin ong'ja ripeng chong'mot, kratbacha'pajama?
Gipin mande aganenga, umang bobil dakjok,
Songgimikna mitdakani, kamko daktokengjok.
Name chanchibewalenba, ku'mong meligrikbo.
Da'al dipet bobil gnal, da'a chanchipa'bo.
Angni agannako na'mang, namja nikahaode,
Chasong bobil dakangkugen, apan ripeng ong'e.
- Joendro - Anggri an'ching dakengara, namen gualbea.
Me'chik jekon aganenga, kakket ong'bebea.
- Malsin - Mama nang'ni agannako, anga dakaignok,
Chame jeko aganenga, kakket bebe chong'mot.
- Inchok - Aro mingsa aganku'na, name knatimbo.
Sari Lokki dongpaenga, una mihsongtokbo.
- Malsin - Lokki Nomil man'pagenma, Dinesh Sangma donga,
Chanchienga ma'detangba, ukon sing'e nina.
- Inchok - Buti na'mang changpajama, skina nangama?

Dinesh pantekoa maina, so'otna kennama?

MESOKANI-IX.

JOENDRO ARO INCHOKNI GIMIN MELARA.

- Tocheng - Atcha Ai Inchok, manderangani aganna mitaka gita tol'asama, bebema? Joendro baksa ka'saa meligrika innara ong'beama?
- Inchok - Apa, anga maina jeaigen, manderangni jekon agana mitaka, ong'bebea. Anga Joendrona ka'sara, uni gimin Apa angade, Joendro pantekode watjawa. Angade, Uni jakon sina tariman'aha. Joendro panteba, ra'na dongnan angna ku'rachaka.
- Tocheng - Indakode, da'al attamo melara'o name jinmama kakketkon ku'rachakbo aro tol'nabe. Tol'ode, nang'ni mama adani. ma'a Paani dal'bea kratcha'ani ong'gen.
- Jorong - De songa noka tom'batokahaode, sawa sako mai dakani a'sel melara, aganboaha.
- Tocheng - Da'al attamo songko nokko agane tom'atani a'selde, angni demechik Inchok baksa, Joendro-ni mikchaa namnikgrika ine songjro nokjro agan mitdakani gimin tol'ama bebema ine sandianiko dakchina gita tom'atenga.
- Jorong - Gritang. Joendroara re'bahama?
- Joendro - Re'baa, donga mama.
- Jorong - Atcha, Inchok, Joendroara nang' baksa roa inara robebeama?
- Inchok - Oe, maina tol'gen. Chinga sakgnian apsan meligrike robebea. Anga tol'a inoba, na'simang angni be'en bimangkoba nipabo. Anga antangari ong'jajok.
- Jorong - Joendro, me'chikni aganenga gitan, na'ara Inchok baksa kam a'sel ong'bebeama? Kakketkon aganbo, Na'ara, Inchokkoara ra'nan dongnan dakama ba gisik kusi ong'anasan kal'ake roaiama?
- Joendro - Mama, angade me'chiknade mikchaade ong'ja indiba gisik kusi ong'anasan dakaia. Angade ra'jawa.
- Jorong - Inchok, me'asade ra'na rongnade dakja, gisik kusi ong'anasan dakaia ine aganenga. Na'ara maiko daknaka?

Na'ara ra'nan rongnan dakama ba me'asani dengguko ma'sien na'aba gisik kusinasa dakama? ba ma'sigijasa dakama?

- Inchok - Awang, angade ra'nan rongnan mikchaa namniken daka. Aro Joendroni angko ra'na rongna ku'rachakani giminsa, plak kam a'selrangba ong'a. Da'oba Joendrode re'barong-enga aro ra'gen inen mikchete aganna. Angko ra'gija tol'e gale katode mikgron kanna ong'gen ine mikcheta.
- Jongbin - Joendro na'a denggu dakna man'jawa. Mikchaa namnik-Jaode mainasa, jawani janggi tanganiko nosto ka'enga. Ra'na nanggen, denggu, dake jokna man'jawa.
- Tocheng - Oe, nampajaoba, silpajaoba, song'e su'e on'rakjaoba ra'na dongna inen miksonge dakahaode, angade jekoba Jong gri inaigen.
- Jorong - Joendro jechake da'o namgni dongjawa, ra'nan nanggen. Do'ra do'sie on'a gita sal tarikrangara basako namgen? Tocheng bakkak Do'sie on'bo.
- Tocheng - Angade, mikkang anti sukurbar salon namnikaigen. Chinga mahari gimikkan kusi ong'a.
- Joendro - Angni mama, ada gimikkan drahaode angade maiko dakkugen, angan dos dakmanjok jechakeba maming namgni dongjajok, kimaignok.
- Jinma - De namaha.

MESOKANI-X.

JOENDRO ARO MALSIN INCHOKKO SOOTA.

- Joendro - Angang'gri, Malsin, mikkang sukurbar salode angkode Inchokna do'ra do'sie on'a tik ka'manaha. Angara maiko dakgnok, me'chikoara mikchachong motja, gisik kusinasa dakaiachim.
- Malsin - Mandera namen nambea, kam cholon gimikan nama, ra'srangaiboaha, mama. Maina indin janggiko nisie galaigen.
- Joendro - Hai anggri je ong'oba da'al attamo Inchokmangni nokchi sakgni rona re'na.
- Malsin - Rona re'nade man'aigenba(Attamo re'anga)

- Joendro - Nampaengama, Chame?
- Inchok - Nampaenga, Chame
- Inchok - Angade da'alde be'en an'sengbrejaengasai.
Mai ong'abai?
- Joendro - Mamingba ong'jawa, ia angni ripeng Malsinan sam
man'aba, anga unoniko re'e on'aigen. Mai saenga
namesa aganne on'aibo.
- Inchok - Maingba ong'jawa na'a, an'tangnasa saengade.
Aro angade Malsinonikode sam ra'na kenna, maina uade
skangoba angni ripeng Sonatchikoba sam, on'e namatani
pal batesa siatsranga. Ra'jawa angade Malsinonikode.
- Joendro - Mamingba ong'jawa, kenna nangja, basakobade a'sel
ong'na nangode ong'gakaia. Sam namako on'china anga
aganne on'gen.
- Inchok - Indakomangba angade, Malsinonikode ra'na kenna.
- Joendro - Anggri Malsin, angni, jikchong rongnasicnggipade
be'en an'sengjaengana, na'a sam namako ra'bae on'pabone.
- Malsin - (Mitinno) mama, angade man'ja aro samko on'naba kenna.
Mandean an'tangari ong'jahake mama. Sam on'ode namjawaha.
Sam on'ode snakaming apsantaiaigenaha. Angade kenna mama
kema ka'bo, on'jawaha.
- Joendro - Jajrengnabe anggri, mamingba ong'jawa. Nang'ni angna
ku'rachaka gitan dakaibo. Na'simangde ojasaba, Isol
ong'jasaba. Man'ode ta'rake sianiko on'srangbo. Na'a
nang'ni ripengna ka'saode, angko ia me'chikoniko naljoke
rakipa'bo.
- Malsin - De, mama je a'sel ong'oba, anga on'srangaignok.
(Inchokna sam ra'ange on'ea)
- Inchok - (Sam tarie) Angna je a'sel ong'genoba, Joendroni angna
ka'sae agannanga gitan ia samko ringaignok. Angni ja'man
Ja'wilo uamang angko gisik ra'rikchina (sam ringe sia).

MESOKANI-XI.

REVEREND ARO UKGIL

- Reverend - Ukgil babu nokonma?
- Ukgil - Nokkon, mainaba re'baama, asongebo.
- Reverend - Angade nang' baksa on'tisa golpo ka'na nangani giminsa
re'baenga. Kattade ian, ango dongenggipa Soibalini katta
gitade, nang'ni noko dongenggipa pante Kalsinna skang

- chonnengnittingonin ka'saa namnikgrika dongana. Uamang da'o ia Dacca jillao pil'e grongrike, an'tangtangna a'gilsaknni gita jora aro ripengko dakna miksonge angna parakaha. Ia angni kattarangni giminara na'ara maiko chanchia?
- Ukgil - Angade maiko agangen. Oe, Kalsin angna skango saksa me'chikni gimin aganengachim, jean saa man'e siaha ine aganna. Ua me'chikara sawasa aro da'o ia nang'ni aganenggipa me'chikara sawasa? Jeba ong'china, angade namen kusi ong'begen aro Kalsin babukode sing'na nangjawa, anga sing'e nigen aro aganaigen.
- Reverend - Oe, ia apsan me'chikan ine Soibali angna ku'rachaka. Saenba ua siahachim indiba goprmoni tangchapil'e da'o ua brangba'mitting somoio angni demechik rimbaesa angni noko ma'chakeaha.
- Ukgil - oh, da'nang, namen duk chakgipa bi'sa. Iandake ong'ode uamangni sal somoiko tik ka'enba Register ka'e on'srangnok. Uamang sakgnian da'o an'chingni nokon donga. Kalsinni Koros gimikkon anga gamaigen. Indiba, plak kamrangko nikuna, ja'mano apsan tik ka'taina.
- Reverend - De, namaigen.

MESOKANI-XII

LOKKI ARO DINESH CHITTI SEA.

- Dinesh - Angni ka'saa janggin ripeng, Lokki seatenga, Bang'pagija kattarangchi, aganchakatenga. Rasong giri pante anga, da'o maiko dakna, Dukni sukni katta nang'na, aganchakatenga. Indioba katta ian, na'a chanchipa'bo, Niam gita mama ada, na'a parakpa'bo. Ka'satangna kingsamangmang, aganchakakoa, Mia cholchi on'egnok, ia chittikoa. Mikkang nikna kratcha'oba, anga re'drae nigen, Ma'detangni jako on'e, anga re'basranggen.
- (Dinesh re'anga-Lokki rumal siksoa)
- Lokki - Ka'satangna kingsamangmang, rumal sikipaku'na. Re'angenba kodam ning'o, anga donneku'na. Angni janggin ripeng nang'na, rumal sikipaaha, Ka'sajaoba jakkalahaon, gisik ra'pachina. Ia rumal ku'teoa, segen 'Forget-me-not'. Nikahaode chanchichina, ka'saan bebe chong'mot.

- Dinesh - (Chapekgrika) Maikosa miksi mikot, chanchie sikengjok.
Mikkang ki'sang nigijasa, gisik nangbeengjok?
- Lokki - Oe anga gisik nangen, rumal sikpaenga,
Ka'saa nang'ko niksojajok, kema ka'pachina.
Ripeng na'ra maiakosa, jepchi sikatenga,
Angko nikna kenenbani, sket donatenga?
Sona maiko chanchiesa, angko nikpajajok,
Ka'san ja'ku ga'chokchime, anggo chapekejok?
- Dinesh - Dongja naa ramram leka, kasrang dol'anisa,
Kasrang dol'e ringna ine, jepo ra'bitbaasa.
- Lokki - Jeba ong'bo ripeng nina, dukko man'panabe,
Gualoa ja'manoba, kema ka'paibone (chitti poraia).
Angni ka'saa janggin ripeng, gisik dongbebea,
Rasonggiri me'chiknaba, ka'sachakbebea.
Uni gimin janggin ripeng, jora ong'na nang'ming,
Bia ka'na tik ka'nok, Apao aganneming.
- Dinesh - Jeba ong'bo kiratcha'oba, basak donnuku'na,
Aganchenge ka'saako, Ma'a Pagipana.
Uni gimin sona anga, nokchi re'nahane,
Ka'saachi Salam ra'na, gisik ra'rikbone.
- Lokki - A'gilsako bibalranga, Golap nitobata,
Panterangni gisepode, Dinesh daknangbata.
Dinesh Pante ra'na anga, man'ja chong'motode,
Janggitangkon so'otsrange, siaigen angade.
Panten gisik chanchiaba, namen sontolbea.
A'sak jora ra'paoba, nokdang ka'sinbea.

MESOKANI-XIII

UKGIL ARO KALSIN MOMIN GOLPOA.

- Ukgil - Kalsin babu angna Reverendni agana gitade, nang'ko
uni noko dongenggipa Soibali minggipako skang bi'saonin
ka'sagrika ine aganata. Aro na'simang da'o a'gilsakni
gita jora ripengko dakna chanchiengana ine uni angna
aganengara ong'bebeama? Ua me'chikara skango nang'ni
angna sae siaha ine agangipa apan me'chikanma? Da'oara
maidakesa sigiminara tangchaenba Daccaona sokbaha?
- Kalsin - Oe, babu anga Soibaliko sijok inesa knaachim, maina
angni ripeng uko siaha ine angna chitti seata. Indiba,

ua siaoni maidake tangchabaaha aganan man'ja aro ua da'o angko sandibaenba nikaaha. Skango chingna duknirang donggenchim ong'oba, da'o pil'e kusini salrangko anga man'piltaiaha. Chinga an'tangtangnade a'gilsakni gita jora aro ripengko dakna chanchiengachim, nang'nasa aganku'ja maina anga nang'na agan parakna kratcha'e dongengachim.

- Ukgil - Na'simangni agan parakjagenchim ong'oba, anga gimikkon rongtalaha aro ma'siaha. Je ong'oba na'simang name jora aro ripengko dake kusi ong'gipa nokdang ong'na jotton ka'angbo. Chinga na'simangko Register ka'e on'gen aro nanga koros gimikkon gamgen. Uni ja'manoba na'a namnikode ang' baksa kamko ka'angkuna man'gen.
- Kalsin - Nang'ni ka'sae daka kamrangna anga maichi on'pilskagen. Nokgipa nang'na aro nang'ni nokdangna patiangchina anga bi'a.
- Ukgil - Anga aro Reverend babu mikkang jaon Register ka'e on'na tik ka'manaha.

MESOKANI-XIV

SONATCHI ARO KALSIN BIA KA'A.

(Sonatchi aro Kalsinko bia ka'aniona tom'batoka)

- Reverend - Ka'sara ripengrang, an'ching Isolni nikao aro ia tom'bagipa plak manderangni mikkango ia me'chik aro me'asako bia ka'anio nangrimatna ine tom'batokaha. Bia Ka'ani sal kusi ong'ani aro mitelani sal ong'a. Uni gimin da'o na'simangni gisepo saoba, ia bia ka'gnigipa me'asa aro me'chikni gimin maiba champengani a'selrang dongode aganpabo.
- Jinma - Mamungba champengani dongja.
- Reverend - Plakba mamung champengani dongjaode da'o anga uamangko bia ka'achi nangrimatgen.
- Jinma - Git ring'a.
- Reverend - Da'o Kalsin aro Sonatchi na'simang bia ka'anio jik aro se nangrimataniko man'a skengode, na'simangni jakrani jakko rim'bo. Kalsin, na'a nang'ni jakrachi rim'enggipa Sonatchiko

Isolni aro manderangni mikkango aro Jisuni bimungo da'ontal niamchi bia ka'atgimin nang'ni jik chong'mot ine ra'ama?

Kalsin - Ra'a.

Reverend - Kalsin, na'a Sonatchina ka'sae janggi tanga dipet, dukkoba, sukkoba, saa ding'an saloba, okkri cha'asioba, watgija aldumittanggenma?

Kalsin - Alduimittanggen.

Reverend - Da'o, Sonatchi na'a nang'ni jakrachi rim'enggipa, Kalsin mominko, Isolni aro manderangni mikkango aro Jisu-ni bimungo daontaltal niamchi bia ka'atgimin nang'ni segipa chong'mot ine ra'ama?

Sonatchi - Ra'a.

Reverend - Na'a, Kalsin-na ka'sae janggi tangenga dipet, dukkoba, sukkoba, saa ding'an saloba aro okkri cha'asioba uko watgija aldu mittanggen aro janggi tangrimgenma?

Sonatchi - Addu mittanggen aro janggi tangrimgen.

Reverend - (Jakstem patgrikatani ja'mano). Na'simangni indake ku'rachakgrikahani gimin, anga ia a'songni sorkarini dongimin niam gita, Isolni aro manderangni mikkango aro Jisuni bimungo da'al dipet Jik aro Se ine channata.

Isol na'simangko dilchina aro nokdangna patichina.

Jinma - Git ring'a aro Sastro poraia. Aro Isolo bi'e bia ka'aniko matchotata.

Reverend - Sokbagipa plakan mi cha'e re'angtokpabo.

Ukgil - Aiao, Rev. babu, namen nambeaha aro mitelbea. Chinga re'naha aro jong Kalsin name dongbo aro angko pangnan grongerongbo.

Kalsin - De, babu anga nang'ko mitelana agrede mamungba on'pilskaani dongja.

Sonatchi - chinga chingni bi'anio pangnan na'simangko Gualjawa.

MESOKANI-XV

KALSIN ARO SONATCHI BIA KA'MANO.

- Sonatchi - Ang' Se ratcha ia bilsa, an'ching kamko watnok,
Ama Apa amangjaengjok, an'ching songchi re'nok,
A'gilsako manderangni jekai, janggi tanga,
An'chingbani songo donge, ka'nok chonna rema.
- Kalsin - Nang'ni aganenga katta, bebe ong'chongmota,
Nang'ma-mangko aldunade, an'ching nangchongmota.
Nang'ni mol'molenga gitan, anga maniaainok,
Bilsa pangpilgrikahaode, kamko watsrangainok.
Kamko watna miksongako, Reverend Ukgilnade.
Parakchengna nanggen da'on, ja'man ja'wilnade.
- Sonatchi - Reverend Ukgil ka'sajae, dakjagenchimode,
Bia ka'nan man'jwachim, an'ching an'tangtangde.
Re'nasiahaoba an'ching, Reverend Ukgilnade,
Agan mesokchengpaesa, re'chakatpagenne.
Mikkang jani bon'ahaode, an'ching re'chakatnok.
Plak kamko matchotesa, ja'ku jitpagnok.

MESOKANI-XVI

SUSILLA SUNDARI SIA.

- (Susilla sundari da'nang, Ukgil demechiksa,
Miksongachim bia ka'na, Kalsin Mominkosa.
Gisiktango miksongoba, ua chu'sokjaha,
Dukko man'e su'e sijok, an'tang jaktangchisa)
- Susilla - Angni miksongako gose, da'o man'pajaha,
A'gilsako janggi tangna, angna dongpajaha.
Angni ka'saa ma'a paana, chitti scangpana,
Mani a'sel jangggi galjok, poraie ma'sichina.
Ia churi jako donga, anga su'e sinok,
(Su'e sia)
- Ukgil - (Re'bae nika) Susilla, susilla chakatbo Ama,
maia a'sel ong'galgalaha. Ai, Susilla mikrakbo,
angna ku'samangmang ka'saani ku'rangko on'pakubo.
(grape-chitti poraia)
oh, Ama, angna skang intal ia ning'tugipa kattarangko
parakgija donuaha. Anga nang'ni Kalsin Moninna ka'saako
ma'siode, Soibalina bia ka'e on'jawachim. Angara nang'nan
bia ka'e on'genchim, da'oara angara maiko dakbo?

(Mangisiko gipake grapa aro so'a)

MESOKANI-XVII.

KALSIN ARO SONATCHI A'SONGTANGCHI RE'PILNA BIA.

- Sonatchi - Reverend babu mingsa katta, nang'o janapana.
Maming dukko man'jawama, angni aganana.
Reverend babu a'songtangchi, chinga re'angpil'na,
Nang'ni watatgenchimode, chinga songretaina.
- Reverend - Re'angaibo dede na'a, da'ode jakgiteljok,
A'gilsako janggi tangna, sea paa dongjok.
Inditana angongdonge, dukko chakbeaha,
Dukko chakan bite nang'na, nokgipa on'aha.
Kusi ong'e re'angpilbo, dukko man'angnabe,
Reangpil'e nang'ni ma'drang, gisik kusi gapc.
Badi bilsil jaropil'jok, na'mangko nikgija.
Niksoenba kusi mikihi, grapnok nang'ma nang'pa.
- Kalsin - Aiao, Reverend nang'ni kamko, maikhi ka'gualnok.
Chasong chingna janggi tangna, dakatgiminsajok.
A'gilsako janggi tange, chinga donggenoba,
Gualjawa chasongnaba, nang'ni ka'san kamna.
- Reverend - Ong'ja dede chanchinabe, angni kamrang ong'ja,
Na'simangni bebera'ao, Isol patiasa.
A'gilsako janggi tange, nokdang kusi ong'na,
Salsalantin gisik ra'bo, nokgipa'o bi'na.
Re'angpilbo gisik kusi, tom'tome sokangbo,
Sokangpil'o angna chitti, kinsa seatpa'bo.

MESOKANI-XVII

SONATCHI ARO KALSIN A'SONGTANGCHI RE'ANGPIL'A.

- Kalsin - Hai, sona re'chakatnok, somoi ong'engaha,
Intangode ja'man chaknok, Jahass somoi gita.
Re'chakatna skang, Reverend babu-mangko,
Girongenba re'chakatnok, da'nang uamangko.
- Sonatchi - Ka'pakbea Reverend babun, nokdangko watangna,
Indi gita bilsil donge, chasong gisik ra'na.
- Reverend - De, Kalsin re'angbojok, da'o somoi ong'jok,
Jako rim'e salampnok, tom'tom re'angbojok.
Re'angenba maiba dukni, na'mangna sokode,

Ui'atbo chinga donga, pil'e re'bakande.

- SUkgil - Oe, da'nag re'angbojok, intang ja'man chaknok,
Salamgnok sakprakprako, ka'pak ka'pak watnok.
Chingni maiba dakchakani, na'mang nanggenode,
Gualnabe ma'siatna, intang nangjokode.
Re'angoba gualnabe, chinga sakgniko,
Re'bapile girongebo, somoi man'paode.
- Kalsin - Guljawa chasongnaba, na'mang daka kamko,
Re'bapile girongegen, chinga somoi changsao.
(Sonatchi aro Kalsin Salam ka'e- mikchi jingjang
jingjang dake a'songtangchina mikkangpil'e re'bara)

MESOKANI-XIX.

SONATCHI ARO KALSIN A'SONGTANGONA SOKBAPIL'A.

- Sonatchi - (Walo) Ai Chingna do'ga obo, nang' De sokbapil'jok.
Gipin ong'ja Sonatchisa, bakbak chakatbojok.
Me'mang ong'ja agitalan, na'mang jajrengnabe,
Sigiminan tangchapil'e, sokbajok kennabe.
Ama na'a kenna nangja, ku'rang knattimbo,
Bebe ra'na amjaoba, chakatba'e nibo.
- Jorong - Mikgitalma, jumangsama, maia ong'jok da'alde,
Maiban appot ong'taigenma, Aman bimangsake.
Darangnian ku'rang ong'ja, Dede sonatchinin,
Bimang chong'chong, gipin ong'ja Ama Sonatchian.
Jeba ong'bo do'ga oe, anga niatsrangen,
Cha'u me'pu ong'genoba, angan sisrangaigen.
- Probalin - Simanaha Ama na'ara, maikai tangchapil'jok,
Me'mangsama putsama, ang'de ma'sijajok.
- Sonatchi - Ai sin'a amchakjaengjok, bakbak do'ga obo,
Bebe ra'na amjaoba, chakate re'babo.
- Probalin - Darang gipin ku'rang ongja, dede sonatchian,
Maia a'sel ong'pilaba, chakki so'ebochang.
- Jorong - (Kenne) Aiao, da'nang gipin ong'ja. Sonatchi sagian,
Ta'ma rani sokbapil'jok, an'chingni rasongan.
Ta'arak nokning napbo dede, intang jawa nikgen,
Re'baenba ja'nengtakbo, duk suk golpogen.
Ta'ma Rani walni somoi, sawa dilbapa'jok,
Samtangtangchin bobilrara, na'ara kenpajajok.
- Probalin - jeba ong'bo sepangsrange, ang'ba re'e ninok,

BIBLIOGRAPHY.

A. PRIMARY SOURCES.

1. Shri Bitchon K. Momin, Konchikol, E. Garo Hills on 20.12.80.
2. Shi Gunendro D. Sangma alias Nollistone, Moskuli, Goalpara, Assam, on 20.8.81.
3. Shri Ramessor K. Sangma, Moskuli, Goalpara, Assam on 4.9.86.
4. Shri Trison S. Daring, Inspector of Schools, Tura, on 5.9.86.
5. Shri Henry W. Momin, Teacher, Tura, on 15-9-86.
6. Shir Itchak Nongbak Sangma, Tangkula, Goalpara, Assam, on 10.10.93.
7. Prof. M. S. Sangma, Deptt. Of History, NEHU. Shillong, on 23.9.93.
8. Shir Gojendro M. Momin, Moskuli, Goalpara, Assam on 20.2.94.
9. Shir Sathon G. Momin, Moskuli, Goalpara, Assam, on 20.2.94.
10. Shri Clearson M. Momin, Tura, on 28.4.94.
11. Mrs Florence B. Sangma, Tura, on 28.4.94.
12. Mr. Grimchi C. Marak, Tura, on 28.4.94.
13. Mrs. Joan Lana B. Sangma, Tura, on 28.4.94.
14. Shri Wilson K. Marak, Tura, on 13.5.96.
15. Shri Bronson W. Momin, Tura, on 13.5.96.
16. Shri Lwellyn R. Marak, Tura, on 12.5.96.
17. Aro bang'a gipinrang.

B. UNPUBLISHED SECONDARY SOURCES.

1. Shri Gunendro Dage Sangma, alias Nollistone, (1956), "Kalsin aro Sonatchi (Dakmesokani), Song Moskuli, Goalpara Assam.
2. 'Kalsin Aro Sonatchi, (1965) (Dakmesokani), Song Mariampur, Goalpara, Assam.
3. Shri Itchak Nongbak sangma, (1960), 'Kalsin Aro Sonatchi' (Dakmesokani),

C. SECONDARY SOURCES.

1. Sangma, M.S.(1983), History of Garo Literature', page-21.
2. Carey, W, (1919) 'Garo Jungle Book', Page-79-95.
3. Momin, Reddin, (1983), 'Kalsin Aro Sonatchi'.

• • • •